

**NATIONAL ASSEMBLY OF
SEYCHELLES**

Wednesday 31st July 2024

The Assembly met at 9 am

National Anthem

Moment of Reflection

Mr Speaker in the Chair

MR SPEAKER

Bonzour Manm Onorab. Bonzour nou bann zofisye. Bonzour nou piblik ki pe swiv nou. Mersi pour zot partisipasyon kontinyel. Nou ava pas dan Staz Komite pour nou kontinyen nou travay. Madanm raporter i ava apel Minis.

Bonzour Minis - Minis Naadir Hassan, bonzour Gouverner Abel, Gouverner *Central Bank* e lezot zofisye ; Ms Tyroomooldy, Ms Jean, Ms Jolicoeur e Mr Mike Tirant akote.

Nou a kontinyen lo travay komite e Onorab John Hoareau i a kontinyen diriz nou.

HON JOHN HOAREAU

Mersi Mr Chair. Bonzour Minis avek tou bann dimoun ki'n vin avek ou. Bonzour tou dimoun ki

pe ekoute e bann ser koleg. Nou a kontinyen avek nou bann lamannman.

So nou aprezan lo paz 13. *Section amendment to section 6.* So nou lo 6(e). I lir koumsa, i annan en *insertion of*, “*have the power to*” avan sa mo, “*delegate such powers*” eksetera.

MR SPEAKER

En moman, wi, Onorab Georges, ou annan en pwen?

HON BERNARD GEORGES

Wi. Bonzour Mr Speaker. Bonzour Minis, Gouverner. Bonzour bann koleg Onorab e tou dimoun ki pe swiv nou. Mr Speaker, wi, mon pe regard sa depi yer, “*have the power to delegate such powers*” – i enn pti pe - i sanble en pe gos.

Could we say something like, “have the authority to delegate such powers”. Pour nou pa repet *powers 2 fwa?* Mersi.

MR SPEAKER

So, ou pe sizere ki napa sa *insertion, is that correct?*

HON BERNARD GEORGES

Pardon. Non. Mon pe *move an amendment to the amendment.* *The amendment says, have the powers to delegate such powers”.*

E mon pa ti a kontan annan en repetisyon *power*. Mon pe zis propoze ki nou met “*have the authority to delegate such powers*”.

MR SPEAKER

“*Authority*” dan plas “*power*”. Mersi. Minis, oubyen komite napa okenn soz. *Ok*.

Si Manm napa okenn obzeksyon. nou ava aksepte sa koman en *minor amendment*. Kontinyen. Onorab Hoareau.

HON JOHN HOAREAU

Nou al aprezan lo *amendment of section 7. Paz 14, subsection (i)(1) anba (iii)(i), Roman numerals*. I lir koumsa, “*is a public officer, official or representative of a public body*”, nou retir “*but does not*” nou include “*not including*” instead of “*include*”, “*an academic.*”

Ok, so i pour lir, mon ava lir son full fraz aprezan pour fer li fer sans - “*is a public officer, official or representative of a public body, not including an academic.*”

Nou kontinyen avek *sub-7*. Pli ba lo menm paz. “*A Board member shall not for a period of 6 months*”, so 6 in ganny ekrir *in words instead of figures*.

Nou a bouz lo paz 15. 7

MR SPEAKER

En moman. Mon a pran en komanter. En pwen Onorab Gill.

HON CHURCHILL GILL

Mersi Mr Speaker. Bonzour Minis ek *panel*. Anba *(d)(7)*. Yer ler Minis ti pe eksplike i ti fer konpran ki sa *Board member*, i pa pour ganny drwa al dan pratik pour 6 mwan.

E i ti dir sa i pa dan son – i pa dezavantaze pour li, akoz i pour ganny en larzan, en keksoz ki parey konmsi i pe ganny peye. Prezan vi ki sa pa mansyonnen la, zis mon ti le leklersisman.

Eski sa pour ganny mansyonnen dan zot dokiman ki zot gannyen ler zot ganny apwente koman en *Board member*? Mersi.

MR SPEAKER

Mersi. Minis.

MINISTER NAADIR HASSAN

Mersi Mr Chair. Mersi Onorab. Wi, egzakteman i pour dan son kontra, pour annan sa eleman ladan. Mersi.

MR SPEAKER

Mersi. Onorab Pillay.

HON SEBASTIEN PILLAY

Mersi Mr Chairman. Mr Chairman, mon pe regard lartik

35 nou Konstitisyon ; Drwa pour Travay. E *whilst* lartik 35 i fer serten derogasyon, me en derogasyon ki lartik 35 pa fer, se ki si ou'n travay dan en lenstitisyon e ki ou pa kapab al redonn *advice* ek lenstitisyon.

Now, nou ti – ti annan en kestyon ki ti ganny *raise* lo konstitisyonality en tel *clause*. Lozik nou konpran. Me Mr Speaker, selman mon pa war kote ki dir dan L-lartik 35 an sa ki konsern en lenstitisyon parey *Central Bank*.

Bann derogasyon ki annan par egzanp. I annan (a) to (e) anba Lartik 35 i pa mansyonnen sa ki Minis pe dir. E anba sa Lalwa ki nou pe war la, ki mannyer sa lamannman pe ganny propoze se ki sa dimoun ki'n servi koman en *Board member only*.

En *Board member* i ganny peye en *Board member's fee*. I pa ganny peye en saler. Nou pe anpes sa dimoun kapab al ganny en louvraz. Nou pe restrikte sa dimoun pour ganny en louvraz.

E mwan mon krwar it *raises en question as to the constitutionality of the clause*, lafason ki'n ganny ekrir si i pa fer prekonizasyon pour nou kler, konbyen sa dimoun i sipoze gannyen.

Admeton mon *Board members fee* i R5000 or R6000 Mr Chairman. Be mon kapab al travay en ganny mwan R40 mil.

MR SPEAKER

Ok. Nou'n konpran ou pwen Onorab. Petet Minis oubyen en manm *panel*? Gouverner?

GOVERNOR OF CENTRAL BANK CAROLINE ABEL

Mersi Mr Chair. Pour reponn kestyon Onorab, sa restriksyon i pa total. Sa dimoun i kapab ganny en lanplwa. Son restriksyon i zis lo bann lenstitisyon ki Labank Santral i annan sipervizyon.

So pour 6 mwan i napa drwa annan en lanplwa, en langazman avek en lenstitisyon ki Labank Santral i sipervize. Lezot landrwa dan lekonomi i kapab ganny en travay.

MR SPEAKER

Mersi Gouverner. Mon ti a sipoze i annan plizyer ka kot en lenstitisyon i fer en regilasyon lo limit travay en dimoun ki anba son kontrol. So mon sipoze sa ka i ase ... Onorab Georges, ou pwen?

HON BERNARD GEORGES

Mersi. Be efektivman Mr Chair. Sa se en *clause* parey Gouverner eksplike ki i limit.

Son limit i kourt. Me i annan en kantite lezot lenstans nou apel sa bann *restraint of trade clause*.

Bann *restraint of trade clause* se dan tou Kontra Lanplwa, kot ou pe al travay pour en lenstitisyon oubyen pour en lakonpanyen kot i annan en serten *trade secret*.

Par egzanp, ou napa drwa pour en peryod letan, apre ki ou'n kite pour al travay an konpetisyon avek sa landrwa kot ou fek sorti.

Akoz sansan ou pour pran tou son biznes ou pour anmenn avek ou. Sa i pa ilegal, i en keksoz ki toutafe normal e toutafe legal pour prezerv lenstitisyon kot ou travay kont en konpetisyon ler ou, ou'n fini aprann son bann fason fer.

E se pour sa rezon ki dan sa ka sa i ganny restrikte zis pour bann lenstitisyon ki tonm anba sipervizyon labank. Ou kapab travay dan lezot sektè. E mon pa vwar ki al an kont Drwa Travay, anba lartik 35. Mersi.

MR SPEAKER

Mersi. Onorab Pillay, ou kapab termin avek en pwen. Me nou pe *move on*.

HON SEBASTIEN PILLAY

Mersi Mr Chairman. Mr Chairman, lefe ki Onorab

Georges pa vwar, pa vèdir ki i kapab napa. So nou pa kapab *go according* ki sa ki Onorab Georges i dir nou.

Konstitisyon i dir ek nou koumsa, poudir, "*subject to such restriction that are necessary in a democratic society*". Ou, ou pe fer li kler pou dir sa dimoun pa kapab travay dan en sektè ki li i kalifye.

Akoz ler ou'n dir ou pe rod li, ou pe rod li ki i kalifye dan sa sektè. Ou'n fini dir li i kalifye dan sa sektè. Prezan i dir ou, 35(d) i dir ou, "*subject to such restriction that are necessary in a democratic society, to protect effectively the right of a citizen to earn a dignified living in a freely chosen occupation, profession or trade;*" *freely chosen*.

MR SPEAKER

Thank you. Mersi. Onorab...

MR SPEAKER

Onorab Pillay, byen...

HON SEBASTIEN PILLAY

...Mr Speaker, mon pe koze, mon pa ganny drwa koze dan Lasanble?

MR SPEAKER

Wi. Ou annan drwa koze. Me selman mon'n fer kler poudir ler ou lev en pwen si ou napa en

amannman, nou pran li koman en *matter for clarification*.

E ler in ganny klarifye, nou bezwen *move on*, nou pa kapab antre - ou pe antre ankore dan en deba avek *panel*.

HON SEBASTIEN PILLAY

Mr Chairman, *with all due respect*, mon pa le al dan en largiman avek ou...

MR SPEAKER

Wi.

HON SEBASTIEN PILLAY

...*but it seems*, ki nou annan en problem pou nou kapab klarifye keksoz ek *panel* ek bann *panel* ki vini. Kan bann *panel* i *hard and fast* lo bann keksoz ki zot pe dir.

Nou, nou bezwen montre zot sa.

MR SPEAKER

Wi.

HON SEBASTIEN PILLAY

Ou konnen, yer ou'n ganny ou en Minis ki dir nou, nou annan en Polisi pou bann dimoun alfer politik dan lekol, *which is not the case*. So, nou bezwen, nou bezwen met keksoz dan sa pei Mr Speaker.

MR SPEAKER

Wi. *Alright*, ou ti'n devret *raise* sa pwen yer. I bon. Mon krwar leksplikasyon in ganny donner. Alor nou pour *move on*. Mersi. Onorab Hoareau?

HON JOHN HOAREAU

Mers i Mr Chair. Mr Chair, nou'n ariv aprezan lo paz 15. Anba 7A(1). I annan en definisyon ki'n ganny donner pour en "*high judicial officer*". Akoz si nou pour get pli ba. Dan (3)(a) dan sa Tribinal i pour annan *not less than three people, not more than five*, e ladan pour annan enn ki pour bezwen en "*high judicial officer*". Alor nou'n bezwen donn en definisyon anler pour sa, "*high judicial officer*" ki i vedir.

E dan nou refleksyon nou'n met li a en nivo Ziz. Akoz ki mannyer i ti'n ganny ekrir oparavan, ti bezwen en Ziz ki'n *retire, or something similar to that position*. Me selman ki nou'n mete, nou'n aranz li dan en fason ki en dimoun menm si i pa en Ziz i kapab *qualified*. Me selman si i annan sa kantite leksperyans.

Alor i lir koumsa. "*In this section, 'high judicial office means a person who has held or is qualified to hold the post of a judge of the Supreme Court or Justice of Appeal or such similar position*".

Aprè nou al pli ba lo (3)(a).
i dir, “*The tribunal shall —*

(a) consist of not less than three and not more than five persons – and not more than five persons one of whom has - (sorry) – “one of whom is a high judicial officer or is an attorney-at-law with more than seven years of experience.”

MR SPEAKER

One second, Onorab Pillay, ou pwen?

HON SEBASTIEN PILLAY

Mersi Mr Chairman. Mr Chairman, anba *clause* (2), i dir ler Prezidan i santi poudir relasyon ek sa ki nou pe fer la - vedir ler Prezidan i santi poudir Gouverner, Depite Gouverner oubyen en *non-executive director*, i pa *fit* pour *hold* en lofis – son lofis ankor, annakor ek seksyon 7 Lalwa. i apwent en Tribinal. I pa dir nou ki tes ki Prezidan i bezwen pase avan i apwent sa Tribinal li. Prezidan i zis kapab apwent sa Tribinal.

Now, mon problemm avek sa se ki kouraman mannyer i ete, se ki Lalwa mannyer ekrir ozordi, i defini klerman ki sa bann lofans ki sa dimoun in kapab in fer. E i dir ou ler sa bann dimoun in fer sa bann lofans i ganny mete deor, baze

lo lefe ki in war ki'n komet sa bann lofans.

Minis pe dir nou poudir sa dimoun in ganny war in komet sa lofans, en Tribinal i ganny apwente pour al *investigate* sa. E *still* ler sa Tribinal in fini ganny apwente, pour *investigate*, Prezidan i *still*, pa bezwen swiv desizyon sa Tribinal.

So ki mannyer nou, nou kapab krwar par egzanp dan sa konteks ler i pe dir en *attorney-at-law* par egzanp, si Prezidan i deside apwent Onorab Georges lo sa Tribinal, eski nou krwar poudir nou pour ganny en *fair hearing* avek Onorab Georges?

Mr Speaker – *who is* - Avoka Prezidan li menm li Mr Speaker?

(Interruptions)

MR SPEAKER

Mersi. *Order, please!*

HON SEBASTIEN PILLAY

But it's the truth Mr Speaker. Nou annan en problemm.

(Interruptions)

MR SPEAKER

Order please! Order! Ok, Onorab Pillay ou'n lev sa pwen ki'n ganny longman adrese yer, mon bezwen dir. Selman mon

bezwen *point out*, i bezwen annan en nivo *trust*, konfyans ki Prezidan pour fer son desizyon dapre Lalwa, dapre lord. Sansan li ki pour soufer lakonsekans.

E la sa *clause* i dir, "*it appears, whenever it appears to the President.*" - *President* i bezwen fer son zizman. So ou'n lev ou pwen, mon a permet *panel* adrese si zot annan en repons. Minis, wi.

MINISTER NAADIR HASSAN

Mersi Mr Chair. Mr Chair, mon'n adres sa keston. Mon'n eksplike, mon pa krwar i annan okenn lezot keksoz pour azoute.

Panel i santi sa ki'n ganny met an plas i en fason transparan, i en fason ki annan *fairness*. E i annan ase mekanizm kontrol ki anpes okenn labi arive. So *panel* i konfortab avek....

MR SPEAKER

Ok, mersi. So *short of an amendment*. Nou pour *move on* nou lo sa *clause*. Ou annan en lot pwen - Nou pa pe al lo sa *clause*. Ou annan en lot pwen Onorab Pillay? Yes?

HON SEBASTIEN PILLAY

Mr Speaker, anba 7(e) an Lalwa aktyel i dir, si en dimoun in ganny *convicted of a felony*

following dishonesty whether in Seychelles or elsewhere, sa dimoun in ganny *convicted* li. In ganny *convicted*.

MR SPEAKER

Wi.

HON SEBASTIEN PILLAY

So eski nou pe dir poudir en dimoun ki'n ganny *convicted*, nou pour *still convene* en Tribunal dan son ka?

MR SPEAKER

Nou'n fini avek sa pwen. Onorab Hoareau.

HON SEBASTIEN PILLAY

Ou war problemm. Nou pa toleran pour nou ek ou pour nou war...

MR SPEAKER

Mersi.

HON SEBASTIEN PILLAY

...lot kote problemm ki nou pe kree.

MR SPEAKER

Onorab Pillay nou'n pas lo sa pwen. Tou leksplikasyon in ganny donner. I napa en amannman pour *deal* avek okenn pwen ladan. So nou a kontinyen Onorab Hoareau?

HON JOHN HOAREAU

Mersi Mr Chair. Mr Chair, nou kontinyen avek (b) lo apre sa. Lo (3)(b), ki lir koumsa, *“be presided over by a person who is the high judicial officer, or the attorney-at-law referred to in paragraph (a).* Prezan nou pe al lo paz 16.

MR SPEAKER

One second. Onorab Georges, ou pwen?

HON BERNARD GEORGES

Mersi Mr Chair. Mr Chair, anba sa seksyon sa ki'n arive la anba (b), se ki in ganny presize ki sa dimoun ki pour *preside* lo sa Tribinal, se sa dimoun ki'n ganny apwente *as a high judicial officer or attorney-at-law.*

Donk se sa dimoun spesifik. E se pour sa rezon ki zot in mete dan sa lamannman, *“person who is the high judicial officer or the attorney-at-law.”* Akoz se sa dimoun spesifik ki'n ganny apwente anba 3(a).

Me pour konplet sa mon krwar ki nou bezwen dan son premye laliny met, *“be presided over by the person who is the high judicial officer or the attorney-at-law”.*

Alor sa *“(a)”* li osi mon krwar nou devret presize e sanz li pour vin en lartik defini, *“the”*. Mersi.

MR SPEAKER

Mersi. *Panel* Manm ou annan en komanter, wi?

HON SEBASTIEN PILLAY

Wi, Mr Chairman. Mon pa krwar i dan menm laliny. Me selman mon ti a kontan Minis i klarifye. Anler nou'n dir poudir *amongst* bann dimoun i annan sa *high judicial officer or a sa attorney-at-law.*

Me anba mon krwar sa i pwen ki pe ganny *raised*, nou fer kler poudir i pour ganny *presided over*, par sa *judicial officer* ou *attorney-at-law* ki *include* sa bann lezot dimoun.

Savedir nou bezwen dir anba, *“be presided over by the person who is the high judicial officer”*, rather than sa. Mon krwar se sa ki li i pe dir...

MR SPEAKER

Wi, absoliman...

HON SEBASTIEN PILLAY

Me solman mon ti a kontan ganny en konpran Mr Chairman, eski sa i normal pour nou dir poudir i pour konpoze of sa bann dimoun, me se sa *judicial officer* ki li ki pour *preside over* sa *tribunal*? E zot pa pour elekte zot *Chairperson* parey dan lezot konteks? Petet

nou ti a kontan konpran akoz sa.

MR SPEAKER

Mersi. Eski *panel* i santi sa i annord? Minis?

MINISTER NAADIR HASSAN

Mersi Mr Chair. Wi, Onorab *this is exactly* sa *clause*. Me dan sa *panel* ki'n ganny met an plas, se enn ou lot dan sa de dimoun ki pour – zot be *the only one* ki kapab *preside the tribunal*. So *it is intentional*.

MR SPEAKER

Thank you. Mon krwar *amendment* Onorab Georges i *straight forward*. I kler. *I mean linguistically* i fer plis sans. So Onorab Hoareau kontinyen.

HON JOHN HOAREAU

Mersi Mr Chair. Nou al lo paz 16. Prezan *amendment of section 9* lo *sub (4)* anba, *(c)(4)* e apre sa mo, “*quorum*” lo trwazyenm laliny nou'n retir, “*or*”.

Prezan nou al lo paz 17. Kot i dir, kot *clause 13* – anba *clause 13*. I annan *9A(1)(b)* nou komans avek, “*of whom*”.

Nou pour al aprezan lo paz 20.

MR SPEAKER

Wi, *sorry*. Onorab Pillay, wi? Onorab Georges in lev lanmen. *Well, go ahead*, sed ou la presedans. Mersi. Ale wi, *go ahead*.

HON SEBASTIEN PILLAY

Mersi. Mon ganny presedans, *thank you*. Mon pa oule fer sa - Mr Chairman, mon ti a kontan ki nou klarifye, nou pe kree diferan Komite *within the ambit of Central Bank*.

E nou vwar anba kot *Nomination and Remuneration Committee* anba 20, nou pe dir zot pour ganny peye *such fees*. Eski tou sa bann Komite ki sa bann dimoun pour lo la *within* labank zot pour ganny peye en *fee*? Pour perform zot louvraz ladan?

MR SPEAKER

Panel?

HON SEBASTIEN PILLAY

So *which means* ki saler *package* en dimoun travay labank i kontinyen *inflate* baze lo lakantite Komite? Eski sa pa kree en kondisyon, kot nou annan tro bokou Komite? E *operationally* sa ki *IMF* ti pe koz lo *internal expense* labank, i pa *increase internal expense of the bank rather than reduce it*? So *clarify* Mr Chairman. Mersi.

MR SPEAKER

Ok. Gouverner? I ava adrese.

GOVERNOR OF CENTRAL BANK CAROLINE ABEL

Si ou koz lo bann Komite ki avek *Board, Board* i zis ganny zis en *fee* e zot pa ganny lezot *fee* si zot lo en sou-*Committee Board*. So, i annan zis en *Board fee* ki kouber bann Komite. Sel Komite ki ganny, ki pour reminerasyon se sa *Nomination Committee*.

E li i ganny peye par *sitting*. Pa en *monthly fee*. E sa Komite ki pour Tribinal, li osi pour parey. Mersi.

MR SPEAKER

Onorab Georges, pwen.

HON BERNARD GEORGES

Mr Chair, mwan mon annan en pwen, *very minor*, mon ti pe demande ki lo paz 17 apre (d), (6)(d) anler nou separ sa sou *clause* avek sa *heading insertion of new 9A* ki vini apre. Mersi.

MR SPEAKER

Ok. Onorab Hoareau, ou a kontinyen.

HON JOHN HOAREAU

Mersi Mr Chair. Nou aprezan lo paz 20. Anba *subsection 4*. "*Members of the Nomination and Remuneration Committee shall*

be paid such fee as may be determined by the Board and shall be an expense incurred" nou'n ti sa mo "*borne*", nou'n met sa mo "*incurred*" by the bank.

Anba sou seksyon 5, apre "*offence*" lo katriyenm laliny i annan en *full stop*. E nou retir, "*which makes the person unfit to discharge his or her responsibilities*".

Mon al aprezan lo paz 21 seksyon 11(1). Katriyenm laliny *after the word, "performance of"* nou'n retir, "*their*" nou'n met "*his or her*" duties.

Subsection (a) ki sivre, "*for purposes of the performance of their*" nou'n retir "*their*", nou'n met "*his or her duties*" ankor i kontinyen. Apre enn pti pe pli devan *after the word "of"* nou'n retir ankor "*their*", nou'n met "*his or her powers under this Act*" ensidswit.

Nou al lo *subsection 2*. Enn pti pe pli devan ankor. "*Any person who contravenes subsection (1) commits an offence and is liable on conviction to a fine of Level 4 on the Standard Scale or to imprisonment for 1 year*". "*one*" i ekri ankor *as a in words instead figures*.

Prezan nou al lo *amendment of section 14*, nou lo menm paz menm anba 14(1),

Rupees 50 milyon -550 milyon sa “SC” in ganny tire devan. So i “R” capital “R” 550 million as it is in the principal Act.

MR SPEAKER

Thank you. Onorab Cosgrow, ou annan en pwen?

HON WALLACE COSGROW

Mersi Mr Speaker. Mr Speaker, ler nou lo sa seksyon 14 la, petet si zot kapab klersi enn pti pe lo kote sa 550 milyon. Mon konnen anba i dir *over a period of 10 years*, me solman si zot kapab klersi lo sa R550 milyon sa *authorized capital* konbyen ti ete? *And why* bouz sa kantite e pour ki rezon sa *authorized capital* pour bezwen mont sa kantite?

MR SPEAKER

Mersi. Gouverner?

GOVERNOR OF CENTRAL BANK CAROLINE ABEL

Mersi Onorab. Mersi Mr Chair, pour keston. Lo la i baze lo devlopman ekonomik. E bann aksyon ki Labank Santral i bezwen fer.

Si nou regard Lalwa ozordi, Lalwa i dir nou *authorized capital* of Labank Santral i R1 milyon. So nou

kapab mazine R1 milyon depi ler Lalwa ti ganny met an plas.

E in annan en kantite devlopman dan lekonomi e sa kalkilasyon ki ganny fer tou le lannen ki balans nou liv. Pour lemoman nou ariv 231 milyon.

E en parti ladan ler ti annan Reform Ekonomik 2008, *IMF* ti rekomannde ki Labank Santral i ganny *recapitalised*. E ti annan en porsyon larzan ki Gouvernman ti bezwen mete, pour nou kapab *proceed* avek reform, akoz lontan nou ti napa *monetary policy*.

Nou pa ti retir likidite dan sistenm. Nou ti aktyelman mete. E la i tro bokou nou bezwen retire. Nou ti napa rezerv vreman. Ozordi nou bezwen akimil rezerv e ler ou akimil rezerv avek en to lesanz ki flote, i annan bann konsekans finansyel pour Labank Santral.

E pli sa rezerv i vin pli gro, pli risk pour Labank Santral i ogmante. E ozordi nou annan \$741 milyon, ou kapab mazine ler i annan en sanzman dan to lesanz ki sa i vedir pour Labank Santral.

E dan sa bann dernyen lannen ki nou pe fer nou, nou'n met en plas en sistenm kot nou *stress* nou pozisyon finansyel. Nou regard tou sa bann

paramet, Polisi ki nou bezwen fer, bann sok ki kapab arive.

E anvi ki nou ti pe fer sa *stress test*, en pe pli sofistike, la kot lannen pase nou ti apros *IMF* anvi ki zot annan en pe en pe lekspertiz pli o ki pour nou, pour ed nou pour amelyor sa sistenm ki nou annan.

E ler zot ti fer sa legzersis ansanm ek nou, zot in war poudir kot nou'n arive ozordi, nou bezwen R550 milyon pour soutenir nou, pour nou kapab fer nou louvraz. Si nou napa nou annan en sok mazer ki pli for ki *COVID*, Labank pour dan difikilte pour li kapab ed lekonomi parey i devret.

So ler nou'n ganny sa sif, apre sa legzersis, mon ti annan en konversasyon ek Minis finans aköz nou, nou konnen poudir koman *shareholder* Labank Santral, Gouvernman pour li kapab met sa larzan *either* i bezwen pran dan son Bidze. Vedir i pran reveni *taxpayers*, oubyen i bezwen fer det. E dan tou lede ka an se moman i difisil pour Gouvernman.

Akoz nou osi Labank Santral nou bezwen realiz lenplikasyon fiskal ki en logmantasyon kapital Labank Santral i vedir. E nou'n get bann *stress* ki bann lezot Labank Santral in fer fas avek

dan letan *COVID*. En kantite Labank Santral in war zot dan difikilte aköz zot kapital i fay.

So baze lo sa *proposal* ki *IMF* ti mete, *IMF* ti dir Gouvernman kan Lalwa i ganny aprouve Gouvernman i bezwen met sa larzan deswit.

Be Gouvernman met sa larzan deswit, si i pour la, i pa kapab tir dan Bidze aköz i bezwen vi dan Lasanble pour li vin demann sa. *Even* sa det ou bezwen vin devan Lasanble, poudir i bezwen al *raise* det pour li *raise capital*.

So pour nou pa met presyon, lo sityasyon fiskal, nou'n agree poudir dan en peryod 10 an i pour pli fezab. E sanmenm sa an plis ki sa realite kot Gouvernman i ganny 10 an, ki nou osi propoze ki olye ki Labank Santral i donn *dividends* 50poursan ler nou fer profi, ki nou retenir san poursan pour ed nou *build* sa *capital* pli vit.

E ler sa kapital in ariv en nivo akseptab, la dan en lannen si Labank Santral i fer profi, Gouvernman i kapab ganny 100 poursan *dividend*. So, sa i formil ki nou'n ariv avek pour soutenab tou le de kote.

MR SPEAKER

Mersi Gouverner pour leksplikasyon. Onorab Pillay.

HON SEBASTIEN PILLAY

Mersi. *Quick question* Mr Speaker. Me si ou'n dir nou poudir Gouvernman i annan sa problem, konbyen det Gouvernman i annan ozordi, oubyen ki'n prete ek Labank Santral *currently*? Ou annan en *figure* pour nou?

MR SPEAKER

Gouverner?

GOVERNOR OF CENTRAL BANK CAROLINE ABEL

Mersi Onorab. Dernyen fwa ki Gouvernman in pret larzan ti an 2021 dan letan *COVID*. Parey zot a rapel ler nou ti vin dan Lasanble, pour nou fer serten sanzman dan nou Lalwa pour ede avek *COVID*, Labank Santral ti deside 2020, an Mars 2020, pour li ogmant limit ki i donn davans Gouvernman. E la nou ti ogmant li pour vin R500 milyon.

E sa ti sa limit ki Gouvernman ti prete an 2021, akoz sityasyon ti difisil. Apre sa Gouvernman pa ankor pret larzan. Ziskan la Gouvernman pa ankor pret larzan.

Mon kontan ou'n demann sa kestyon, akoz resaman nou'n war dan medya poudir Gouvernman in depans sa limit

R250 milyon ki la an se moman *Central Bank* in aprouve.

I annan en sours lenformasyon ki dimoun i kapab war si Gouvernman pe pret larzan avek Labank Santral. Tou le mwan dapre Lalwa, Labank Santral i sipoze pibliy son pozisyon finansyel dan Gazet.

E i annan en laliny dan sa pozisyon finansyel ki apel "Davans ki nou donn Gouvernman". E zot pour war poudir tou le mwan i zero. So an se moman depi Zanvyé 2021, Gouvernman pa ankor pret larzan avek Labank Santral. Mersi.

MR SPEAKER

Mersi Gouverner. Bon, avek sa leksplikasyon mersi Gouverner. E Onorab Hoareau ou a kontinyen.

HON JOHN HOAREAU

Mersi Mr Chair. Mr Chair, nou lo menm paz 14(2) trwazyenm laliny nou retir "10" *in figures* nou met li *in words* ankor. Menm zafer lo paz 22(b), *subsection (b)* apre sa mo "last every 10 years" so ankor nou pe tir 10 years *in figures* nou pe met li *in words*.

Mr Speaker, aprezan nou al lo paz 24, 24 anba *amendment of section 16*, so i

vin 18 (c), sorry (b) so avan dernyen laliny i dir *“distributed to the general reserve until”* nou'n include the word *“the statutory capital reaches 10 percent of its monetary liabilities”* ok.

Aprezan nou al anba *amendment of section 18* anba 19 senkyenm laliny *after the word “it”* nou'n include *“or has been”* apre *after the word “or”* lo sizyenm laliny nou'n include *“suffered”*.

Nou al aprezan lo paz 26 Mr Speaker, *amendment of section 24* anba *subsection 24(1)(b)*, sorry *24(2)(b)*, par lenstriksyon ki nou'n gannyen nou pou bezwen *include- retir* lo dezyenm laliny *after the word “a”* - *“50 percent of a”* nou retir en 's' avek *‘note’s’* sa *“s’* so i reste *‘note’ or ‘coins’* prezan la i vin en *‘s’* *after the word coin* ki mon pa konnen si tou dimoun i annan sa pti bout akoz i en *new insertion*.

So i pou lir koumsa; *“at its discretion, grant compensation in whole or in part if more than 50 per cent of a note or coin’s surface”*, konpran mwan? Ok.

Nou al aprezan lo paz 27 anba *24(a)(3)* prezan i komans avek *“any person”* instead of *“a person”* *“any person who contravenes”* nou retir sa mo

“breaches any provision of this section” so nou'n include *“any provisions of”*.

Nou al anba 29 lo menm paz anba *subsection 29(3)(a)* e la i lir koumsa *the interest rate chargeable* nou retir sa mo *being* nou met *“which shall not be”* nou'n include sa mo *“be”* after the word *“not”* lower than *the monetary policy rate*.

MR SPEAKER

Thank you. Onorab Pillay, ou ti annan en pwen?

HON SEBASTIEN PILLAY

Yes, Mr Chairman. Mr Chairman, sa *amendment of section 29* la i pe fer provizyon pou labank *grant bann loans or advances or discounts to a solvent bank*. E la nou pe koz bann Labank Komersyal isi ki yer Minis e bann Manm in eksprim bann konsern lo *KYS*, eksetera.

I annan detrwa *clause* ki dil ek sa la pou le moman, ki zot pe koz lo menm ler i annan serten difikilte zot kapab *provide emergency funds* pou li, full stop and new sentence lo ki baz ki zot determinen pou zot *provide* - la nou pe koz en *loan* - ki zot determinen pou zot *provide* sa *loan* e ki mannyer nou konnen dan sa *clause* ki mannyer zot pou determin sa?

Rezon mon demann sa Mr Chairman, se akoz sa bann labank i pey zot bann *Chief Executive*, zot bann dimoun ki o plase bokou larzan. E si en labank apre i *fail* Labank Santral ki bezwen *bail li out*, pou *bail li out* pou protez bann kliyan. Ou pa *bail li out* pou asire ki zot kontinyen donn zot lekore bann gro saler, so *I think this is what* mon ti oule ganny en konpran Mr Chairman.

MR SPEAKER

Panel, en leksplikasyon? Gouverner? *Sorry*, Minis, wi?

MINISTER NAADIR HASSAN

Mersi Mr Chair. Onorab, i bon ou fer sa distenksyon ant 2 sityasyon ki en labank i war li ladan, e enn se *insolvency*. *Insolvency* esansyelman ki i *mean* se ki sa labank napa ase byen pou li *meet* tou son bann lobligasyon ki i annan, so *i insolvent*. ok?

Me en lot sityasyon ki en labank i kapab war li ladan, se en sityasyon likidite? *Ok?* Savedir i ankor *solvent* li, me i kapab annan en problem likidite, *ok?* E normalman en problem likidite i en *short term problem*.

So Labank Santral i annan plizyer lenstriman ki i kapab ed labank dan sa bann sityasyon,

me pou li ed labank i bezwen *ascertain* poudir ki sa labank i ankor *solvent*. Labank Santral pa kapab ed en labank ki *insolvent*. I pou *only* ed en labank ki annan *temporarily liquidity problem*, setou.

E i annan bann diferan parey mon pe dir, i annan bann diferan lenstriman ki pou ede ladan. So sa i anpes en *short term liquidity problem* kapab enpakte en labank e *eventually* vin en *insolvency problem*, ok?

So i annan bann kriter strik, bann kriter spesifik ki i bezwen zwenn pou li kapab ganny sa bann lasistans. Mersi.

MR SPEAKER

Mersi. Mersi pou ou lesplikasyon Minis. Onorab Hoareau, nou a kontinyen.

HON JOHN HOAREAU

Mersi Mr Chair. Nou kontinyen lo menm paz vedit 27, anba *amendments of section 29(a) i subsection 29(a)(2) so; "notwithstanding the repeal of this section any loans advances or rediscounts issued in accordance with section 29(a) immediately prior to the effective date of"* la nou'n retir "*this amendment*" nou'n met "*the Central Bank of Seychelles Amendment Act 2024*".

Ok, ler ou pe gete sa mo “Act” avek 2024 i ansanm so nou pe demann pou osi donn en *space in between*.

Nou al aprezan lo paz 29 *subsection (3)*.

MR SPEAKER

Ale, mon a pran komanter Onorab Pillay premye.

HON SEBASTIEN PILLAY

Mersi Mr Chairman. Mr Chairman, pou benefis piblik la deor, nou Lasanble nou pe vot lo en Lalwa kot dan sirkonstans kot en labank ou dir i-

Par egzanp mwan mon travay mwan, me mon napa larzan la lafen di mwan par egzanp pou mwan aste en keksoz, so mon al kot *Welfare* pou mwan ganny en larzan, ou bezwen *apply*, mon pas bann prosedir parfwa i difisil; swa mon al rod en *loan* kot en labank pou mon aste en lot keksoz.

Nou pa pe blanm *Welfare* nou pa pe met sa la, nou pe koz lo en endividi nou, *right?* Akoz nou pe konpar en labank ek en endividi zis pou nou kapab etabli byen sa largiman ki Minis - selman nou pe koz en *emergency* i napa likidite, napa likidite se ki ou napa larzan. *Correct?*

MR SPEAKER

Sorry, Onorab eski ou pe retourn lo sa pwen?

HON SEBASTIEN PILLAY

Non, non, non, Mr Chairman. I en *clause* ki nou pe pas lo la, la.

MR SPEAKER

Non, non, non, non, *hold on* en pti kou, mon pe demann ou si ou pe retourn lo sa pwen ki nou'n fini dil avek?

HON SEBASTIEN PILLAY

Non, non, Mr Chairman.

MR SPEAKER

En nouvo pwen. *Ok, it sounds like it is.*

HON SEBASTIEN PILLAY

La i an relasyon ek *emergencies, emergency liquidity* ki bezwen ganny *provided to a bank*, ki bezwen sa *emergency liquidity* e dan sa *clause* i dir poudir sa bann lentere lo sa ki ganny *provided*, i kapab - i bezwen ganny determinen, i bezwen plis ki sa i zot in donn lo komansman.

Kestyon ki mon pe demann Gouverner, se ki nou sitwayen normal le nou al kot en labank nou lentere zanmen i dan favorab pou nou, *ok?*

So mon ti a kontan konpran ki mannyer *Central*

Bank li i gage lenterere, aköz mwan koman en Manm Lasanble nou pe vot lo sa, so zis sa Mr Chairman, mon krwar Gouverner i konnen kot mon pe ale avek sa.

So whether ou en labank ki li i pa pe donn kliyan lenterere lo son deposit, i fer li difisil pou ou ganny en loan nou'n koz lo KYC, me zour i dan problem likidite i solvent li, Labank Santral i kapab ed li lo larzan ki nou, nou'n anmase koman en pei - so I want to make sure sa i right. That's it.

MR SPEAKER

Mersi. *Ok*, petet Gouverner i konpran pli byen ki mwan ki relevans. Gouverner?

GOVERNOR OF CENTRAL BANK CAROLINE ABEL

Mersi Mr Chairman. Si nou pe fer sa analozi ant labank ek endividi, mon a dir ki ler nou pret larzan labank dan sa 2 sirkonstans kot realite i pa en difikilte, ozordi nou pou sarz li poursan 3.5poursan. Si *overnight* kot nou dir *short term liquidity needs*, i pou ganny sarze 3.5poursan.

Si i dan difikilte ekstra kot stabilite finansyel pei i kapab pe ganny afekte, sa lenterere i plis ki sa e sa i pou depan kote Polisi Monneter i ete.

Ozordi Polisi Monneter lenterere i 1.75 poursan. So si en labank ti dan difikilte ekstra, posibleman i ti pou annan en 5poursan an plis ki i ti pou peye lo sa 1.75poursan. E ozordi si en labank i annan likidite ekstra ki met kot nou *overnight*, i ganny zis 0.25poursan sa i bann lenterere.

E sa bann lenformasyon aktyelman nou pibliye lo ou *website* e sak fwa Labank Santral i fer son Polisi desizyon tou le 3 mwan, nou pibliy sa bann lenterere pou a laporte piblik.

MR SPEAKER

Mersi. Bon, fotespere nou'n terminen avek sa pwen. Onorab Hoareau ou ti'n ariv lo - *carry on*.

HON JOHN HOAREAU

Nou lo paz 29 Mr Speaker. *And* nou pe koz lo seksyon 29(b)(3). Trwazyenm laliny *after the word 'Minister'* nou'n *insert 'responsible for finance'*. E nou'n retir *'of'*.

MR SPEAKER

En moman Onorab Georges. Onorab Georges ou annan en pwen?

HON BERNARD GEORGES

Mersi Mr Chair. Wi, mon annan en kestyon, ler nou met Minister *responsible for finance* mon krwar *finance* i pran en pti ‘f’ e ler nou met Minister of *Finance, finance* i pran en *capital F*, mon zis met sa lo latab pou bann ki pou redir sa Lalwa finalman pou zot *make it as appropriate*. Mersi.

MR SPEAKER

Mersi. *Panel* bann *legal draftsperson* pa annan okenn obzeksyon lo la? Nou a kontinyen Onorab Hoareau.

HON JOHN HOAREAU

Mersi Mr Chair. Mr Chair, nou lo *subsection 4(b)* trwazyenm laliny nou'n *include the word "that", "so ensure that the bank"*.

Prezan nou kontinyen lo paz 31 anba *amendments of section 32* partou kot i annan ‘SCR’ devan *Rupees* devan en sonm pou *Rupees* nou'n retir sa ‘SC’ akoz dan son *Principal Act* i servi ‘R’.

So anba *amendment of section 32, 29* trwazyenm laliny nou'n retir sa ‘SC’ nou'n kit li ‘R’ e osi anba *amendments to section 33 so 30 section 30*, trwazyenm laliny nou'n retir ‘SC’ nou'n kit ‘R’ e aprezan nou al lo...

MR SPEAKER

Yes, Onorab Pillay, ki pwen?

HON SEBASTIEN PILLAY

Mersi Mr Chairman. *Advances to Government*, la nou pe fer provizyon pou en lamannman ki an relasyon avek rol Labank Santral, i pou kapab *provide temporary advances to the Government*.

Eski sa bann davans ki *provide to* Gouvernman *to subject to being tabled before The National Assembly?* Or eski i pou vin dan domenn piblik, pou nou konnen natir sa bann davans ki Gouvernman pe pran avek Labank Santral? Mersi Mr Chairman.

MR SPEAKER

Thank you. Gouverner?

GOVERNOR OF CENTRAL BANK CAROLINE ABEL

Mersi Mr Chair. Mersi Onorab. Parey nou fer ozordi ler *Board* i deside tou le lannen, kantite - *what is going to be the limit* pou davans ki Gouvernman i kapab prete avek *Central Bank*, nou pibliy dan Gazet.

MR SPEAKER

Thank you. Onorab Hoareau?

HON JOHN HOAREAU

Mersi. Mr Chair, nou *still* lo paz 31 anba *amendments of section 40* nou lo *clause 40(1)* trwazyenm laliny *after the word ‘conditions’* nou'n *include “as are determined by the bank”* ensidswit.

Prezan nou al lo paz 32 ankor anba *subsection 4* nou'n retir ‘6’ *in figures* nou'n met li “six” *in words*.

Anba *40(a)(1)(b)* ankor “*for the period of not more than 1 year*” nou'n retir ‘1’ *in figure* nou'n met li *in word*.

Mr Speaker, nou lo paz 35 aprezan. Anba *amendments of section 46*, so nou lo *subsection 3* lo paz 35 “*the internal audit division shall be*” nou'n retir sa mo “*under*” nou'n met “*headed by*”, “*the head of internal audit*”. Apre anba...

MR SPEAKER

Ou annan en...?

HON BERNARD GEORGES

Mersi Mr Chair. Mr Chair, mon pa tro kontan “*headed by the head*” mon krwar- *I think we can do better* e malerezman mon pa kapab mazin en meyer mo, kekfwa Minis. Mersi.

MR SPEAKER

Minis?

MINISTER NAADIR HASSAN

Mersi Mr Chair. Mon ti pe mazin en mo parey petet *oversee, overseen* ti ava aplikab? Mersi.

HON BERNARD GEORGES

...“*shall be overseen by*”, *instead of “shall be headed by”*. Mersi.

MR SPEAKER

Manm i satisfé? Nou a pran sa koman en *minor amendment*. Yes, ok Onorab Hoareau ou kapab kontinyen kot ou ti'n arive.

HON JOHN HOAREAU

Ok mersi. So anba *section 4 subsection 4(c)* trwazyenm laliny; - ‘or’ nou'n retir ‘*enters*’ nou'n met “*has entered*”.

Apre ‘d’ i sivre i lir koumsa, “*has not been convicted of a felony involving dishonesty or any other similar offence*” apre nou retir sa trwa laliny ki reste “*which makes him or her unfit to be the head of the internal audit wherever in Seychelles or elsewhere*” sa i ganny retire.

Nou al aprezan lo *subsection 5* dezyenm laliny kot *after the word ‘bank’* nou'n retir ‘*who*’ nou'n met “*and*” – “*and shall carry*”.

Prezan nou al lo paz 36. Anba *subsection 6(c)* i lir

koumsa, “has been convicted of a felony involving dishonesty or any other similar offence.” Ankor nou’n retir “which makes a person unfit to be head of internal audit” so sa in ganny retire i kontinyen “whether in Seychelles or elsewhere”

Aprè nou al lo (d) “has not performed” nou'n retir ‘their’ e nou'n met “his or her duties”.

Mr Speaker, nou al lo paz 37 anba *administrative penalties* seksyon 48(a), so nou al lo *subsection 5, sorry 3* avan, 3 kot nou'n retir lo dezyenm laliny aprè *the word ‘SCR’* pou *Rupees* nou'n kit li koman ‘R’.

Subsection 5, “the Gouverner shall provide include the bank Credit Union or” aprè i kontinyen “*person with opportunity to be head, to be heard if*” prezan nou'n met “*so requested*” aprè i kontinyen.

Anba subsection b(5)(b)...

MR SPEAKER

One moment. Wi, Onorab Pillay, ki pwen?

HON SEBASTIEN PILLAY

Mersi Mr Chairman. Mon ti oule zis demann Gouverner pou klarifye sa dimoun ki drwa en *administrative penalty* sa *penalty* i ganny kontinyen konsidere koman *money owe to the bank* e ou'n dir la poudir at

5 i ganny provided with opportunities to be heard if requested cancel the *administrative penalty*.

So si ou'n dir poudir *it’s money owed to the bank*, eski Gouverner i annan drwa fer sa desizyon oubyen se *Board*, because the bank is the *Board*, so how can the Governor cancel the *administrative penalty* unless it is the *Board* that cancels the *penalty*. Sa ki mon ti a kontan klarifye Mr Chair.

MR SPEAKER

Gouverner i ava adrese.

GOVERNOR OF CENTRAL BANK CAROLINE ABEL

Mersi Mr Chair. Mersi Onorab pou ou kestyon. Se *Board*, akoz ki mannyer nou, nou setup ki mannyer nou pe evolye, se ki si i annan en *appeal* se *the non-executive members of the Board* pou pran desizyon. Si i annan en *appeal*.

HON SEBASTIEN PILLAY

So Mr Chairman, eski nou pou bezwen *reword 5 as it is now?*

MR SPEAKER

Eski okenn *wording* i nesesser? Napa okenn amannman ki'n ganny propoze. Onorab Pillay oule kontinyen ou pwen?

HON SEBASTIEN PILLAY

Wi, Mr Chairman. Mon'n *raise* en pwen e in ganny aksepte poudir i en - mon pa konnen si in ganny aksepte *or not*, sa ki mon pe dir se ki nou'n dir anler poudir sa penalti i larzan ki *owed to the bank, so if its money owed to the bank, then it is only the Board* ki kapab fer desizyon *in regards to* larzan i *owed to the bank*.

Now, eski nou pe dir poudir Gouverner i annan sa pouvwar pou li *cancel* en *penalty owed to the bank without going to the Board? If it is the Board that cancels the penalty, then the clause has to say it's the Board rather than the Governor*. Akoz nou'n dir boner poudir bann *non-executive directors* an relasyon avek en *appeal* se dan sa konteks ki nou pou dil avek sa.

MR SPEAKER

Well, si oule propoz en *simple amendment* mon krwar sa ki ou pe dir se ki *"the Board may"* - eski sa i neserer *panel?* Gouverner, Onorab Georges, oule adres sa premye?

HON BERNARD GEORGES

Napa en amannman Mr Speaker. E mon pou - pou benefis piblik mon ava fer dimoun rapel ki Onorab Pillay

zanmen i propoz en amannman, zis i lev en pwen apre i kit sa avek nou parey i pe fer la.

Napa en lamannman, me zis avan ki in propoz en lamannman si i ti dan son lespri propoz en lamannman mon ti ava demann li lir 48(a) an antye, akoz nou pa kapab zis regard 5 *in isolation*. Akoz i komans avek si Gouverner i satisfè ki in annan en mankman, la i ava donn en loportinite pou en dimoun ganny ekoute, i ava *apply* en *administrative penalty*.

Alor si li ki *apply* se li ki bezwen annan drwa retire - ou pa kapab anvoy sa lo en lot lenstitisyon. Mersi.

MR SPEAKER

Panel, mon pe envit zot komanter. Antretan wi, nou a ekout Onorab Pillay, wi.

HON SEBASTIEN PILLAY

Mersi Mr Chairman. Mr Chairman, mon pa pou ensilte mon koleg parey in fer avek mwan.

Si li i ti'n lir Lalwa e pa pe get Lalwa zis koman en, *sorry* la en *better word* en *rubber stamp*, i ti a realize poudir dan sa mo provizyon in dir poudir sa larzan ki *owned by* en *administrative penalty, is*

money owed to the bank. The bank is not the Governor, the bank is the Board.

It's the Board headed by the Governor. So mon- I'm only asking a legitimate question, eski Gouverner i annan drwa cancel e administrative penalty? Se sa ki mon pe sey...

MR SPEAKER

Be Gouverner in adrese sa li, Minis oule azoute?

MINISTER NAADIR HASSAN

Mersi Mr Chair. Mon pou pas laparol avek Gouverner apre pou mon final. Me solman mwan manner mon pe konpran li, *the Governor is the Chair of the Board ok, e the Board i kapab delegate lotorite lo certain matters to the Governor.*

E ler mon pe get *the issue of an administrative fine*, mwan dan mon lopinyon personnel la mon pa krwar sa i devret *the Board*, mon krwar sa i devret avek *management of the Central Bank*. E avek sa si Gouverner in pran en desizyon baze lo bann kriter ki mete pou *impose en administrative fine* e sa *hearing* i ganny fer, *its only fair* - pou mwan- *its only logical* ki se Gouverner ki kapab *overturn* sa desizyon.

Mwan mon war li koumsa, be kekfw Gouverner i war li o en lot fason - mon pa konnen mon pas laparol ek li.

MR SPEAKER

Les Gouverner donn son lopinyon pou nou kapab *move on*. Antretan mon pa konnen si mon kapab met en lopinyon koman en senp observer, koman en obzervater.

I annan *Board, the Governor is Chairman of the Board, the Governor is also responsible to the Board* pou swiv sa diskresyon ki *Board* i fer; *if it says the Governor may cancel then it means* ki Gouverner pou pran sa desizyon an konsiltasyon avek son *Board*; desizyon i bezwen sorti kot son *Board*.

Sa i en lopinyon mon kapab dir manner mon kapab dir sa, koman en *public person*. Si dernyen wi Onorab, nou a fer li dernyen.

HON SEBASTIEN PILLAY

Dernyen keksoz. Mr Chair, mwan mon konsernen koman en lezislater, mon persepsyon en *Lalwa Central Bank* mwan, i se ki *debt which is owed to the Central Bank*, pa kapab ganny kennsel *on the basis of one person deciding* e *Lalwa* i bezwen kler dan son desizyon.

48(c) - 48(c) i dir ou koumsa poudir en *administrative penalty under this Act is a debt owed to the bank*. Be si i en det ki *owed to the Central Bank*, i bezwen kler dan Lalwa poudir i annan en striktir ki fer desizyon. Mon dakor ek tousala - ti pou napa problem si sa *administrative fine wasn't a debt owed to the Bank*.

Sa mon problem se ki nou pe dir si i annan en det ki *owed to the Bank*, nou'n dir sa boner poudir en det se *Board* ki dil avek. So mon pe zis demann sa kestyon.

MR SPEAKER

So, Gouverner. Eski ou annan en komanter? Yes.

GOVERNOR OF CENTRAL BANK CAROLINE ABEL

Mersi Mr Chair. Nou'n ekout sa bann diferan largiman e pran kont proses ki nou fer dan *Central Bank*. E si loportinite i egziste, nou pe propoz tir dan sa *clause* tir Gouverner met labank. I a ed nou administrativman pou fer *the process*.

MR SPEAKER

Sorry, Gouverner ou kapab repet sa dernyen bout silvouple ki ou pe propoze?

GOVERNOR OF CENTRAL BANK CAROLINE ABEL

Dan sa *clause* kot sa *clause* 5 kot i dir *the Governor* nou ranplas *Governor by bank*.

MR SPEAKER

Be, so ou pe dir *the bank meaning the bank shall provide the bank*. I pa annan en ? Konmsi en pe *awkward* sa.

GOVERNOR OF CENTRAL BANK CAROLINE ABEL

Wi, akoz la Mr Chair *the bank* ki mon'n mansyonnen i *Central Bank unless* ki nou anvi met *Central Bank in full*.

MR SPEAKER

Ok, *Central Bank* dan sa ka, wi. Yes Onorab Georges?

HON BERNARD GEORGES

Mersi Mr Chair, mon konpran Gouverner. *Be the problem is* sa i pou soulev en lot kestyon.

So ler ou dir *the bank*, lekel dan labank ki annan pouvwar pou *waive* sa *administrative penalty*? *That's the issue, it's always got to be an individual*, se pour sa rezon ki sa *clause* annantye i *Governor*. *Governor* i bezwen deside si i annan en kontravansyon anba 48(a)(1).

Governor i ava si i vwar ki i annan en rezon, i ava donn - i ava *apply* en *administrative penalty*. Si i annan en *appeal* anba 5 i ava *provide* en loportinite. Se Gouverner ki pou fer sa e se Gouverner ki pou kennsel.

So it's Governor, Governor, Governor, si nou pou sorti dan sa laliny i pou poz en problem, aköz nou pa pou konnen lekel ki kapab fer sa *suspension*. Mersi.

MR SPEAKER

Ok, bon i napa okenn propozisyon pou *amendment* eksepte ki sa enn ki Gouverner in fer e nou war son *awkwardness* la so dan sa ka nou a zis kontinyen.

Onorab, ou ti'n dir mwan taler poudir sa ti ou dernyen pwen, so i ou dernyen pwen, mersi. Onorab Hoareau nou a kontinyen.

HON SEBASTIEN PILLAY

Mersi Mr Chair. Mr Chair, mon oule zis met lo rikord, ler en polisye - ler en dimoun anvil i donn ou en *fine* kot ou'n *park*, *right* sa dimoun ki donn ou sa *fine* - i met R1000 lo ou loto, pa li ki tire sa *fine*. Mon pe zis met sa lo rikord Mr Chairman.

MR SPEAKER

Wi ou'n- Onorab Hoareau ou a kontinyen silvouple.

HON JOHN HOAREAU

Mersi Mr Chair. Mr Chair, nou kontinyen avek *subsection 5(b)* kot i lir koumsa;-

"confirm the administrative penalty in which the case it shall become" nou'n retir en 's' avek 'become' e nou'n *include* 'shall' avan 'become'.

Mr Speaker, mon krwar sa ti dernyen lamannman ki mon vwar lo *the list of amendments* ki nou'n propoze lo sa *Bill*. Alors nou pou termin la pou sa bann lamannman. Mersi.

MR SPEAKER

Thank you. Well, Manm a vot lo sa bann amannman. Dan *Third Reading* - nou a pas dan Staz Lasanble pou nou pran Mosyon pou *Third Reading*.

Onorab Georges mon krwar *you are the person in charge of the Bill*.

HON BERNARD GEORGES

Yes, Mr Speaker. Mr Speaker, mon annan plezir anba *Order 76(1)* pou *move* ki *the Central Bank of Seychelles (Amendment) Bill 2024 as amended* i ganny lir en Trwazyenm Fwa. Mersi.

MR SPEAKER

Mersi. Nou a ganny segonde?
Onorab Sandy Arissol.

HON SANDY ARISSOL

Mersi Mr Speaker. Bonzour Mr Speaker, Minis ek ou 2 lekip, tou Manm Lasanble Nasyonal, dimoun ki pe ekout nou. Mosyon i ganny segonde. Mersi.

MR SPEAKER

Mersi. Manm a vot lo *Bill* pou *Third Reading*, Manm ki an faver lev lanmen silvouple? Manm ki kont?

Lo Formal Third Reading for the Central Bank of Seychelles (Amendment) Bill 2024 as amended; - 20 manm in vot pour, 0 kont e 9 in abstain. Bill in aprouve devan Lasanble e Madanm Clerk a fer Third Reading.

MADAM CLERK

Mersi Mr Speaker. *This Act may be cited Central Bank of Seychelles (Amendment) Act, 2024.* Mersi Mr Speaker.

MR SPEAKER

Mersi. Avek sa *the Bill is passed*. Mon bezwen remersye Minis ek son delegasyon. Gouverner e bann zofisye pou zot bann partisipasyon e mersi bann manm pou zot kontribisyon.

Nou ava termin la lo sa *Bill* e nou'n donn parol en lot Minis pou en lot *Bill* ki lo nou *Order Paper* pou 11er. Alor nou pou ganny en *break* en pti pe pli long ki labitid, nou ava *adjourn* e- nou ava pran poz plito ziska 11 er. Mersi.

(BREAK)

MR SPEAKER

Salut tout le monde ankor. Nou pare pou pran nou dezyenm *Bill* e madanm Raporter i ava apel Minis ek son delegasyon.

Bonzour e byenveni Minis Flavien Joubert, Minis pou Lagrikiltir, Sanzman Klima e Lanvironnman. E bonzour e byenveni Mr Denis Matatiken Sekreter Prensipal pou Lanvironnman, Mr Rodney Quatre Direkter Zeneral pou *Biodiversity Conservation Division*, Ms Sharon Gerry *Senior Legal Officer* dan sa Minister, Mr Victor Hill, *Assistant Principal Legal Draftsperson* dan *Attorney General's Office*.

Mersi pou zot prezans pou nou travay lo *Wild Animal and Birds Protection. (Amendment) Bill, 2024* korek? En pti fot lo mon papye.

Mon ava envit Mosyon pou *Second Reading*. Onorab Sandy Arissol.

HON SANDY ARISSOL

Mersi Mr Speaker. Bonzour Minis Lanvironnman avek ou lekip bonzour tou dimoun ankor enn fwa. Mr Speaker, anba *Order 69(2)* mon oule *move* ki *Bill Wild Animal and Birds Protections (Amendment) Bill 2024 (Bill No 14 of 2024)* i ganny lir en Dezyenm Fwa. Mersi.

MR SPEAKER

Mersi, mon a ganny segonnman pou Mosyon? Onorab Henrie.

HON GERVAIS HENRIE

Motion seconded Mr Speaker.

MR SPEAKER

Mersi. Mon apel Minis pou fer son prezantasyon *Bill*.

MINISTER FLAVIEN JOUBERT

Mersi Mr Speaker. Bonzour Mr Speaker. Bonzour bann Manm Lasanble e osi bonzour tou bann dimoun ki pe ekout nou ozordi bomaten.

Mr Speaker, mersi pou permet mwan pou vin isi dan Lasanble pou prezant lamannman dan Lalwa *Wild Animal and Birds Protection Act, 1961*. Sa lamannman i annan pou fer avek en sanzman dan seksyon ki konsern bann

penalti ki dernyen fwa ti ganny amande ti an 2001.

Gouvernman pe propoze ki sa sanzman ki en sanzman avek lanmann i ganny fer, pou sorti en sonm *minimum* R5000 e en *maximum* R500 mil pou aprezan vin en lanmann ki son *minimum* i R25 mil e son *maximum* i R1 milyon.

Term lanprizonnman ki al avek sa bann lofans pe osi ganny amande, pou sorti pa plis ki 2 an pou vin pa plis ki 7 an. Mr Speaker, i bon note ki Gouvernman in war li neserer pou revwar sa seksyon ki konsern bann penalti, pou asir proteksyon bann lespes tel parey tortidmer, tortidter ek bann zwazo ek lezot lespes ankor.

Dapre nou rikord e osi bann konplent ki nou'n resevwar, i annan plizyer dimoun ki pe kontinyen komet sa bann lofans ilegal anba sa Lalwa, enkli nou a fer remarke bann etranze par egzanp bann ki pe sey pran torti ek lezar, e rezon pou sa e ki bann sanksyon i ankor tro ba konpare avek rannman ki zot kapab gannyen atraver bann pratik ilegal letan zot atrap sa bann lespes.

An rezilta sa, dimoun pe kontinyen touy torti, lezot lespes e pe kontinyen pran sa

bann lespes pou anmenn dan lezot pei. Nou Minister Mr Speaker, nou fortman kondann sa bann aksyon e nou pe fer tou nou posib pou nou kontinyen pran aksyon avek bann ki fer sa bann kalite lofans dan pei.

Mr Speaker, sa propozisyon pou amann sa Lalwa, i anliny avek bann lamannman ki'n ganny fer resaman dan bann Lalwa ki relye avek sa enn; tel parey kokodmer, tel parey Lalwa *Trade of Wild Flora and Fona Act, 2021*. E osi tel parey bann nouvo lamannman ki pe ganny fer ouswa bann nouvo provizyon ki pe ganny fer anba Lalwa Lapes.

Sa bann tel sanksyon parey in ganny mete dan sa bann lezot Lalwa osi, i enportan pou dekouraz dimoun pou kontinyen fer sa bann pratik ilegal, alor dimoun i ava mazin 2 fwa avan ki zot komet en tel lofans.

Nou'n osi, atraver nou evalyasyon get en pe bann lezot pei, e nou'n vwar ki sa bann sonm ki nou pe propoze anba Lalwa Sesel, i pa tro lwen. Parfwa i egzakte man parey avek bann sanksyon ki egziste dan bann lezot Lalwa dan bann lezot pei.

E nou krwar sa osi i a fer ki bann dimoun pa ava war

Sesel koman en landrwa ki Lalwa i pli feb, ki zot kapab vini profite, fer bann aksyon e ki zot ava gay en sanksyon ki bokou pli ba ki dan serten lezot pei.

Mr Speaker, mon asire ki i annan bann ki pe demande akoz ki nou pa reviz sa Lalwa annantye. Minister in deza komans antreprann en tel prosedir; bann diferan parti prenan in ganny konsilte e en versyon Lalwa tre avanse in ganny prodwir.

En tel prosedir i pran en kantite letan e alor nou war li i neser pou antretan amannman sa seksyon penalti koman en mezir imedyat, ziska ki nouvo revizyon i ava ganny finalize e i ava ganny prezante devan Lasanble. Mersi Mr Speaker.

MR SPEAKER

Mersi Minis, pou ou prezantasyon. Lasal i ava prezan ouver pou deba lo *Bill* e Onorab John Hoareau wi, ou kapab komanse.

HON JOHN HOAREAU

Mersi Mr Speaker. Bonzour Minis avek ou lekip. Bonzour tou dimoun a lekout ankor enn fwa. Mr Speaker, sa Lalwa ki'n ganny fer an 1961 orizinalman dan *principal Act* en Lalwa ki si oule, i pe anpes annan en

dezekilibre dan biodiversite e osi dan nou ekosistenm.

Akoz mon pe dir sa, set akoz sa Lalwa li menm i *tackle* bann lespes ki viv natirelman, bann zwazo e bann zannimo ki viv natirelman dan nou labita. E parey nou konnen nou menm, okenn sa bann zannimo ki viv natirelman dan nou labita, i annan en rezon akoz zot la. E i parey en gran lasenn avek bokou mayon e ler ou tir enn sa mayon ladan ou kas sa lasenn antye.

So nou leko sistenm i en pti pe parey sa, setadir ki ler ou tir en lespes ki annan en serten fonksyon dan lanatir, ou pe dezekilibre lanatir annantye.

Alors sa Lalwa an plis ki sa penalti ki pe ogmante, i al bokou pli lwen. I al sitan lwen ki kot i pe prezerv sa biodiversite sa labita natirel ki annan.

Mon oule fer osi le pwen ki an 1961 ler sa Lalwa ti ganny fer, ti pran kont petet serten laspe sosyal, serten laspe natirel Sesel an vi ki sa bann lepok ti napa bokou avyon ki ti - *well* ti napa avyon ki ti pas byen, byen so avyon ti vin apre '72.

Me annefe ti napa bokou bato ki ti frekant nou teritwar pou anmenn manze, pou anmenn *protein* pou nou

nasyon e ti napa osi bokou aktivite agrikiltirel kot nou ti annan en baz *protein* ki nou eleve. I vedir atraver elevaz.

Alor serten lespes natirel ti ganny retire dan lanvironnman e ti ganny itilize koman sours *protein* pou nou pep. E ozordi a sa lepok petet parey nou dir poul ti manz zis Dimans, me ozordi nou kapab war sa bann keksoz bann sours *protein* ki *readily available* laboutik e en nenport keler ou kapab aste e menm annan de fwa i menm pli bon marse ki pwason.

Alor i nepli annan sa nesesite pou nou ozordi retir sa bann zannimo ki viv natirelman dan nou ekosistenm pou nou konsonmen.

Alor Mr Speaker, ler mon pe get sa Lalwa parey Minis in fer nou rapel poudir i ti revize an sa morso, sa pti bout lamannman ki in anmennen, ti'n ganny revize an 2001 me nou vwar *still* ki sa penalti pa ti pe akt koman en deteran, pou anpes dimoun fer sa bann aktivite, pou retir sa bann zannimo oubyen sa bann zwazo dan lanatir, pou zot deservi pou zot konsonmen.

Mr Speaker, avek sa logmantasyon sorti 5 mil pou ariv 25 mil *minimum* e sorti 500 mil maksimonm pou ariv 1 milyon i nesaser pou fer sir ki

sa Lalwa i akt vremen koman en deteran avek sa letan ki nou pe viv ladan.

Osi son *term of imprisonment* in sorti 2 an pou vin 7 an, i fer ki Lalwa Lanvironnman i pou vin en Lalwa ki pli performan, pli efektiv. Souvandfwa nou realize poudir dimoun pa tro - oubyen si oule Zidisyer li menm pa tro pran bon ka avek sa bann Lalwa Lanvironnman.

Annandler nou war zot *settle* pou *minimum penalties* pou bann keksoz ki annan dan lanvironnman e mwan mon krwar poudir- mon menm *advocate* petet i ti ava anmenn plis ki sa.

Akoz ler nou pe gete, nou annan en sel lanvironnman ki nou viv ladan e nou labaz lekonomi i baze lo touris e touris i pey sepa konbyen larzan pou li vin Sesel, pou li vin get sa lanvironnman ki *pristine* ki ankor natirel e pou li osi kapab *être* dan sa lanatir, vin par sa lanatir, pou ganny sa leksperyans lanatir. E si nou pe aprezan retir sa bann keksoz dan sa lanvironnman ki permet sa leksperyans arive, mon krwar byen ki touris pa pou vini Sesel.

E la nou war deza en dekalman, ki pou kapab arive dan nou lendistri touris si i pe

vin vwar en torti dizon, en tortidmer Sesel dan lanatir, vin *dive* pou li vin fer *scuba diving* pou li vin vwar en tortidmer, me ler i vini i pa war sa tortidmer.

Si nou pe dir koumsa poudir nou en sanpyon lanvironnman e ler touris pe vin Sesel, i pa pe war en reken oubyen i pa pe war en lespes ki nou, nou dir nou, nou pe sanpyonn lanvironnman, nou pe proteze, nou pe kit sa bann keksoz dan lanatir pou zot kapab annan sa leksperyans, alor touris pa pou vini Sesel.

Mon pe dir sa avek en lentere senser aköz mon krwar poudir sa lepok ki nou pe viv ladan, i en lepok kot nou bezwen pran konsyans tou sa bann keksoz e fer sir ki nou kit nou leta natirel *as much as possible* dan lafason ki i ete.

E annou fer sir ki Sesel i reste Sesel. I reste sa landrwa inik par de milye de mil - *thousands of miles* fer sir ki nou lanvironnman, nou leta natirel i reste sa landrwa ki ler tou dimoun ler i gete aletranze i dir, zot mon anvi vin sa landrwa mon anvi vin war lanatir - mon anvi vin war tou sa bann keksoz.

Mr Speaker, mon'n antann Minis in dir dan son prezantasyon poudir i en problem sirtou Vallée De Mai

kot bann lezar pe ganny vole e pe ganny vann lo nivo lo *eBay* - i vann a en pri kekfwá \$2000 an montan e sa i fer ki i poz en risk enorm pou sa lespes kokodmer ki viv, *well* ki ganny trouve natirelman en pe partou lo Sesel.

Ler mon pe dir sa mon pe dir aköz sa bann lezar li menm - parey mon'n eksplike - i zve en rol vreman enportan pou ed polinasyon bann kokodmer. E ler i pe rod sa zensek e osi nou konnen ki lezar ki kontan disik i rod en pti pe sa *nectar* e ler i pe pase i pe anmas sa bann keksoz lo fler kokodmer, i pe osi ede pou *pollinate* sa kokodmer.

E zis mazine si nou retir aprezan sa lezar ki pou arive avek kokodmer? En kalite plan ki pran sitan lontan pou li pouse pou ariv son matirite e son zerm son koko i osi pran sitan letan pou li matir.

Ler nou pe get son *life cycle* li menm, nou kapab konstata poudir si i arive ki nou retir sa bann lespes ki ede pou *pollinate* sa plan, nou pou kapab konstata poudir nou pe perdi nou lafore kokodmer ki egziste ozordizour. Alor i nesese pou annan bann Lalwa parey nou dir ki pli morde, ki pli performan.

Mr Speaker, nou vwar kokodmer li menm pa ankor fini

ganny etidye koman en lespes. Nou tande poudir i annan bokou valer atraver petet kosmetik pou fer keksoz pou lapo, i annan lesans ki ganny fer avek e i annan osi son *cognac* koman en *liquor* ki ganny fer avek labaz kokodmer. E osi nou konnen poudir son lannwa li menm i vann akout €250 ou plis par kilo.

So i en keksoz ki annan en valer pour nou pep koman pep Seselwa, en valer ekonomik e osi en valer natirel. Mr Speaker, pou fini mon ti a kontan ki Minis i gard son promes, pou li reviz sa Lalwa an antye sirtou an sa ki konsern sa zwazo ki apel fouke.

Nou konnen poudir i annan serten dimoun ki servi sa zwazo pou manze, me nou konnen poudir Lalwa dan li menm i annan en pti pe *loophole* lo sa kote e si Minis ti a promet nou pou anmenn en Lalwa osito posib pou kapab konble sa *loophole* ki annan lo kote sa lespes.

Parey mon'n dir, nou letan ki nou pe viv ladan e letan avan i konpletman diferan. Ozordi nou kapab annan lezot sours protein pou nou servi apard ki pou nou detrir nou prop lanatir. Alor Mr Speaker, avek sa mon ava remersye ou.

MR SPEAKER

Mersi Onorab. Mon a donn laparol Onorab Aglae.

HON EGBERT AGLAE

Mersi Mr Speaker. Mon a dir bonzour Minis ek ou *panel*, PS osi.

Mr Speaker, *Bill* ki la devan nou i annan en lenportans signifikan an vi ki nou pe koz lo sa gran biodiversite *Fona* ek *Flora* ki Sesel i annan e ki osi en sours latraksyon pou nou touris.

Me an menm tan lentere pou nou lokal e osi bann dimoun parey bann konservasyonis, bann dimoun ki annan lentere avek lanvironnman e osi bann resers syantifik, akoz i annan bann lezot potansyel ki atase ek sa gran biodiversite ki nou pei i annan e lasyans in prouv tousala.

Avek tousala ki nou annan koman en aki, koman en pei nou osi annan en responsabilite koman en pei souvren, pou kapab anmenn bann proteksyon nesese kot nou war ki i kapab annan bann sours labi ki kapab arive avek nou bann aki.

E pou kapab ariv sa, nou bezwen annan bann lezislasyon ase azour e modern pou kapab anmenn bann proteksyon e osi

bann *deterrent*, ki pou anpese ki i annan sa bann kalite pratik negativ, ouswa pou nou rapel li dan en sans kot nou pe war bann diferan aksyon *poaching* ki arive e sa i pa zis Sesel.

E pour sa pou nou kapab anpes arive byensir bann morso lezislasyon, ki ava ganny *police* dan en fason avek bann departman konsernen, i kapab lapolis, i kapab lanvironnman, i kapab bann group *Wildlife* i kapab bann lezot NGOs ki pe donn lanmen avek sa travay pou anmenn konservasyon lo en pli o nivo.

E pour nou Mr Speaker, Sesel in akonpli en kantite, kot i konsern proteksyon nou lanvironnman dan son totalite. Nou'n fer sitan byen ki nou ganny rekonnèt dan lepase e ozordi lo nivo enternasyonal. E i bon konstate Mr Speaker, tou i pa ti komans zis koumsa. E mon'n fer en pe resers pou vwar dan lafason ki keksoz in komanse dan kot i konsern proteksyon nou lanvironnman.

E mwan mon en dimoun an partikilye ki annan en leker avek proteksyon mon lanvironnman e mon distrik i enn bann distrik osi ki'n met son mark kot i konsern proteksyon lanvironnman.

E an dizan sa Mr Speaker, sa ki mon'n remarke ki se ki

dan premye bann premye lannen 1900 Mr Speaker, kot premye mon kapab dir, ti annan en *Multilateral Treaty*, sa ti konvansyon pou prezervasyon bann *wild animal, bird* e sa letan zot ti enkli pwason tou ladan e sa ti ganny dedye pou kontinan sa bout Lafrik.

E a sa moman letan nou tou nou konnen, ti annan bann letan kolonizasyon e sa bann parti prenan ti bann pei mon kapab dir bann pei bokou bann pei Lerop ki ti zwenn ansanm *La France*, *Langleter*, bann pei kolonizater. Me i ti ganny difikilte pou vin anfans akoz plizyer pei pa ti raktifye sa Konvansyon dan li menm.

Me ti enportan en fwa komansman dan sa direksyon akoz dan sa Konvansyon li menm ti met dan bann *schedule* bann diferan form, ki ti pou anmenn bann proteksyon lo kot i konsern *wildlife, animals* avek *wild birds* parey in dir. E la zot ti site ki ti annan bann proibisyon kot ou ti napa drwa touye ouswa detri serten bann lespes.

Osi ti annan bann proibisyon pou ou akoz ti annan lasas sa bann letan, pou ou sas ouswa detri serten bann lespes sirtou bann ki ti ankor zenn zot ti apel sa dan bann

mothering stage - ti ase zenn e i ti ganny defann fer sa.

E osi zot ti al pli lwen ki zot ti donn serten leksepsyon pou annan serten fason ki ou kapab fer ou lasas ouswa detri lo en kantite, zot ti donn lo en *limited numbers* parey i dir an Angle.

Me osi zot ti anmenn dan sa Konvansyon osi la fason pou zot kapab met annord bann lespes ki *harmful*, ouswa ki kapab vin anvaisan, ki kapab detri osi bann lezot lespes ki dan sa konteks lanvironnman li menm. E sa ti en komansman dan *early* lannen 1900.

E osi avek bann lorganizasyon parey Nasyon-z-Ini zot osi zot ti dan en fason mon kapab dir moderniz sa ki sa konvansyon ti pe dir an alan Nou tou nou konnen nou bezwen evolye e se la kot i annan en lorganizasyon ki tonm anba *UN environment* sa *InforMEA - access to information* lo bann lagreman multilateral lanvironnman e sa ti konpri *Wild Birds and Animal Protections*, sa ti ganny fer apre an 1912.

E zot, zot ti met lanfaz lo bann *unlawful capture, kill*, touye, posesyon ouswa vann parey nou dir dan *trade* lo bann lespes, ki ti pe ganny konsidere koman proteze.

E nou Sesel nou form parti sa Konvansyon e ki nou ti form parti sa konvansyon li menm li e letan nou pe regard sa *mother Act* ki pe ganny amande ozordi in deza fer en lamannman serten parti ladan en 2003 mon krwar, me son *Act* orizinal ti an 1961.

E ler nou pe regard letan 63 an disi e mon'n tann Minis ki in dir dan son ladres ki i annan demann wi, akoz mon'n koz ek serten dimoun ki travay dan konservasyon, zot swete ki sa lamannman dan son totalite dan sa *Act* i ganny vin an fors, fini travay lo la osito posibil, pou zot kapab met azour lezot konponan ki annan dan bann lezot Konvansyon ki ava form parti e ki ava anmenn dan son totalite sa nivo konservasyon e osi son laspe resers syantifik ki i antase avek.

E bann lezot lentere, bann groupman ki annan i kapab enternasyonal, i kapab lokal pran an kont kwa ki kapab ganny fer, kwa ki pou ganny fer, kwa ki anpes ou ganny fer. Tousala.

So Sesel osi in enplimant li dan son parti responsabilite pou anmenn lo en nivo konservasyon e nou osi nou'n form parti e nou annan nou prop Polisi koman en pei kot i konsern konservasyon.

E la osi nou annan nou parey sa ki nou pe nou *Seychelles Protected Marine Plan* ki ganny gide avek en Polisi ki ti vin an fors depi 2013 - *Seychelles Protected Area Policy* ki osi pran kont bann proteksyon ki enportan pou nou lanvironnman, nou gran sours biodiversite ki nou, nou annan koman en pei. E sa i koz later e lanmer an menm tan.

Me eski sa i ase nou kapab dir? Si nou pou dir nou bezwen vin avek bann serten lamannman, ki ozordi i pou kapab servi sa bann penalti pou anpes ouswa anmenn en *deterrent*, nou vwar poudir zefor i merit pe kontinyan dan sa laliny. Akoz menm si nou kapab reviz sa bann tarif, i annan serten groupman, dimoun ki touzour pare pou pran risk pou kapab ganny sa bann lespes ki mon kapab dir ki enportan pou zot, akoz i annan en laspe ekonomik avek.

Minis, ou'n koz lo kokodmer, ou'n koz lo lezar, sa lezar la ki mon krwar bokousirtou Lazi i en gran demann ki kout en kantite larzan le *bronze gecko*. Nou *still* pe war poudir i annan bann pratik pou annan sa *trade* kontinyen sa i atraver *poaching* me sa ki enportan se ki nou, nou pa konnen akoz i pa sitan ganny anonse sa bann

letan sa bann pratik i arive, letan sa bann ak i ganny komet.

Nou ti a kontan osi konnen statistik ki kantite par lannen ki Lotorite i kapab atraver, *Custom* i kapab atraver *Border Control Unit* ki kantite nou pe detekte kot sa bann akt pe ganny fer? Lekel? Petet eski i annan Seselwa ki pe *aiding and abetting* dan fer sa kalite aktivite? Nou ti a kontan konnen koman en Lasanble osi, akoz nou annan en responsabilite.

E osi ki valer monneter ki zot pe mazine sa bann endividi pe gannyen avek sa kalite penalti ki nou pe anmennen osi ozordi? Eski i fer sans, eski i pa merit plis ankor?

E sirtou letan nou pe koz lo bann lespes ki *envoie de disparisyon* akoz letan i fini i fini nou pou napa i annan zis Sesel i andemik, ki kou sa i kapab anmennen, akoz nou annan en fitir zenerasyon ki merit ganny edike lo kwa ki nou annan koman en pei. I ava vin en sours lenspirasyon pou bann ki pe aspire pou pran bann karyer dan domenn resers syantifik, syantifik osi.

Akoz nou pa ti a kontan demen nou vin parey en Moris ki'n perdi son Dodo. Akoz zenerasyon Morisyen i war Dodo lo portre lo triko lo bann

keksoz ki'n ganny agrave. Bokou pa pou konnen mwan ler mwan mon pa pou konnen ki mannyer i ti ete.

So i enportan pou nou kapab anmenn sa bann kalite laspe konservasyon, an menm tan avek son Lalwa pou kapab anpese ki bann fitir bann lespes i ganny disparet.

So having said that Mr Speaker mon krwar Lalwa i merit i dan bon direksyon. E parey mon'n dir bann konservasyonnis isi Sesel sirtou bann ki en groupman, zot pe espere ki sa Lalwa li menm li dan son totalite sa *mother Act* i ganny revize, pou anmenn keksoz azour. Ki i a fer ki nou Sesel sa legzanp ki nou ete nou ava mont lo en pli o nivo, lo en lot staz ankor pou dir me vwala Sesel in doue, in anmenn sa ki i neserer e nou pe 100 pousan dan nou laspe konservasyon e proteksyon. Mersi Mr Speaker.

MR SPEAKER

Mersi Onorab. Onorab Philip Arissol ou annan laparol.

HON PHILIP ARISSOL

Mersi Mr Speaker. Mr Speaker, tou Manm Onorab. Minis avek ou tim e bann dimoun ki pe swiv nou, bonzour.

Mersi Mr Speaker, pou donn mwan laparol ozordi pou

mwan eksprim mon sipor solid pou sa lamannman ki pe ganny propoze dan Lalwa Proteksyon Zannimo Sovaz e Zwazo.

Lafason ki i ganny dekrir dan sa Prozedlwa 2014-2024, sa lamannman i reprezant en letap enportan dan nou zefor kontinyel pou protez biodiversite ris nou pei e osi protez nou zannimo sovaz e zwazo kont leksplwatasyon e dimal.

I reflekte nou valer koman en sosyete e nou langazman dan tretman etik tou *être* vivan.

Ler nou adopte sa lamannman e enpoz en sanksyon pli sever pou krim kont zannimo sovaz e zwazo, nou pe demontre nou devouman e nou pe demontre prensip konpasyon respe e zerans lanvironnman.

Nou annan responsabilite pou nou azir koman gardyen lemonn natirel, pou nou asire ki tou kreatir gro ou pti i ganny proteksyon ki zot merite. Sesel i ganny beni avek en divers lespes sovaz inik, ki kontribye dan labote e larises ekolojik nou pei.

Sepandan, leksplwatasyon ilegal, vole e trafik sa bann lespes presye, i reprezant en menas grav pou zot sirviv e zot byennet e osi

balans delika dan nou lanvironnman natirel.

Sanksyon aktyel anba Lalwa Proteksyon Zannimo Sovaz ek Zwazo ki egziste an se moman, pa ase pou dekouraz dimoun ki angaze dan sa bann pratik destriktif.

Ler nou reviz penalti pou enkli en lamannman ki pa mwens ki R25 mil e ki pa depas R1 milyon, osi byen ki en peryod maksimonm dan prizon 7 an nou pe anvoy en mesaz kler, ki krim kont lespes sovaz pou ganny rekonnet avek bann konsekans grav.

An plis lamannman dan proteksyon lespes sovaz ek zwazo, i anliny ek zefor enternasyonal pou konbat trafik lespes sovaz e komers ilegal dan lespes ki an danze.

Ler nou enpoz penalti pli sever lo sa bann ki kas Lalwa, nou pe anvoy en sinyal kler kominote global ki nou Sesel nou pran konservasyon lespes sovaz serye e nou angaze pou zwe en rol proaktif dan lalit kont trafik ilegal lespes sovaz.

Sa lamannman pou ranforsi nou repitasyon koman en manm responsab e konsyan dan kominote enternasyonal, dedye dan prezervasyon nou leritaz antik pou benefis tou dimoun.

Sa bann sanksyon ranforsi, pa senpleman vedir pini sa ki koupab, me plito azir konman en prevantif solid kont aktivite ilegal ki met nou lespes sovaz an danze e detrir nou labita natirel.

I enperatif pou nou pran en pozisyon ferm kont dimoun ki pe rod eksplwat nou resours natirel pou zot prop benefis e asire ki Lalwa i ganny respekte pou protez nou lanvironnman pou zenerasyon aktyel e zenerasyon ki pe vini.

Pandan ki nou pe fer tou zefor pou nou batir en lavenir dirab pou nou nasyon, i esansyel pou ou prioritez konservasyon nou resours natirel e proteksyon nou bann lespes sovaz.

Lamannman Lalwa Proteksyon Lespes Sovaz e Zwazo, i reprezant en moman esansyel dan nou zefor kolektiv pou protez nou lanvironnman e asir byennet tou lespes ki pou Sesel.

Annou sezi sa loportinite pou nou fer en lenpak dirab, pou nou debout lo kote drwat listwar e kit en leritaz konservasyon e biodiversite pou zenerasyon ki pe vini.

An plis ki sa, par ranforsi laplikasyon Lalwa Proteksyon Lespes Sovaz atraver sa lamannman, nou pe re afirm

nou langazman pou konservasyon e devlopman dirab.

Prezerv nou biodiversite i pa zis en obligasyon, en obligasyon moral, me osi en nesosite ekonomik aköz nou respir natirel i form fondasyon nou lendistri touris e i kontribye dan byennet nou kominote.

Mr Speaker, pou konklir mon demann tou Manm Lasanble pou siport lamannman *Wildlife and Birds Protection Bill*.

Annou ini dan defann nou bann lespes sovaz, nou lanvironnman e nou lavenir komen. Ansanm nou kapab fer en diferans enportan dan proteksyon e prezervasyon nou leritaz natirel. Mr Speaker, avek sa 2 mo mon a dir ou mersi.

MR SPEAKER

Mersi Onorab. Mon donn laparol Onorab Samynadin.

HON KELLY SAMYNADIN

Mersi Mr Speaker. Bonzour Minis ek *panel* ek tou dimoun a lekout. Mr Speaker, dapre *global assessment report* pou lannen 2029 apepre 1 milyon zannimo ek lepes plant i aktyelman an vwar disparisyon.

En ekosistenm ki an bonn sante i fer provizyon pou nou

loksizenn ki nou respire, provizyon manze, delo ek latizann, reglemant nou klima ensi ki fer provizyon bann benefis rekreatsyonnel.

Pou kapab konserv nou bann labita ek lespes, tou dimoun dan lasosyete i annan en rol pou zwenn ki swa lo en baz endividyel oubyen lo en konteks profesyonnel.

Nou tou nou bezwen redwir lefe ki nou annan lo nou ban ekosistem, par konsider ki mannyer nou aksyon i kapab afekte lanvironnman e sanz nou konportman pou minimiz bann konsekans negativ.

I responsabilite tou dimoun pou redwir lafason ki nou azir anver nou bann zannimo ek plant, ki byensir ki ganny trouve dan nou lanvironnman lo ki nou lendistri tourism i depan bokou lo la. I osi nou responsabilite pou redwir nou *carbon footprints* e osi aktivman partisip dan konservasyon nou bann plant avek lespes.

Mon pou profite pou felisit nou Gouvernman pou travay ki pe ganny fer, pou elimin lefe ki plastik ek balon ki annan lo nou lanvironnman, atraver *ban* lo zot lavant e lenportasyon.

E Mr Speaker, mon ti a kontan osi fer en mansyon spesyal pou *North Island Resort*

en zil e letablisman touristik ki mon'n ganny sans vizite, ki en *leader* an sa ki konsern konservasyon e prezervasyon leko sistenm, ensi ki nou bann lespes andemik.

North Island i fer bokou an sa ki konsern konservasyon bann torti zean e sa bann lespes i kapab ganny trouve partou lo sa zil, kot zot viv kot a kot avek imen dan en lespas kot zot pa an danze ganny eksplwate.

Sa zil i osi en galeri pou plizyer lezot zwazo e i osi en *breeding sanctuary* pou bann tortidmer, en leksperyans inoubliyab ki mon'n kapab eksperyanse lo sa zil. Mon profite pou felisit tou travayer k pe fer en travay ekstraordiner lo *North Island*, espesyalman bann *residing scientists* ki pe ede anver prezervasyon e konservasyon nou bann lespes ek plant lo sa zil.

Letid in sertifye ki prezans polisyon plastik i parmi bann pli gran lakoz deforestasyon, siny eksplwatasyon resours e sanzman klima ki ganny koze par imen e ki an retour enteronp bann leko sistenm emerzan.

Sesel koman en pti leta zil pa pe ganny eparnye avek lenpak ki bann gran pei endistriyalize i annan, an vi ki

nou leko sistenm i enn ki vreman frazil.

Se pour sa rezon Mr Speaker, ki mon pou vot an faver lamannman lo sa *Bill*, akoz mon krwar ki i ti'n plis ki ler ki pou annan en revizyon dan *fines minimum* e maksimonm lo konviksyon pou bann endividi ki *fail* atraver zot aksyon an sa ki konsern zot prezervasyon nou bann lespes plant ek zannimo.

Proteksyon nou ekosistenm i annan tou pou fer avek aksyon proteksyon prezervasyon ek restorasyon kont bann lefe advers aktivite imen e regilasyon e mwayen primordyal pou asire ki sa i kapab realize. Mersi Mr Speaker.

MR SPEAKER

Mersi Onorab. Mon donn laparol Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Bonzour Minis bonzour tou dimoun dan Lasanble e tou dimoun ki pe ekout nou.

Mr Speaker, Lalwa ki devan nou ozordi i enn ki vreman senp, en *Bill* ki vreman senp, ki pe propoz en lamannman dan penalti an sa ki konsern Lalwa *Wild Animals*

and *Bird Protection Act Cap 247* e sa *Bill* ki devan nou pe propoz en revizyon spesifik dan penalti an sa ki konsern bann aksyon ilegal ki ganny fer an relasyon avek bann *wild animals* e osi bann zwazo.

Mon panse Mr Speaker, si Gouvernman in war li neser pou annan en lamannman dan sa Lalwa an sa ki konsern penalti, mon panse ki i bezwen annan en sityasyon ki ase grav; i bezwen annan en lenstans ki ase grav ki'n pous Gouvernman ozordi pou anmenn en tel amannman dan Lalwa.

E parey mon koleg Onorab Aglae in dir nou, petet ti ava bon si Gouvernman, Minis-atraver Minis si zot kapab donn nou Lasanble Nasyonal en pti pe lenformasyon statistik lo ki kantite bann ka ki zot pe rikorde, kot bann dimoun pe komans provizyon sa Lalwa e ki bann, petet bann ka ki zot in nobou arete, bann ka ki zot in nobou prosekite pou anmenn Ankour e ki en pti pe bann rezilta an sa ki konsern sa bann Lalwa an partikilye.

An dizan sa Mr Speaker, parey nou tou nou konnen Sesel i annan li en biodiversite ki spesyal e ki signifikan e ki ladan i annan en kantite lespes zannimo e osi plant ki rar, ki andemik e ki trouve zis Sesel.

E sa biodiversite ozordi Mr Speaker, mon'n deza dir dan enn bann Lalwa ki nou ti pe koz lo la mon krwar pa tro lontan, ki i annan en kantite ki'n ganny fer pou nou ariv kot nou ete ozordi.

I annan en kantite ki'n ganny fer par Gouvernman presedan, kantite ki'n ganny fer par bokou bann dimoun ki bann *environmentalist* mon kapab dir, bann dimoun ki dan konservasyon, pa neserman dan Gouvernman, bokou bann dimoun ki travay dan bann lorganizasyon non gouvènmantal, bann NGOs ki annan pou fer avek lanvironnman.

So in donn zot en zefor, en travay kolaboratif ki'n ganny fer pou nou kapab protez *la flore e la faune* nou pei Sesel. I enportan Mr Speaker, ki i annan en proteksyon akòz sa biodiversite, sa lanvironnman ki nou annan ozordi. I enn nou pli gro aki an sa ki konsern nou devlopman ekonomik ouswa nou resours ekonomik.

E se sa nou biodiversite, se sa lanvironnman ki ozordi. Nou lendistri touris i preski dir depan lo la, *ok* nou pe sey diversifye en pe nou lendistri touris kot nou enkli lezot keksoz, me san nou lanvironnman mon pa krwar Mr

Speaker, ki nou pou ganny osi latansyon avek larestan lemonn an sa ki konsern *tourism* parey nou pe gannyen ozordi.

So i primordyal i enportan ki nou kontinyen protez nou lanvironnman, protez nou biodiversite, parske se sa ki ozordi i anmenn nou dipen, nou resours ekonomik pou nou kapab sirviv koman en pei. An gran mazorite nou annan lezot keksoz me selman an gran mazorite. So i enportan a tou pwen, a tou pri ki nou protez li.

E parey mon'n dir boner, Lalwa ki devan nou la i fer zisteman pei. Sa i ede dan proteksyon bann lespes ki ozordi swa pe ganny itilize dan en move fason ouswa pe ganny ilegalman itilize, pe ganny ilegalman retire dan bann ekosistenn dan bann lanvironnman kot zot ete menm, si Lalwa i dir ki poudir nou pa devret pe touye, konsonmen ou menm fer *trade* avek sa bann lespes.

En pti pe *reading* ki mon'n fer Mr Speaker, Sesel nou annan nou apepre 75 bann plan andemik. Nou annan nou bann zannimo, sirtou bann lezar, grenwir sa ki nou apel koulev, *snakes*, *zwazo*, serten *mammals* tou ki andemik pou Sesel.

E sa bann zannimo ouswa la plant, zot pa ganny trouve *anywhere else* dan lemonn e i enportan ki a tou pri nou konnen bann *custodians* sa bann lespes Sesel, Seselwa an zeneral a tou pri ki nou protez sa bann lespes pou ozordi, pou koman en resours ekonomik e me osi pou nou fitir zenerasyon ki pe vini.

I enportan pou- parey mon koleg ankor Onorab Aglae in dir, i enportan ki ankor dan bann deseni ki vini nou bann zenerasyon ki kapab war sa bann lespes e i kapab war sa bann lespes dan son bann leta natirel kot i ete.

E ki nou pa war nou dan bann sityasyon parey dan bokou pei, ki bann lespes zannimo, bann lespes laplant zot pe war selman lo portre ; zot pe war selman en desen parfwa pa ni menm en portre menm en desen parfwa lo ki mannyer sa keksoz i ete aköz in sitan ganny eksplwate, in sitan ganny retire dan son lanvironnman natirel, ki ozordi zenerasyon ozordi pa pe kapab vwar.

So Mr Speaker, mon krwar i enportan parey mon'n dir, ki Gouvernman bann parti prenan e pep an zeneral i kapab ganny konsyantize pou protez sa bann lespes e protez nou lanvironnman an zeneral.

E pou nou fer sa Mr Speaker, mon krwar enn bann keksoz ki mon pa ankor tann personn koz lo la, ki mon krwar i enportan ki nou koz lo la aköz malgre ki nou pou met serten provizyon dan Lalwa, kan i annan serten striktir, *framework* ki pou bezwen ganny met an plas ouswa ganny ranforsi pou fer ki sa bann provizyon Lalwa i ganny aplike.

Enn bann striktir Mr Speaker, se kan mannyer nou polis, ki mannyer nou polis e kan mannyer nou idantifye bann diferan lenstans kot dimoun pe fer sa bann aksyon ilegal.

Mon konnen par egzanz pandan bann sezon torti, i annan bann volonter, bann zofisye Minister Lanvironnman ki al fer bann vizit - pa vizit me selman bann patrol pou kapab patrol bann lans koman en *deterrent* pou bann dimoun – bann dimoun ki pe vin pran sa lespes lo lans partou.

Mon konnen i annan bann zofisye Lanvironnman bann zofisye - NGOs ki fer bann resers, ki fer en kantite bann *monitoring work* lo dan nou bann lafore, lo nou bann lans, dan lanmer e osi lo nou bann zil.

Me solman i enportan Mr Speaker, ki bann resours

adekwat i ganny mete dan sa bann domenn pou nou kapab fer plis travay *monitoring* e plis travay pou anpes dimoun fer sa bann aksyon ilegal.

Mon krwar i enportan ki anndan, anndan menm dan pei nou annan sa bann travay. Nou annan bann *enforcement officers* petet la mon pe mazin annan en *dedicated team of wildlife enforcement officers* ki zot zisteman fer zis sa Mr Speaker, ki ava ede ranforsi provizyon sa bann Lalwa.

Me osi lo kote *border control*, i enportan ki nou bann zofisye *Border Control* i kapab ganny byen *train*, byen ganny ekipe avek bann zouti nesese e osi bann *knowledge* nesese pou zot kapab idantifye, detekte bann lenstans par egzanp ler dimoun pe sorti avek bann lespes andemik Sesel.

Pa zis lespes andemik, me okenn zannimo, laplant ki trouve isi Sesel. E nou kapab idantifye sa bann lespes e nou kapab pran aksyon ek sa bann dimoun.

Mon konnen i annan en Konvansyon sa ki nou apel *Convention on the International Trade of Endangered Species (CITES)* ki fer serten provizyon ki manyer bann diferan *trade of sa bann flora and fauna* i kapab ganny fer, ki swa vivan

ouswa ki swa mor ouswa dan en lot laform.

I enportan ki nou ranforsi sa bann provizyon, sa Konvansyon, *train* nou bann *staff*, nou bann dimoun dan sa bann provizyon sa bann Konvansyon pou kapab annan plis kontrol lo nou *border*, me osi pou kapab annan plis sipervizyon lo bann lespes an zeneral *within* nou teritwar.

Dernyen Mr Speaker, mon krwar i osi enportan ki - mon konnen i annan dimoun ki dedye en kantite zot letan lo ledikasyon, ledikasyon lanvironnman, ledikasyon proteksyon nou biodiversite.

Si ou war ozordi i annan en serten group kategori zenn ki dir ou li i pa tous torti, i pa tous marswen e i menm reprimann son paran ki pe *engage* dan sa bann kalite *practice*, se aköz in annan ledikasyon dan bann leköl dan bann kominote konsern sa.

Me nou *still* ankor annan polisyon, en *segment* nou popilasyon ki ankor pe fer sa bann *practice*, ki ankor pe ilegalman al anmas dizef zwazo, ankor ilegalman pe touy torti, ankor ilegalman pe touy marswen, pe rod fouke.

So nou bezwen kontiny sa ledikasyon petet pa zis avek nou bann zenn, me avek sa

segman popilasyon ki ozordi zot *still* pa ankor konpran ki nou biodiversite i nou lor konmsi, i nou larzan ki ozordi pe permet nou viv sa standar lavi ki nou annan *in a big sense* konmsi; i nou bezwen kapab edik bann dimoun ki sa *behavior* ozordi 2024 dan sa Sesel kot nou ete, nou pa kapab annan sa kalite *behavior*.

So mon krwar sa bann *fines*, sa sanzman penalti i enn ki en *step* dan en direksyon kot nou devret pe ale. Mon ti annan serten kestyon lo sa lakantite ki'n ganny mete, be letan Minis in eksplike in dir ki i preski konparab avek serten bann pei par egzantp kot par egzantp dimoun pe *trade* sa bann lezar, torti *or* sa bann kalite lespes, aköz si kot nou son *fine* pa sitan o *then* zot pou kontinyen ini fer sa ki zot anvi e *with the hope* ki zot pa ganny atrape e si zot ganny atrape *it's peanuts* e zot kapab *get away* avek sa.

So mon *hope* ki sa *fine* parey Minis in dir, i pou enn ki pou en *deterrent*, si non mon sizere ki nou osi dan le fitir revwar ki si fodre ogmante, ogmante me selman *fines* i al avek zofisyè kot patrole, *border control*, lo nou lanmer, lo nou *airport* partou, lo nou Por e koumsa tou keksoz i a marye

ansanm e tou keksoz i ava mars pli byen.

So avek sa Mr Speaker, mon pou aret la, me selman mon krwar i en pa dan en direksyon kot nou devret pe ale ozordi Mr Speaker. Mersi.

MR SPEAKER

Mersi Onorab. Mon donn laparol Onorab Romain.

HON GEORGES ROMAIN

Mersi Mr Speaker. Minis bonzour ek ou *panel*. Mon pou siport sa lamannman dan Lalwa *Wild Animals and Bird Protection*, aköz sa bann revizyon dan pinisyon pour bann lofans ki pe ganny propoze, i esansyel pour ranforsi nou lankadremman pour proteksyon lanvironnman.

Ozordi Mr Speaker, bann lofans koman lapes ilegal, trafik bann lespes proteze parey torti, marswen e lespes zwazo, destriksyon labita natirel, i bann aksyon ki menas nou biodiversite e fer sir ki nou bezwen ogmant bann pinisyon pour protez nou lanvironnman.

Premyerman, sa lamannman i vize pour ogmant bann lanmann e term prizon, pour lofans ki konsern proteksyon sa bann lespes. Ozordi anba Lalwa, pinisyon aktyel i ant *minimum* R5000

ziska e *maximum* R500 mil. Me sa Mr Speaker, pa ase pour dekouraz sa bann tel lofans, ki ozordi nou vwar pe ogmante.

Konmela sa bann tel aksyon, i pli byen ganny organize e pe vin pli serye. Alor koman en fason pour dekouraz, dimoun fer sa bann tel lofans, lamannman pe revwar pour ogmant bann lanmann pour en *minimum* R25 mil a en *maximum* R1 milyon.

Ansanm avek en term prizon pa plis ki 7 an. Sa Mr Speaker, i a reflekte lenportans avek lekel nou bezwen tret sa bann lofans. Bann tel lofans i evolue en kantite e pe vin pli organize e konplike.

I annan en logmantasyon dan trafik ilegal bann lespes proteze. Souvandfwa ki ganny entersepte par nou bann zofisyè *Coast Guard*.

Koman en nasyon angaze dan konservasyon lanvironnman, i esansyel ki nou kad legal i anliny avek standar mondyal. Bokou pei in adopte bann pinisyon sever pour lofans lanvironnman, aköz zot rekonnèt lenpak profon ki sa bann lofans i annan lo biodiversite ek balans ekolojik.

Par adopte menm mezir, Sesel i alor reaffirm son langazman pour protez nou lavi, nou patrimwann natirel.

Nou bezwen osi mazine ki ranforsi pinisyon i zis enn parmi bann solisyon pour redwir sa bann lofans.

Nou osi bezwen annan sistenm efikas pour kontrol nou lafrontyer. E osi en sansibilizasyon piblik, pour konplemant sa bann sanzman Lezislativ i pour neserer.

Nou *wildlife* i en parti entegral, nou patrimwann nasyon e nou idantite. Protez li i pa zis en lobligasyon pour lanvironnman, me osi i en lobligasyon moral.

Sa lamannman ki'n propoze, i en fason pour montre klerman ki Sesel pa pour toler okenn aksyon ki menas son biodiversite. E i osi demontre nou devouman pou prezerv sa patrimwann pour nou fitir zenerasyon fitir.

Mr Speaker, i reflekte nou langazman pour protez bann lespes lanvironnman e asire ki bann ki menas nou lanvironnman i pour fer fas avek konsekans apropiye.

Minis, ou pour ganny tou mon sipor, lo sa lamannman sa *Bill*. Mersi Mr Speaker.

MR SPEAKER

Mersi Onorab. Nou donn laparol Onorab Porice.

HON DOYACE PORICE

Mersi Mr Speaker. Bonzour Minis ek ou delegasyon e tou mon bann koleg MNAs. Mr Speaker, mon pour anmennen mon sipor lo sa lamannman dan Lalwa *Wild Animal and Bird and Protective Act*, sirtou kot i konsern sa logmantasyon lo penalti. Akoz mon santi i annan en konsern lo nou zil e Zil Pros tou dernyerman. Lo nou zil i annan plizyer sa bann zannimo e zwazo ki viv natirelman e pe ganny proteze.

Me, in annan en pe sabotaz, sirtou dan Vallée Mai, dan nou Park Nasyonal Maren Curieuse e lo lezot zil kot i konsern dan lanmer e osi later. Dan Park Maren nou napa drwa lapas oubyen fer nenport kwa. Me serten nou bann Seselwa pa pe konpran sa byen, oubyen zot fer li par ekspre.

Mr Speaker, mon dir sa akoz souvandfwa travayer lo zil i rankontre bokou sa bann tel aktivite ilegal. Swa pour vann sa bann lespes, ouswa zot konsonmen dan fanmir.

San zot realize ki nou pe detri sa bann lespes ki touris i kontan admire, ouswa pour tir portre avek pour zot al montre dan zot fanmir, pour montre ki manner ki nou lanvironnman Sesel i zoli.

Si nou detri nou bann *wild animals* ek zwazo proteze, ek

letan nou pour vwar en rediksyon. E nou konn tre byen ki touris i nou dipen. E zot apresye bann landrwa prezervasyon parey nou pei Sesel. Zis parey nou Vallée De Mai, nou annan nou bann lespes parey gro lezar ver, nou kokodmer, nou bann plant andemik e nou zwazo Kato Nwanr.

Curieuse nou annan nou bann torti, plant andemik e lezot keksoz prezerve ki annan lo sa zil. Ki ganny okipe par bann travayer Park Maren ki ansarz par Mr Anto Suzette ek son lezot travayer. Nou bann travayer i fer sir, ki zot prezerve e anpes ganny detri.

Lenformasyon ki zot dir mwan, ki zot ganny en pe latet fermal ek serten imen ki vin detri, letan ki zot pa lo sit. E parfwa zot pa konnen lekel ki fer ki sa. Me tandis ki lo zil Curieuse, parfwa zot ganny sans atrape.

I montre nou ki zot pa pe respekte Lalwa, e petet Lalwa pa ti mord ase avan sa. Mr Speaker, pour mwan sa penalti ki'n ogmante, pour ed en pe atrape e kondann sa bann devaster lo nou zil, espesyalman zil Curieuse e Praslin.

E mon ti a kontan ki Lalwa i aplik senserman pour tou kous

popilasyon, sirtou lo nou zil kot serten pa pe anmenn sa respe anver nou prezervasyon. Menm si, logmantasyon sa *fine* pa pour retourn sa ki'n ganny detri, omwen i ava ede pour ranforsi mezir.

Mon pour kontinyen donn mon sipor bann *Wildlife Club* ki egziste lo nou lekol lo Praslin. Tou resaman zot ti fer en lamars. E mon ti fer mon mye pour partisip ansanm ek zot ek mon koleg *MNA Woodcock*, pour montre nou sipor anver sa bann klib.

E osi prezervasyon nou lanvironnman atraver Ms Shirley, kot zot ti pe montre plizyer lartik an ekrir, lo bann *board* kot i konsern prezervasyon nou *wild animal* ek zwazo.

Mr Speaker, mon pour donn mon sipor bann travayer dan Park Maren, kordinen par bann travayer solid. Mon pa bliy osi sipor pour tou travayer Vallée De Mai ek lanvironnman kot zot pe fer en bon travay lo kote proteksyon.

E mon osi anmenn tou mon sipor pour prezervasyon nou bann lespes ki annan valer lo nou bann zil. E siplyi avek tou zabitan nou zil, pour anmenn zot sipor zot osi pour ede dan sa prezervasyon.

Kot mon pa ti a kontan enn nou fanmir ganny kondannen oubyen war li pe pey le konsekans. Avek sa de mo mon pour siport sa lamannman lo sa Lalwa.

E mon demann tou Manm Lasanble, tou Manm dan sa Lasanble pour amenn zot sipor zot osi. Mersi.

MR SPEAKER

Mersi Onorab. Mon a donn laparol Onorab Uranie.

HON ROCKY URANIE

Mersi Mr Speaker. Bonzour Minis avek ou delegasyon. Tou koleg Onorab, tou zabitan zil pros ki a lekout. Sa lamannman, i fer revizyon dan bann penalti pour ogmant bann *fin*es e term lanprizonnman.

Avan sa parey in ganny dir *minimum fines* ki ou ti bezwen peye ti 2000 – (*sorry*) - ti 5000 e la nou nouvo pour vin *minimum* pour vin 25 mil. E *maximum* avan ti 500 mil e la pe sanze pour vin 1 milyon.

E sa bann *fin*es pe ganny mete pour anpes dimoun fer zot mazin de fwa avan ler zot komet bann akt kriminel, ilegal ki kas sa Lalwa Lanvironnman ki pe ganny mete.

Rezondet ki sa *fin*es in ganny ogmante, mon krwar ki i bezwen ki Minister

Lanvironnman in remarke ki i annan, bezwen annan - zot a donn nou statistik apre - en logmantasyon dan sa bann kalite akt kriminel ki pe deroule.

So alors pour mwan mon santi ki i enportan ki nou mete sa bann *fines* pour *deter* bann dimoun pour zot anpese fer sa bann kalite aksyon.

Nou annan bann krim organize. Kot bann dimoun lo later e lo lanmer, zot fer sa bann *animal smuggling* parey nou dir. I annan ki touye pour konsonmasyon. I annan ki vann byensir pour aköz pour - i annan en serten group dimoun ki kontan aste sa bann zannimo oubyen zot lapo.

Sirtou parey bann pei etranze. Be parfwa pour fer bann *experiment* avek. I annan ki zis parey nou dir i krwar ki en lapo, en lakok torti i pli zoli anpandan dan son salon ler in verni ki lo en torti li menm, *ok*.

E i annan ki krwar en lapo en leopar i pli zoli ater dan son lakour koman en marspye ki en lot leopar. So alor i enportan ki nou met sa bann Lalwa ater pour protez nou bann lespes. Sirtou Sesel pour fer sir ki nou bann fitir zenerasyon i kapab kontinyen vwar e zwir sa.

E pa bliye bokou touris ki kontan *wildlife* zot vin Sesel,

aköz zot anvi regard e vwar nou bann lespes. E alor nou, nou bezwen fer tou, pour prezerve ki zot kontinyen vini e sa i ed nou Lendistri Touris. I anmenn benefis pour Lendistri Touris e nou pei.

Alors fodre pa ki nou les nou ekosistem, nou biodiversite ganny afekte par bann aksyon kriminel. Alors osi fodre pa ki nou bliye ki pour plizyer lannen Sesel nou'n annan bann program pour protez nou lanvironnman, protez nou bann lespes.

E pour sa nou'n vin en sanpyon dan lemonn. E ki nenport ki Gouvernman ki vin o pouvwar. I bezwen kontinyen mentenir sa, pour fer sir ki nou reste premye dan prezervasyon nou lanvironnman.

Parey nou dir prezerve toultan pour nou fitir zenerasyon. Mr Speaker, lontan dan tou kanton ler ou pe grandi mon rapel bokou zannfan ti annan fles, menm adilt ti annan fles. Ki ennler zis fer *fun* ou vwar zot bann nespes zannimo.

E avek modernizasyon, avek devlopman ek ledikasyon ek bann diferan program, bann diferan klib ki'n ouver. Nou'n vwar ki bokou zenn in ganny edike, nou'n vwar ki ozordi fles in preski disparet.

E nou'n vwar ki bann zenn in komans konpran pli byen ki savedir proteksyon nou lanvironnman.

Met en Lalwa parey, zis lo li menm parey nou dir, zis Lalwa lo li menm i pa ase. Nou bezwen annan bann lezot striktir an plas ki pour akonpanya sa Lalwa pour fer ki i vin en Lalwa ki vreman morde.

Me selman en sel keksoz mon ti a kontan konnen, ler nou mazin sa bann krim koumsa petet nou pe mazin bann adilt ki pe fer li.

Me si sa bann krim pe ganny komet petet par bann zenn, bann zanfan ki pa ankor annan 18 an. Eski sa bann *fines* i pour al lo sa zanfan oubyen i pour al lo son paran?

Petet sa osi nou ti a kontan konnen akoz ozordi nou konnen, i annan zanfan ki malgre serten ledikasyon *still* zot kapab komet serten sa bann akt parey.

So petet Minister i kapab dir nou apre, ki arive dan sa bann ka koumsa. Pour ki osi ki zanfan osi i ganny met en serten kontrol avek, ki zot pa komet sa bann kalite aksyon, ki pour detri nou biodiversite.

Lo mon zil i annan Vev e Vev li i bezwen en gran lespas pour li viv. E nou ti vwar pour anpese ki sa lespes i disparet, ti

annan bann proze ki ti ganny inisye kot Vev ti ganny retire e met Ile Denis.

E laba dapre mon konpran in reprodwir ase bye. E pli tar osi Vev ti ganny bouze lo zil Curieuse, ki mon ekspekte osi laba zot pe fer tre byen. So sa i bann pa ki nou'n mete pour evite ki nou annan bann zannimo ki kapab disparet.

Alors mon ti a swete ki petet osi anvi ki nou fer ek Vev nou kapab get lezot zannimo osi, ki kapab ganny bouze dan serten lezot landrwa zis pour anpese ki an ka okenn evantyalite nou bann zannimo pa disparet.

So Mr Speaker sa *Bill* i annan en pti lamannman e si nou kontinyen koze, petet nou pour zis pe repet sa ki en lot nou kanmarad in dir.

E mwan alors, anvi ki nou'n toultan en sanpyon. Nou toultan pare pour nou donn sipor keksoz ki annan pour fer ek lanvironnman, ki anmenn benefis pour nou pei Sesel.

Alor mon ti a swete ki bann lezot striktir ki ganny met an plas byen, pour siport sa Lalwa pou fer ki bann zannimo ki nou annan, nou bann lespes ki nou annan i ganny byen proteze. Mersi Mr Speaker.

MR SPEAKER

Mersi Onorab. Mon a donn laparol Sandy Arissol.

HON SANDY ARISSOL

Mr Speaker mersi. Bonn apre midi tou bann dimoun ki pe ekoute. Mr Speaker, mon rapel dan sa menm Lasanble ki ti pe koz lo lanvironnman. Ki mannyer nou ti pe demann Gouvernman pour revwar bann penalti, an relasyon avek sali nou pei, zet salte en pe partou, partou.

E mon kontan ozordi sa menm Minister in anmenn en revizyon dan penalti ki konsern nou bann lespes ki nou annan. So mon swete ki dousman, dousman keksoz ava sanze.

Parske nou lanvironnman i bezwen marye avek bann lespes ki nou annan. Parske nou lanvironnman i zwe en gran rol pour nou lespes. Zis parey nou lespes i zwe en gran rol pour nou sistenm lanvironnman.

Parske sansan i pour annan en debalans dan nou ekosistenm parey Onorab John Hoareau in eksplik nou. Mr Speaker, sak mon desann dan bomaten, mon sorti Bel Ombre pour mwan desann lavil, swa mon fer par Bel Eau, ki tonm dan distrik Onorab Norbert Loizeau Bel Air. Ler ou pe desann ver lavil toultan ou vwar

lalyann in anvair plizyer propriyete.

Bann lalyann i annan sa enn ki annan pli gro fey, ou war in kouver en pe partou, partou e mon ganny dir poudir sa enn ki annan en pli gro fey, ki pa neserman mon konn son non, i ti ganny entrodwir Sesel, bann letan ki Gouvernman Minister sa letan ti pe elevaz bef. E li i ti ganny servi pour li zisteman pour sa *purpose*. Me apre parey nou konnen, modernizasyon.

Bef menm ozordi son manze i sorti aletranze pour vini parey bann lezot zannimo ki nou servi dan lakour. Alor li sa plant ti ganny zete dan lanvironnman.

E ozordi si nou pa fer atansyon, byento *State House*, Kordgard Santral, Mize, Lorloz, *Liberty House*, nou kapab ganny anvair par bann lalyann anvaisan ki kontinyen grandi, grosi, e fil en pe partou dan nou pei.

Mon komans koumsa Mr Speaker, parske mon krwar mon bezwen osi profite pour mwan felisit sa group dimoun ki kontinyen met zot latansyon, donn zot lenerzi, donn zot letan, sa ki apel nou lanvironnman avek bann lespes ki nou annan ki ganny proteze Sesel.

I annan en pti group zot sa bann dimoun, me souvandfwa nou pa koz lo zot oubyen nou pa apresye. Nou pa konn travay ki zot fer.

E mon ti a kontan ozordi pour mwan montre lapresyasyon pour zot. Parske i annan en kantite zot e souvandfwa i komans dan bann lekòl ki nou annan.

Parey Onorab Doyace in koz lo la, nou annan sa bann *Eco-Environment School Club* ki nou annan dan bann lekòl, ki dousman, dousman i edik nou zanfan. Ki mannyer pour protez lanvironnman, ki mannyer nou protez nou bann lespes ki mon krwar i enportan, nou rekonnet travay ki sa bann dimoun pe fer e pour nou apresye.

Parske nou lanvironnman parey in ganny dir, i annan osi pour fer avek nou dipen, i annan pou fer avek nou tourizm ki antre Sesel. Parske nou lanvironnman i ganny rekonnet atraver lemonn en kantite.

Me par kont Mr Speaker, i enportan pour nou osi edik bann lezot dimoun ki viv dan sa lanvironnman ki mannyer nou, nou bezwen protez nou lanvironnman.

Mon rapel ti annan en lepok, Sesel i ankor la, nou ti annan nou, nou'n ti'n ganny anvair par sa ki nou apel bann

'Senir plim'. E i annan plizyer dimoun i ti bezwen koup son pye mang, i ti bezwen koup son pye fri, parske zisteman en lespes ki ti'n ganny entrodwir dan nou ekosistem, pa konnen atraver ki ti pase. Be i ti la nou ti bezwen *deal* avek.

E letan sa ti arive, e apre nou ti annan sa fame, '*Together*' ki ti tonm, tonm en pe dan tou nou zafer. Tonm dan nou lantir, tonm en pe dan tou nou bann welele. E li osi nou ti bezwen *deal* avek li.

Be mon rapel letan ti annan sa bann flite ki ti ganny fer pour senir plim, mon ti ganny eksplike poudir pa neseserman en bon zafer. I ti bon pour sa vwazen, oubyen pour sa kominote ki ti ganny afekte, me i pa ti neseserman bon pour nou ekosistem.

Parske sa i ti fer ki nou bann mous dimyel ti pe ganny afekte avek sa. E mous dimyel i form parti sa ki Onorab John Hoareau in koz lo la, sa polinizasyon, ki ede avek sa fertilizasyon pour ki bann plant i kapab reprodwir.

E nou, nou en pei ki depan bokou lo la, parske nou, nou en pei ki'n ganny, nou'n ganny sa labitid toultan annan en pti fri kot lakour. Nou ti ganny ankouraze pour nou plante kot lakour.

E letan tou sa bann zafer i arive, i fer ki i annan sa destabilizasyon dan nou ekosistenm ki mon krwar i enportan pour nou koman enn pti pei. Alors se pour sa mwan mon pour an faver sa Proze Lalwa ki devan nou ozordi.

Parske mon krwar ozordi kot nou'n arive i enportan ki nou protez nou bann lespes parske mwan mon trakase. Parske si ozordi nou annan nou en Seselwa, de Seselwa, detrwa Seselwa ki pe pran nou lespes zot pe vann, ziska mon'n ganny dir zot a koriz mwan, ziska \$2000, i trakas mwan.

Parske ozordi dan lemond sa ki nou bezwen konsyan, poudir *human trafficking* in vin modern ozordi. *Human trafficking*, en keksoz ki'n retournen dan lemond.

Si en dimoun i pare pour li pran en lespes, met li par la mon pa konnen lo ki container, dan ki fason ki i kit nou pei pour ale, pour \$2000.

So i pour ariv en moman dan nou pei, kot ou pa pour kapab annan konfyans dan ou frer, dan ou vwazen, dan ou fanmir avek ou zanfana.

Parske ou zanfana, demen si i kout 1 milyon dan pei, atraver *trafficking*. E ozordi letan ou get bann program Mr

Speaker, i annan en kantite keksoz ki pe arive avek zanfana.

Kenya i enn, mon swiv bann program ki pase lo *Youtube* ki ganny fer par *BBC*, an relasyon avek bann zanfana, ki pe ganny zis *poach* lo semen Kenya. Oubyen zot al ganny pran dan bann kominote.

I annan ki ganny fer, i ganny servi pour fer *human sacrifice* avek, i annan i ganny servi pour son bann *body parts*, i annan i ganny servi pour lezot keksoz.

So mon krwar i enportan pour nou koman enn pti pei pour nou solider ansanm ler i konsern protez nou teritwar. Parske souvandfwa, menm *Coast Guard* i dir ek nou poudir lo Assumption, bann lezot zil nou annan bann lezot etranze atraver bato ki rantre lo nou bann zil, zot kanpe zot met latant.

E zot vin avek zot madanm, zot plonze zot rod nou banbara zot prepare anler apre zot ale. So si nou koman enn pti pei nou pa met lanmen ansanm, zepol ansanm, tou nou zefor pour nou protez nou teritwar, person pa pou fer pour nou.

E si ou, ou annan en bato ou pe lapes, nou'n al lapes detrwa nou. E ler mwan mon lapes mon met dan bato, ou

pran ou zet dan delo. Ler nou pour ariv ater, pour napa nanryen dan kannot e i pa vo lapenn nou pe lapes.

Savedir sa ki mon pe dir se ki si nou annan en group dimoun ki pe protez nou bann lespes. Parske avek bi pour protez en pe nou ekosistem, pour ki nou pa debalanse pour ki zot kontinyen prodwi.

Mon krwar i enportan pour li montre sipor e asire ki tou bann sipor nesaser i ganny fer. E mwan sa lamannman, Mr Speaker mon *happy* avek.

Parske mon krwar si i konsern ozordi, moman letan kot nou'n arive 2024, kot tou lemonn, tou lemonn protez son teritwar. I annan ki pe lev miray, i annan ki pe ferm son *border*.

Mon krwar Sesel osi nou, bezwen ptipti ki nou ptipti. Nou bezwen met lanmen ansanm pour nou protez nou bann lespes, pour nou siport nou lanvironnman.

E pour nou kapab protez nou ekosistem ki anmenn en kantite reveni. E i en benefis pour mwan koman en endividi e osi pour mwan zanfani ki pe grandi pour li osi kapab viv dan sa lanvironnman ki nou, nou gran paran, nou bann paran in kit avek nou ozordi.

Mr Speaker, mon ti a kontan dir ek Minis mon pour donn sipor pour sa. E mon santi i annan en travay ki bezwen ganny fer, i bezwen ganny fer. I annan en travay ki bezwen kontinyen ganny fer, pour ki tou keksoz, tou nou bann lespes e zot bann *expert* ki konnen.

Parske nou kapab dir wi, mon ti a kontan gout en kou sa enn, mon ti a kontan manz sa. Be zot bann *expert* ki *deal* avek sa ki zot ki konn zot profesyon.

Alors si zot ki gid nou, dan sa travay ki nou pe fer mwan mon san pour san pare pour donn mon sipor an relasyon avek sa lamannman ki'n ganny propoze dan *Wild Animals and Bird Protection (Amendment) Bill 2024* parey Onorab Doyace Porice in *remind* nou. Mersi bokou Mr Speaker.

MR SPEAKER

Mersi Onorab. Nou a pran ankor en entervansyon avan nou pran poz. E mon apel Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun sirtou *panel* ki'n zwenn nou dan Lasanble ozordi.

Mr Speaker, lontan ti'n ler. Lontan ti'n ler pour nou fer

sa ki nou pe fer ozordi. Parski pour tro lontan nou pa'n serye. Nou pa'n serye dan le sans ki nou koz nou koman en pei ki protez lanvironnman.

Bokou endividi i donn zot zefor, me selman mon krwar i *still* annan bann zefor anplis partikilyerman lo lapar endividi ki'n *let* nou *down*. E pli tar mon ava *expend* lo la.

Mr Speaker, sa zafer *poaching*, i annan en long listwar dan Sesel. Akoz nou annan en konsep dan nou kiltir, dimoun i dir ou manze rar.

Alor konmsi i bezwen al manz marswen, i bezwen manz zwazo, i bezwen manz torti. E i vin en plezir personnel, pour li. Lafanmir i tolere, zanmi i tolere, e sa zafer alor i kontinyen.

Mwan i annan en pe letan personnelman mon'n pran en desizyon, mon pa manze sa bann zafer. E tou mon bann zanmi, mon dir zot non i pa normal sa bann keksoz e nou pa fer li. E si mon konnen zot pe fer mon koz ek zot - mon koz ek zot poudir arete sa ki ou pe fer.

Mr Speaker, an 2004, i annan en *case* ki ariv devan Lakour e i ganny konsidere koman en *landmark case*. 8 zonm, i ganny atrape avek en total 114 kilo torti, 40 zwazo, lo en bato apel 'Kalkal'.

Dan sa 8 zonm 2 i ganny akite, devan Ziz Perera e i annan 6 zot ki ganny anprizonnen pour 2 an, 5 ladan i fer rapel, devan Lakour Dapel *chaired by Ziz Judge Ramodibedi*. 5 ladan, i ganny akite.

Zot pa ganny akite akoz zot pa ti ganny vwar koupab pour touye, ouswa pa touy torti, ouswa ki zot pa'n protez sa bann lespes.

Me ki arive bann prosedir legal pa'n byen ganny swiv. En sizyenm li i pa ti fer rapel, alor mon pa sir ki'n arive avek li. Si in reste prizon.

114 kilo torti ladan, 38 goni 2004. Touzour 2004 en lensidan i ganny raporte Anse Mazor, touris i vwar bann lakok. Lanvironnman monte nennen ouver, konfirman sa kare ki'n ganny touye. E i annan en malere par la ki'n aste sa lavyann ki'n pas koman lavyann torti.

Nou *fast forward*. 2009 Zilyet, 2 zonm; enn aze 30 an, enn aze 42 an ganny tyonbo avek 8 kilo torti e 13 kilo pwason ki Lotorite sa letan i sispekte zot in servi fizi pwason ki ilegal pour servi.

Nou *fast forward* Novanm 2013. I annan en *case*, ki'n pase devan Lakour alor Minis Lanvironnman sa letan, Rolph

Payet - Dokter Rolph Payet i promet sanzman dan Lalwa. Novanm 2013. Note sa dat.

Dan menm letan la i annan en peser Anse Aux Pins, ki ganny atrape li. Alor i ganny kondannen R15 mil lanmann ouswa i pour al 9 mwan prizon ki ganny sispann ziska ki i pey sa lanmann.

Nou *fast forward*, nou ariv 2019 e dayer, 2019 non. 2018, 2019. Sa bann letan Minister Lanvironnman i dir ki sezon torti, ki normalman an Oktob ziska Mars Avril son lannen answit, pour lannen 2018 ti annan 8 *case poaching* ganny raporte ofisyelman.

E an 2019 ti annan 14 ka ki ganny raporte ofisyelman. E sa letan Minis pour Lanvironnman sete, Minis Cosgrow, kot i ti ganny apwente an Avril 2018 ziska Novanm 2020. Sa ti sa bann statistik pour son bann letan ki li i ti pe rod statistik avek Minis la.

Nou kit 2018-2019 annou al Me 2020; 11 zonm, 11 zonm aze ant 25 an-58 an zot sorti les Mamelles, Ile Perseverance, Pointe Larue, Beau Vallon, La Louise, Roche Bois - mon pa konnen si Mont Buxton ouswa si Saint Louis, Cascade e Au Cap, zot ganny atrape, akoz torti.

Zen 2020 en case i ganny raporte par SSPGA, Cap Ternay. Mr Speaker, nou *fast forward* 2022. En *case* i annan en dimoun in touy en torti ganny dekouver Ile Soleil.

2022 an Novanm, en bato i ganny atrape Alphonse en bato apel '*Pelican*'. E li i annan 3 zonm ki ganny atrape. Enn 19 an, enn 24 an, enn 46 an, avek 117 kilo torti. E zot ganny en kosyon R8000 pour sa 6 kilo lavyann, sa 6 goni lavyann.

E mon pe dir tousala, akoz lo komansman mon prezantasyon mon'n dir i annan keksoz pour fer avek endividi ki iresponsab, pwiske ou war i bann zonm, aze en laz. E tou sa bann laz i bann laz ki bann dimoun ki'n pas zenerasyon NYS ki ti komanse an '81. Sa zenerasyon Seselwa, la *we should know better!*

Akoz nou nou'n ganny edike dan en fason e ganny enkilke pour proteksyon lanvironnman. *Why are we failing* nou nasyon, nou pei? Akoz nou kontinyen fer li? Kwa ki manke dan nou sistenm ki nou ankor pe fer sa bann zafer? E nou konnen frazilite nou sistenm.

Mr Speaker, an Novanm, non pa Novanm. Me mon ti dir taler ki an Novanm 2013, Dokter Rolph Payet i promet

sanzman dan Lalwa. E mon ava *quote* ki i ti dir,

“Dimoun pe vin pli ardyese, dan bann aktivite ilegal. In ler pour entrodwir santans ouswa pinisyon pli sever, pour bann ki pe fer ouswa touy bann lespes ilegalman.

Nou pa kapab, permet enn de dimoun iresponsab, gat repitasyon Sesel koman en pei ki krwar dan konservasyon. E andomaz frazilite nou *ecosystem* e ki bokou dimoun pe travay pour proteze.”

Komansman mon'n dir bokou dimoun pe travay pour proteze. Me i annan enn de endividi iresponsab ki li ale i fer otremman. Nou'n vwar poudir an Novanm 2015 Minister Lanvironnman ti sanz *Coco-de-Mer (Management) Decree*. Be aköz nou pa ti sanz bann lofans pour torti?

E sa depi 2013, promet sanzman. Minis Cosgrow i vini, ant Novanm 2018-2020 zot pa fer nanryen. Bravo Minis Joubert, pour ozordi pran en desizyon brav. Aköz *LDS* pa per pour pran bann desizyon brav...

MR SPEAKER

Onorab Cosgrow in donn son langazman pour siport sa soz.

So annou eparny li bann lakizasyon dan leparse.

HON GERVAIS HENRIE

Mersi. Mersi Mr Speaker.

MR SPEAKER

Mersi.

HON GERVAIS HENRIE

Mr Speaker, mon ava termin lo la. Aköz nou dan ka bann promes ki nou'n fer pour sanz Lalwa. Aköz nou bezwen realiz frazilite nou sistenm ki nou depan lo la.

Par egzantp an 2015 ler zot sanz sa *Coco-de-Mer (Management) Decree*. Zot in dir poudir par egzantp ozordi, bokou dimoun i poste portre lo rezo sosyal. I dir la nou'n kwi enn pti manze rar, sa i ganny anmenn Kordgard. Gard i dir napa ase levidans. Be annou anmennen ozordi, nou sanze en?

Lalala nou sanze. Nou menm kapab dir ek dimoun, ou konnen kot pe kwi ou'n santi loder, telefonn gard dir la anler mon'n santi en loder la monte. *This is how serious this Assembly should be.*

E nou merit donn bann *commitment* personnel mwan mon'n fer, mon pa pour manze e mon ankouraz bann zanmi ki pe kwi pour aret fer li.

Mr Speaker, mon fini lo la. Sesel e sa Lasanble pe dir avek piblik Seselwa.

Enn, nou annan Lalwa dan nou pei ki protez bann lespes ki merit ganny proteze, torti, marswen, zwazo eksetera.

Dezyenmman, Lapolis pour aret ou.

Trwazyenmman, Biro *Attorney Zeneral* pour prosekrit ou.

E katriyenmman, ou pa pour ganny proteksyon okenn politisyen, ouswa sa Gouvernman si ou pe fer keksoz ilegal ki pe andomaz frazilite nou ekosistenm. Mersi Mr Speaker.

MR SPEAKER

Mersi Onorab. Bon nou'n ariv ler ki nou pran poz zeneralman. Mon annan 5 Manm ki lo lalis Onorab Pillay, Onorab Georges, Onorab Labonte, Onorab Woodcock, Onorab William. Onorab Loizeau ou ti'n lev lanmen?

Ok, okenn lot dimoun ki pe met son non? *Ok* mon a met Onorab Loizeau. *Ok* nou a – mersi. Nou a pran poz la e nou a rebran – akoz nou annan *meeting Assembly Business Committee* osi *Bills Committee*, nou a rebran 2er 15. Mersi.

(BREAK)

MR SPEAKER

Bonn apre midi tou dimoun. E mersi pour rebran. Nou a kontinyen avek bann entervansyon bann Manm. Minis i a remarke ki menm ki son *Bill* i ptipti zis detrwa laliny, in sisit en kantite lentere. E osi bokou sipor sorti kot bann Manm. Mon'n ariv lo Onorab Bernard Georges.

HON BERNARD GEORGES

Mersi Mr Speaker. Bonn apre midi Mr Speaker. Bonn apre midi Minis avek ou lekip. Bonn apre midi tou mon bann koleg Manm Onorab –. E tou bann dimoun ki pe swiv nou dan lakour.

Mr Speaker, efektifman sa i enn pti *Bill* e mon mazine dan lespri Minis avek son lekip zot pe dir, be depi 10 er edmi bomaten – (*sorry*) – depi 11 er bomaten zot pe repet menm zafer enn apre lot. Akoz zot pa zis ferm deba annou vote, nou a retourn dan nou biro akoz zot annan en pe travay pour fer.

Mon konnen Minis ozordi, nou'n gard li la e nou'n fer li mank en miting *Cabinet*. Me i en pti Lalwa me i en Lalwa enportan. E mon krwar se pour sa rezon ki tou bann Manm ki'n koze, in pran letan pour retourn lo annan de fwa menm size e

dan en keksoz koumsa mon krwar repetisyon i pa en move keksoz.

Akoz enn bann keksoz ki nou bezwen fer koman dirizan dan sa pei, se enkilke dan nou dimoun rezon aköz Minis in bezwen ariv isi ozordi. I pa ti bezwen ariv isi ozordi.

Si tou nou sitwayen e bann dimoun ki vin Sesel pour pran bann lespes e pour al avek ti swiv Lalwa. Si zot tou zot ti swiv legzanp ki bann zenn dan bann bann *Environment Clubs*.

E la mon profite pour felisit tou sa bann zenn ki dan bann *Environment Clubs* e zot bann ansennyen - zot bann akonpanyater dan sa bann klib.

Si tou dimoun ti annan sa lespri prezerv lanvironnman, nou pa ti pour la ozordi e nou pa ti pour bezwen pe ranforsi penalti pour bann dimoun ki pa swiv Lalwa.

Me malerezman dan en popilasyon kot la gran mazorite dimoun i *abide* par Lalwa Lanvironnman. Tel parey lamazorite dimoun i *abide* par Lalwa Zet Salte ou plito Lalwa ki anpes ou zet salte an bonnavini, i annan detrwa dimoun ki anver e *contre tout* pour krwar ki zot, zot pli entelizan, zot pli malen e zot pli merite ki lezot. E zot, zot pour

fer sa ki zot anvi aköz sa se zot fason fer.

E sa Mr Speaker, i en keksoz malere. E ki'n fer ki ozordi nou bezwen pran en zournen, pour nou atraver nou bann deliberasyon ozordi, enkilke dan bann dimoun ki pe ekout nou sa lespri, ki sa ki nou'n gannyen sa ki Bondye in donn nou in donn nou pour prezerve e non pa pour sey fer en profi avek.

E nou sorti lwen Mr Speaker. Nou sorti, lwen, lwen, lwen. Aköz pa telman lontan pase, *in fact* dan bann letan sertennman nou bann paran, nou ti ankor isi lo sa later Sesel pe eksplwat mangliye. Nou ti pe koup bann pye mangliye en pe partou. E la nou fek annan semenn pase e *well done EPIC* dan Lasanble Nasyonal ek tou bann lezot dimoun ki pe prezerv mangliye dan nou pei, pour sa travay ki zot pe fer, pour sansibiliz dimoun kont detri mangliye e pour prezerv li. Nou ti ankor pe koup mangliye e servi sa koman dibwa konstriksyon.

E annefe Mr Guy Esparon lotrozour fek fer mwan rapel ki lo Por Kilwa an *Tanzanie* ozordi la ki nou pe koze, ou plito de ou trwa mwan pase ler i ti pe akont mwan sa zistwar, lo Por Kilwa, *Tanzanie* son Por, son *wharf*,

son *quay wall* in fer avek mangliye sorti Aldabra e i ankor la ozordi. Sa depi lannen 30 dan lannen 1930,1940 i ankor tel kel la ozordi. Nou ti pe eksplwat sa, nou ti pe eksplwat balenn parey nou konnen.

Sainte Anne ti en *Whaling Station* e nou ti eksplwat balenn dan nou lanmer. Ozordi nou nepli fer li e balenn pe komans retournen. E in vin non selman en latraksyon touristik, me Seselwa, ki marse pour al Anse Major ler zot lo glasi annan de fwa zot war balenn pe pase. Nou vwar donk Mr Speaker, ki mannyer dan enn pti git letan lanatir in refer, in retourn parey i ti ete avan.

Nou ti eksplwat torti sa nou pa bezwen koz lo la tou dimoun i konnen. Me nou ti pe eksplwat torti dan de lezot fason. Nou'n eksplwat torti tortidter a tel pwen ki sel landrwa kot tortidter i reste dan leta natirel dan leta sovaz se Aldabra.

Nou'n elimin li lo tou bann zil kot i ti egziste avan. E lo Aldabra a en serten moman nou ti eksplwat torti pa ni pour son lavyann, pa ni pour son lekay.

Me pour sa kalipi, sa pti bout, sa pti bout lavyann ki ant son plastron avek son lakok. Se tou ki nou ti tire larestan nou ti zete.

E annou pa mansyonn dizef zwazo ki ti ganny eksplwate dan telman kantite ki nou ti zet son blan, nou ti met son zonn dan barik ou plito son oranz, akoz son zonn pa zonn, pour eksporte pour fer lapentir avek. Sa se bann letan leksplwatasyon.

Me nou'n sorti ladan erezman e atraver e la mon pour bezwen retourn byen an aryer. Atraver travay ki'n ganny fer par tou bann Gouvernman ziska sa enn, komansman par Gouvernman kolonyal, Gouvernman Mancham, Gouvernman Msye Rene, Gouvernman Msye Michel ek Msye Faure ziska pour ariv kot Gouvernman Msye Ramkalawan.

Tou sa bann Gouvernman in annan en sel lespri, sorti dan leksplwatasyon e al dan konservasyon. E a tel pwen ki ozordi nou annan en rikord koman en pei, en *leader* dan konservasyon, e *leader* dan proteksyon lanvironnman.

Mon'n manke dir taler, ki enn bann keksoz ki ler mwan mon ti ankor ptipti mon konnen ti arive, se ki ler dimoun ti ankor ptipti, dan serten fanmir i ti ganny enn pti torti. E i ti fer sa pti torti grosi pour ki pour son maryaz sa torti ti ganny touye e servi avek bann *guest*.

Tortidter pa torti delo sale, tortidter. Sa se bann keksoz ki dan nou listwar. Me mon kontan poudir ki nou'n bouz en kantite. Me nou pa ankor arive kot nou anvi arive se pour sa rezon ki nou la ozordi, poudir ki sa detrwa dimoun ki ankor pe fer sa bann keksoz silvouple arete. Pran legzanp avek nou bann gran pye ki'n sanz zot lespri. Pran legzanp avek nou bann zenn ki pe donn nou sa legzanp sa fason fer.

Mr Speaker, mon annan mon en dimoun ki'n ganny en kantite en kantite loportinite en kantite sans e enn bann sans ki mon annan, ki mon'n annan pour sa detrwa dernyen lannen, se pour mwan asiz lo plizyer *Board* ki annan pour fer avek proteksyon lanvironnman. E *including* en Komite Lasanble, Komite Zil ki'n permet nou al vizit tou bann zil, tou bann zil, tou bann zil Sesel e pour apresye pour nou menm nou larises e nou labote.

E atraver sa bann *Board* ki mon asiz lo la, mon'n arive apresye sa ki bokou nou nou'n koz lo la ozordi, sa gran larises ki nou annan dan nou *flora* ek nou *fauna*.

Annan de fwa ler nou asiz isi Sesel, *sorry* ler nou asiz isi Mahe, nou napa en konsepsyon sa kantite keksoz ki nou annan.

Lanmenm la pa tro lwen - Ile Aride par egzanp ki lanmenm la o bor Praslin. I annan en diversite ekstraordiner lo zwazo, lo plant eksetera.

Lanmenm la li pa lwen, me si nou kit Ile Aride e nou al pli lwen, e nou al dan bann zil - dan bann zil dan sid. Nou vwar bann koloni Fou, par egzanp *red-footed booby*, lo *Zil Du Sud*, Farquhar ek lo Cosmoledo, epi lo Aldabra li menm. bann koloni, plizyer dizenn milye sa bann zwazo. E ler nou regard *Bird Island* lanmenm la o bor, oubyen Zil Gaulette, Farquhar, oubyen Gran Zil Cosmoledo, kot ler zwazo i vin ponn, zot pa vin ponn par 1000, par 10 mil, be zot vin ponn par santenn mil.

Nou annan donk en larises Mr Speaker, ki difisil pour konsevwar ziska ler ou vwar. E si ou annan detrwa dimoun, oubyen ler ou antre dan parey Onorab, *Leader* Lopozisyon i konnen, aköz nou ti la ansanm, ler ou antre dan lagon Cosmoledo oubyen ler ou antre dan lagon Astove, e ou war sa kantite torti - sa kantite torti ki zis dan sa lagon en sel kou. E ou war latras torti enn apre lot, enn apre lot, enn apre lot, enn apre lot lo lans, kot torti in monte son lavey e in desann,

ou realize ki kantite keksoz ki nou annan pour nou fyer, ki nou annan akoz Bondye in donn nou e pour nou fyer akoz nou'n kapab proteze atraver bann lannen.

Alor i absoliman esansyel ki nou fer de keksoz. Nou fer bann dimoun konpran, sa bann ki pa ankor konpran, ki vir en torti ler i pe monte lo lans pour li al ponn, i pa en bon keksoz.

Akoz ou pe detri nou selman en zannimo, me ou pe detri en kantite dizef ki dan son vant ki i ti pour al ponn. E ou bezwen si ou fer sa ganny pini annakor avek ou aksyon.

Ou pa kapab mont lo en zil al touy Fou, i pa konmsi nou en pep Mr Speaker ki lafen. Nou en pep ki byen nourri. *In fact* lotrozour nou'n fek aprann, mon pa konnen mon krwar Prezidan ki ti dir dan son, nou en pep ki non selman byen nourri me nou obez an zeneral.

Alor nou pa bezwen al fer sa bann keksoz, nou pa bezwen manze rar. Nou pa bezwen al fer sa bann leksplwatasyon. Les sa pour bann dimoun ki'n viv avan nou e ki pa ti konn pli byen.

Ozordi nou konnen e nou bezwen konsyan dan sa ki nou fer. E nou bezwen konnen ki si nou fer en keksoz ki pa byen, si nou pour al kont sa ki Lalwa i dir e sa ki nou bann zenn

dimoun pe montre nou, nou pou bezwen pey le konsekans.

E Mr Speaker, sa se en kote. Lo lot kote i annan bann dimoun ki fer trafik, bann lespes ki nou annan, ki zot pa touye, pour konsonmen, me zot fer trafik avek.

E la resaman dan sa deryen de semenn, nou'n vwar ki dan - mon pa pour mansyonn lekel. Pa pour donn dimoun en lanvi al fer parey. Me dan enn bann landrwa Praslin kot i annan en kantite kokodmer in komans annan *poaching*.

Dimoun i vini, i plis kokodmer aswar epi zot kasyet li dan en landrwa pour zot vin pran en lot moman. E nou konnen akoz sa i arive. Akoz si lo marse lokal en kokodmer i kout R4000, R5000 i en *incentive* pour en dimoun vin vol enn.

Akoz en sel kou, i kapab menm si i vann li R2000 i en larzan vitman. E donk si ou anvi antre dan en lantrepriz pour ou ganny en larzan vitman lo en lespes proteze, *then* ou bezwen pey son konsekans ler ou ganny tyonbo.

E mon mesaz ozordi se pour sa bann dimoun, pa fer li akoz i pa pour vo lapenn. Si dan lepase ou'n ganny en kosyon, si dan lepase ou ganny en *fine* R8000, apartir lemoman kot

nou pas sa Lalwa ozordi, sa pa pour pe le ka.

Si ou ale e eksplwat keksoz kontrerman a Lalwa ou pour pey le konsekans. E sa mon krwar Mr Speaker, nou bezwen dir li e nou bezwen dir li for.

Manm ki'n koz avan mwan in koz lo *brown gecko* sa lezar ki egziste zis Vallée De Mai. Dan tou lemonn antye i egziste zis Vallée De Mai e i egziste zis lo bann pye kokodmer Vallée De Mai.

E akoz i rar, akoz i rar, i ganny *poached* par swa Seselwa, swa etranze ki vin krwar, fer krwar ki zot vakans isi Sesel, me zot vin rod sa bann lezar. Zot antre dan Vallée De Mai aswar, zot al *poach* sa bann zannimo e zot al vann li a en pri ekstraordiner. Nou'n tann 1000, 2000 Dolar - i bokou, bokou plis ki sa.

Bokou, bokou plis ki sa. Ankor enn fwa mon pa pour vin dir zis an ka dimoun i krwar, *ah* be la en bon keksoz. Mon al vol en pe akoz mon kapab vin ris vitman.

(comments off-mic)

HON BERNARD GEORGES

(Ou war Mr Speaker annan de fwa ou demann ou lekor, akoz

ou annan dimoun parey Onorab Pillay dan sa lasanm.)

MR SPEAKER

Kontinyen avek ou diskour Onorab, silvouple.

HON BERNARD GEORGES

Erezman, erezman Mr Speaker, ki nou annan en popilasyon ki konsyan pour la pli gran parti sa ki mon fek koz lo la. E mon kapab dir ki i annan serten *Memorandum of Understanding, MOU*, ki'n ganny sinyen par bann antite ki prezerv lanvironnman avek par egzanz *Coast Guard*.

Mon konnen ki Aldabra, in siny enn. Mon konnen ki Ile Aride in siny enn. Pour ki ler i annan en soupson *poaching* ou kapab *call* kot *Coastguard* vitman e i ava vin a ou lasistans.

Me ankor fwa sa Mr Speaker, malgre ki sa i la, malgre ki i annan Lapolis, malgre ki lo sak zil i annan *rangers*, *still* dimoun i *poach*. Mon pa pour kapab al dan detay apard zis mansyonn 3 keksoz ki nou konnen. Akoz nou'n tann li lo televizyon.

Enn se en ka ki'n fek arive Anse Possession Praslin, ti lo Nouvel. Enn se en ka ki fek arive Curieuse kot ti annan en lesey pour vol torti. En lot

resaman kot 2 landormi ki ti'n vin met ba dan labe Grand Anse Praslin, zot in ganny atrape e ti pe ganny montre lo televizyon.

Sa se bann keksoz ki Mr Speaker, nou pa bezwen fer. Nou pa bezwen fer. Nou pa bezwen vin ris vitman, nou pa bezwen al kont sa ki lezot i fer pour prezerve zis aköz nou, nou krwar nou pli for ki Lalwa, nou, nou krwar ki nou, nou merit plis ki lezot.

Les lezot proteze, nou, nou a vin eksplwate. Sa se en mantalite ki nou bezwen aprann e dir avek bann dimoun, *sorry* sa si i ti leka yer, apartir ozordi le 31 Out – le 31 Zilyet (eskiz mwan) 2024 ler sa Lalwa pour pase, sa pa pour ariv ankor, si ou fer li ou pour pey le konsekans.

E Mr Speaker, mon pa konnen ki mannyer nou pour anmenn sa lide devan. Aköz sa ki arive i ariv, pa zis isi me nou, nou lespes ki ganny pran isi annan de fwa zot ganny met dan risk, dan bann lezot pei. Malgre ki i annan *CITES* ki Onorab Cosgrow, in koz lo la taler...

Depi yer i paret ki mon pe tonm dakor en pe tro avek Onorab Cosgrow. Mon pa konnen ki sa – ki sa ki'n arive, me mon dakor avek li. I annan sa Konvansyon *against*

International Trading Endangered Species.

Malgre sa, keksoz i arive. La 2 mwan pase Langleter, zot in trouv dan en lafore 5 ou 6 torti *giant tortoise* sorti Aldabra in mor. Aköz? Sa dimoun ti nepli anvi gard li oubyen i nepli kapab oubyen i ti nepli annan larzan, *whatever*.

Alors ki'n fer? In anmenn sa bann torti sorti Aldabra, Langleter in anmenn zot dan en lafore. E zis in kit zot la e zot in perir aköz lafreser. Alor nou bezwen protez nou bann keksoz.

Mon rapel Mr Speaker, mon a donn ou en lot legzanp. Mon pa anvi pran tou apre midi antye zis pour mwan. Mon a donn en lot legzanp. En fwa mon ti pe sorti *Madagascar*, mon ti pe retourn Sesel, ler mon pas atraver – ler mon'n fini *check-in* mon bagaz. Lapolis i vin rod mwan i dir mwan mon annan en torti dan ou valiz. Mon dir li mon napa en torti dan mon valiz ; pourtan ou annan en torti dan ou valiz.

Mon dir mon konnen mon'n *pack* mon valiz mwan menm, mon napa en torti. I anmenn mwan, i vre lo *x-ray* i annan en torti dan mon valiz. Fouye apre ki nou'n realize mon ti'n bliye, mon ti'n aste enn pti torti an sifon avek disab ladan

ki en *paper weight* akoz mon ti'n war li zoli.

E Onorab Cosgrow ti dir bomaten, annou ranforsi nou sirveyans. Annou ranforsi pa zis pas Lalwa, annou ranforsi nou sirveyans, annou aplik Lalwa, annou fer sa Lalwa morde.

Si *Madagascar* ki nou regard li koman en pei mwen devlope ki nou, me ki annan proteksyon son lanvironnman aker. I kapab detekte en torti dan mon valiz ki pa ti en torti. Me *still* zot in dekouver li, nou osi nou bezwen kapab pe fer menm zafer. Si nou kapab detekte drog ki pe antre, nou bezwen kapab pe detekte, *wildlife* ki pe sorti ki pa legal, e ki al kont Konvansyon *CITES*.

Donk Mr Speaker, les mwan dir avek Minis apre midi, ki i pour ganny son *Bill* e mon ekspekte ki i pour sorti la avek en *score* 100 poursan. Akoz nou tou malgre nou diferans politik, malgre serten diferans dan lafason, ki nou'n koz lo sa Mosyon – (*sorry*) – lo sa Prozedlwa, nou tou nou vin ansanm pour protez nou lanvironnman e poudir avek bann dimoun ki pa anvi swiv Lalwa, ki zot bezwen pey le konsekans.

En dernyen parol Mr Speaker, Minis in promet ki i

pour regard Lalwa an antye. *Well done* Minis, mon krwar i, mon krwar i apepre tan. Mon pe regard sa Lalwa la bomaten e mon vwar ki i en Lalwa ki ase vye, 1961 e sel keksoz ki sa Lalwa i dir vremen se ki Minis i kapab fer regilasyon pour protez plizyer lespes.

E annefe, dan bann lannen, in annan plizyer regilasyon ki'n ganny fer pour protez serten keksoz. Me zis pour montre ou ki mannyer sa Lalwa i *outdated*, e mon anvi zis partaz sa apremidi avek bann Manm e okenn dimoun ki pe ekout nou, akoz se en keksoz ki lo enn bann *Board* ki mon deservi lo la, ou ki mon servi lo la, nou pe regard sa depi en pe letan, e sa se bann zil ki'n ganny deklare koman *nature reserve* pour koleksyon dizef zwazo.

Ile Séche, la deryer. Mon pa krwar i annan bokou dizef zwazo. I telman pre ki in fini. Ile aux Fous ant Praslin avek Ile Aride, li depi plizyer lannen - *forget* Fou, in ganny nonmen apre Fou. Fou ale, Fou ariv Farquhar ek Aldabra. E la mon krwar mon tande i pe retourn enn pti pe Bird Island.

Nepli annan non selman Fou, me zwazo ki ponn tou le-z-an, zot nepli vini akoz zot nepli

kapab akoz dimoun i vini, i pran tou zot dizef.

Boudeuse, Etoile, Mamelles, Cousin, Cousine, Ile aux Vaches, eksetera. Me i annan enn ki enteresan. E sa se en zil ki apel *King Ross or Lanperer*. E sa zil Mr Speaker, pa egziste – nou annan dan nou *Schedule*, zil ki en *nature reserve*, me deklare koman en *nature reserve* kot ou napa drwa al anmas dizef lo la. E i en zil imaziner.

Enn pti pe parey – (les mwan pa al ladan) – i en zil imaziner. I en zil ki nou'n rode partou kot i egziste. I pa lo en map okenn par, i pa *anywhere*. Donk Minis, *by all means* pran ou letan vin avek, vin avek en Lalwa ki pour koresponn a legzizans nou popilasyon. E a en lentere sa ki nou pe fer.

En lot keksoz enteresan Mr Speaker, dan enn bann regilasyon pour protez bann zannimo, bann zwazo, bann *wild birds*, nou vwar ki Merle, i annan zwazo ki ganny proteze, me sa bann zwazo swivan pa ganny proteze.

Merle par egzantp, selman lo zil Fregate, La Digue ek Praslin e selman ant le 15 Avril, ziska le 15 Novanm la zot pa ganny proteze. Aparad sa bann dat e lo bann lezot zil zot ganny proteze.

All of this is outdated Mr Speaker, depi en bann letan. Fouke, Fouke li i ganny proteze depi le 01 Zanvyè, ziska le 31 Mars. Lo tou zil ekspekte Ile Séche, Mamelles, Cousin, Cousine avek Ile aux Vaches. me ki ozordi nepli valab. E donk Minis mon – ou'n donn mwan gran rekonfor bomaten, ler ou'n dir mwan ki ou pe travay lo en lamannman konsekan lo Lalwa *Wild Animals and Birds Protection*.

E mon oule asir ou ki si ou bezwen, nou a donn ou tou sipor ki neser dan ou demars. Akoz nou pei, dan sa nivo devlopman environnman ki nou'n arive ek sa devlopman konservasyon kot nou'n arive, nou bezwen en Lalwa ki performan.

Antretan *will make do* avek ou lamannman apre midi, ki nou krwar i en pa dan en bon direksyon. E ansanm mon krwar si sa Lasanble i pas sa Lalwa a linanimite, nou pour pe anvoy en mesaz enportan avek bann dimoun laba deor ki pa enterese protez lanvironnman o kontrè ki anvi vin detri lanvironnman, ki zot fer sa a zot prop risk. Mersi Mr Speaker.

MR SPEAKER

Mersi Onorab. Mon a donn laparol Onorab Sebastien Pillay.

MR SPEAKER

Mersi Onorab, mon a donn laparol Onorab Sebastien Pillay.

HON SEBASTIEN PILLAY

Mersi Mr Speaker, e bonn apre midi ankor enn fwa tou dimoun ki pe ekout nou, e pe swiv Lasanble, bonn apre midi tou dimoun ki prezan dan Lasanble.

Mr Speaker, nou annan devan nou en Prozedlwa ki dan son konsepsyon i tre senp, me i neser konman Manm Lasanble ki nou demann bann kestyon pertinan vizavi lezot Lalwa ki an egzistan.

Not an plis ki nou fek pas en lot Lalwa an sa ki konsern *Trade in Wildlife and Fauna; Flora and Fauna*.

E bann diferan *finer*, e bann diferan kontravansyon ki egziste anba sa enn Lalwa, pour fer sir poudir dan larmonizasyon sa bann Lalwa, an relasyon ek sa enn ki nou pe prezante, in annan en travay ki'n ganny fer avek sa nouvo lalwa ki nou fek pase.

Nou'n osi Mr Speaker, resaman entrodwir bann nouvo *S.I.* an relasyon zisteman avek

proteksyon, anba sa Lalwa ki nou pe koz lo la, *Wild Animals and Birds Protection Act*, i annan *S.I.* 51 ki nou ti pase an 2021, i annan *S.I.* 52 osi an 2021, ki enn i *relate* avek sa *bronze gecko* ki li la i en *protected species*.

E lot i *relate* a sa lot *species Archaius chameleon* ki li osi in ganny konsidere koman en *protected species*.

Mon swazir pou konmans koumsa Mr Speaker, akoz malgre Lalwa i pti pti i osi enportan ki ler Minis, i kit Lasanble ozordi avek son *panel*, nou kler ki zot in konsider tou bann landrwa kot i kapab annan bann *loopholes* ki permet bann sityasyon arive.

E ki kre bann kondisyon kot zisteman, nou annan sa bann pert dan nou biodiversite e nou war poudir bann lespes an danze, bann lespes proteze i *end up* dan bann pei kot zot pa devret etc.

I enportan Mr Speaker, selman ler mon konmanse pou fer kler poudir lo en tel Lalwa nou bezwen osi prezant nou lekor konman en *united front* lo sa size.

E mon krwar dan serten lentervansyon ki'n komanse oparavan, ki'n fer bann aspersyon negativ, fer zisteman par Onorab Gervais Henrie, lo

bann teknisyen lanvironnman, lo bann ansyen Minis Lanvironnman.

Mon krwar i pa bann enspaspersyon ki byen, i pa bann komanter ki ti nesese ganny fer e bann komanter ki totalman deplase an relasyon ek travay ki sa bann *expert*, sa bann konservasyonnis in fer pandan plizyer lannen. I annan bann non ki nou kapab mazine - i annan Mrs Jeanne Mortimer ki'n travay pandan plizyer lannen avek bann torti zean.

I annan lezot bann dimoun Katy Beaver - in annan plizyer dimoun Mr Lindsay Chong-Seng ki'n travay, Mr Laboudallon Praslin ki'n travay pandan plizyer lannen.

E aksyon imen sa bann dimoun pa pou'n zanmen kapab anpese. Aksyon imen Mr Speaker, i toultan en keksoz ki enprediktib e difisil pour nou kapab konpran.

E resaman Mr Speaker, pou prouv sa pwen, in annan en lartik mon pe pe koz *whether* sa lartik i korek, me sa lartik i prezant serten lenformasyon an relasyon avek 72 - si mon pa tronpe 72 torti zean; pti torti zean ki ti ganny atrape e ti pe ganny *smuggle to Spain*.

E PS Matatiken ti ganny kontakte par SNA pour eksplike

ki mannyer an traver rezo aryen, sa 72 ti torti ti nobou kit Sesel e ariv Lespanny.

Sa i fer nou demann nou lekor bann kestyon fondamantal e malgre mon'n ekout en prezantasyon sorti kot mon koleg lo lot kote latab, in demann en kestyon aköz mon la.

Se sa rezon aköz mon la, aköz mwan, mon pare pour demann bann kestyon ki pertinan, bann kestyon ki nesese ganny demande.

Bann kestyon par egzantp Mr Speaker; aköz nou fer politik dan lekol, bann kestyon parey aköz nou fer *redundant* travayer SPTC, bann kestyon aköz nou pa pey *Coast Guard* zot bann *sea time allowance*.

Sa i bann kestyon ki mwan, mon la pour demande e ou menm ou Mr Speaker, mon bezwen admet ou'n war aköz i relevan pou nou koz lo la aköz...

MR SPEAKER

Troun lo size Onorab, mersi.

HON SEBASTIEN PILLAY

Non mon lo size Mr Speaker, mon lo size aköz, mon lo size ler mon pe koz lo bann kestyon pertinan.

Mon kapab demann en kestyon Mr Speaker, par egzantp e mon swete ki personn

pa grense, akoz dimoun pa'n vin Konvansyon LDS Dimans pase.

Konpran tou sa bann kestyon i bezwen ganny demande...

(Interruption)

MR SPEAKER

Onorab, mersi. *Order!*

Onorab, nou'n al ase byen ozordi an term *focus* lo sa size ki devan nou. I kapab annan enn de pti petet keksoz akote.

Me selman mon ti ava apresye si nou kapab kontinyen *focus* e mon vremen apresye sa *united front* ki ou'n dir. Silvouple...

HON SEBASTIEN PILLAY

Ah! Mersi, mersi Mr Speaker...

MR SPEAKER

Kontinyen.

HON SEBASTIEN PILLAY

Mon, mon vremen apresye e lefe ki nou'n vwar le 2 dirizan LDS *step down from zot pozisyon* ki dan Lasanble ozordi...

(Interruption)

HON SEBASTIEN PILLAY

I zisteman montre – mon-mon...

MR SPEAKER

Silvouple.

HON SEBASTIEN PILLAY

Mersi Mr Speaker. I enportan nou met sa bann size devan Lepep Seselwa, e akoz nou bezwen met sa bann size devan Lepep Seselwa Mr Speaker?

Nou bezwen... wi ou devret *resign* konman en Manm Egzekitif tou ler ou Deputy Speaker.

Mr Speaker, akoz mon pe dir sa? Si nou war nou dan en sityasyon kot 72 a sa moman modern ki nou pe viv.

E Onorab Georges, in koz lo *scanning* ki'n fer *Madagascar* e mon asire lo *Airport* Sesel i pa fasil pou ou sorti avek sa bann pti torti.

Akoz nou tou nou konn striktir bann *airport*. Me ki mannyer in kapab fer ki sa bann pti torti zean in kit Sesel?

Savedir malgre nou pou pas sa Lalwa, i annan en lot defayans ki nou pou bezwen adrese, e sa se *enforcement*.

Akoz nou bezwen adres sa defayans Mr Speaker? Set akoz ozordi nou annan nou en vas lespas maritim. E dan mon lenterpretasyon *layperson* si i difisil pou ou pas atraver en *airport* avek bann zannimo koumsa, sel opsyon se ki ou pe pret li lo en bato e ou ariv dan en landrwa kot napa sa kantite

kontrol, e la dan sa landrwa ou kapab pase avek atraver bann laranzman ki ou annan.

E sa i poz en danze pou nou, akoz Mr Speaker, i poz en danze pou nou? I poz en danze pou nou akoz ler nou regard sa Lalwa ki devan nou ozordi, malgre i pe koz lo met sa bann *fines*, me lekel ki pou fer *enforcement* pour sa bann *fines*? Eski se *SNPGA*?

Personnelman mon, mon zwenn avek *SNPGA* e mon bezwen dir Mr Speaker, ki *SNPGA* i annan en rol enportan pour li zwe.

Me li i pa sa lotorite prensipal ler mon pe regard sa striktir ki bezwen *enforce* bann provizyon sa Lalwa.

Lo lot kote par egzanp Mr Speaker, ou annan *SIF* ki li ki *manage* Vallée de Mai ankore enn fwa eski se li ki lotorite prensipal ki bezwen *enforce* bann provizyon sa Lalwa?

Sa i met nou an dout lo nou kapasite pou *enforce* sa Lalwa, malgre ki mon admet 100 pousan e aksepte 100 pousan, menm 200 pousan ki nou bezwen annan sa revizyon dan *fines*.

Me annou regard ki arive Mr Speaker, dan en pei kot en dimoun in ganny tyonbo avek sa bann pti torti an kestyon.

Dan sa pei kot in ganny tyonbo i ganny *fine* €350 mil *for smuggling* i lo rikord, me nou, nou pe *fine* li 25 mil a R1 milyon. Lo tolesanz i plis ki R4.5 milyon ki sa dimoun in ganny *fine*.

Dezyenm kestyon *have we gone far enough?* Si en lot pei i kapab enpoz en *fine* ki plis, an relasyon ek en lofans ki en dimoun pou *smuggle* en keksoz ki *belong to* nou Seselwa, Sesel; *have we gone far enough?*

En lot legzanp ki'n ganny site Mr Speaker, se legzanp ki Onorab Georges, in servi kot sa 7 torti zean ti ganny trouve dan en *park* Langleter.

E la ankore en fwa nou retourn kot Lalwa pour demande si nou'n al ase lwen? Lalwa i dir nou koumsa poudir anba bann provizyon ki egziste, malgre ki nou aksepte poudir tou Gouvernman ki'n vin avan in fer en kantite keksoz, tou bann dimoun ki'n vin avan in fer en kantite keksoz, nou *still* annan bann provizyon anba sa lalwa ki dir ki Minis, *by way of gift* nou kapab donn pou en *park*, pou en landrwa ki annan pou fer keksoz syantifik enn sa bann zannimo.

Up to Minis, i a koriz mon *up to 15* par egzanp an se ki konsern *giant land tortoises*, *up to 12 or 15* mon krwar -

something like that up to ki konsern giant land tortoises.

E nou annan Mr Speaker, sa zistans ki nou, nou'n arive se ki nou'n menm entrodwir bann *subsidiary provisions well* Lezislasyon pour sak kategori.

Pour sa *bronze gecko* ki ganny konsidere enn bann lespes pli rar e anvwa disparisyon Sesel, ki son valer pou mon personnelman mon krwar i en valer *impossible to quantify*.

Akoz pou ou annan enn sa e annan enn sa dan ou koleksyon, i annan dimoun ki kolekte sa bann keksoz deor i annan en valer enkrwayab - inestimab.

War, parfwa ou *serve* en *purpose* Onorab Georges - inestimab.

So, kestyon ki Minis, i bezwen vin la en konvenk nou dan sa Lasanble, malgre ki nou pe siport ou; se eski ou annan sa kapasite pou ou *enforce* sa Lalwa?

Pou ou protez sa bann keksoz ki ou le ki nou, nou donn ou sa provizyon legal pou pini sa bann endividi ki fer sa lofans.

E la mon Mr Speaker, mon bezwen dir en keksoz, Lasanble Nasyonal depi bomaten in fer petet en fot, *focus* in lo manz lavyann torti, in lo manz isi e sa

dan li menm in anmenn en deba kiltirel la deor dan popilasyon.

Sa Lalwa i pa *about* lavyann torti, i *about* en lofans ki'n ganny komet anba sa Lalwa, pour ki napa en *fine* oubuyen en keksoz ki'n ganny enpoze.

Me kot mon pa vwar konsistans Mr Speaker, se dan en Lalwa ki nou fek pase; nou'n donn en *range* ant 100 mil e pa plis ki en milyon Roupri.

E mon pa konnen si ler zot in fer sa enn provizyon zot in konsider sa ki zot in mete dan sa Lalwa presedan, e sa i konsern *Trade in Wildlife and Fauna*.

Nou pa'n fer sa armonizasyon. Dan mon lopinyon nou pa'n fer aköz *Trade in Wildlife and Fauna* i egzaktaman sa ki nou'n diskite dan Lasanble ozordi.

Akoz i en *trade*, i *involve* en group dimoun organize ki annan zot rezo, ki annan zot fason tir sa zannimo dan sa landrwa kot i ganny proteze pour met li lo en bato; met li lo en avyon anvoy li dan en tel landrwa e fer li ariv dan sa landrwa kot i sipoze anmenn sa larzan pou sa dimoun ki pe fer li.

We fully support. United Seychelles pour toultan siport

proteksyon lanvironnman. Me i neserer ki dan nou pe sipote, nou osi angaz bann lotorite konsernen pour rod plis fason, pour rod plis mezir pou asim sa proteksyon.

Nou pa dan Lasanble ozordi pour fer en deba kiltirel lo *whether* nou pou manz lavyann torti oubyen non.

Nou dan Lasanble pou koz lo ki mannyer nou protez bann *asset* pou nou zenerasyon fitir. Akoz Mr Speaker, nou bezwen fer sa?

Pour bann Manm *FPAC* ki ti dan miting avek *SNPGA*, *SNPGA* pour li kapab *manage* son loperasyon, i kapab *generate at least* R40 milyon dan en lannen an traver son bann aktivite ki i fer.

E osi parey avek *SIF* ki osi *generate* en sonm sibstansyel atraver son bann aktivite. Be si sa bann atou zis an traver en dimoun vin get zot, an traver en dimoun vin war zot, i kapab *generate* sa *but the same time* nou pa kapab ranforsi proteksyon otour zot e anpese ki zot ganny tire dan nou teritwar anmenn en lot landrwa, Mr Speaker, *then* sa i kre en problenm pou nou.

Akoz ki pou arive? En dimoun i rod en *pair*, i konmans fer *breeding* an deor Sesel e i vann. E sa i en pert pour nou

pei. Dernyen fwa mon ti ganny sans vizit Aldabra Mr Speaker, popilasyon Torti Zean ti plis ki popilasyon Sesel.

E sa i en zefor konservasyon ki pandan plizyer lannen depi Gouvernman a Gouvernman in fer e nou, nou rikord lo sa kote latab an se ki konsern proteksyon lanvironnman i enpekab Mr Speaker, akoz tou sa bann zofisyete ki la devan in train anba ki Gouvernman? Anba nou Gouvernman.

E mon pa pe dir poudir sa bann dimoun ti napa zot konpetans me zot in travay, zot in travay zot in kontribye pour zot anmenn nou ziska la.

E apre zot kontribisyon zot zanfan, mon zanfan, zanfan nou zanfan pour osi fer zot kontribisyon pour anmenn nou pli devan. Se sa ki nou pe koz lo la ozordi Mr Speaker.

E si ou permet mwan ler mon pe sey regard tou sa bann provizyon legal ki egziste, mon ti a kontan si Minis, dan son *summing up* i dir nou - mon konnen in koz lo en armonizasyon pli larz, me menm si ou pe koz en armonizasyon pli larz, ou sitan annan bokou size dan lanvironnman ki konsern plizyer group enterese.

Ki manner ou *deal* ek sa konponan enportan, se ki lo ou kote ou, ou asire ki ou annan en *enforcement capacity* pou ou protez bann keksoz ki sipoze ganny proteze.

Se sa nou ki nou bezwen kapab reponn ozordi apre midi, e nou pa kapab kit Lasanble menm si Lalwa i en pti Lalwa e i koz dan en fason nostalgik lo en size ki preokip nou.

Akoz si nou, nou kontinyen fer li koumsa, i for probab bann dimoun ki pe ozordi pran lavantaz lo bann lackin ki annan pour kontinyen pran lavantaz.

Eski *enforce* en *fine* pou anpese ki sa boug ki an 2023 nou'n war sa rapor sorti, i kapab ariv ek sa bann torti Lespany? Non, i annan *fine* la i *still* kapab pase.

So where is the problem? Kote nou annan sa problem? Kote nou annan sa difikilte? Mwan, mon *believe* pou sak dimoun ki nou atrape i annan probableman 5 ki nou pa tyonbo. Mon kapab *wrong*, me sa i mon lenkyetid.

E mon santi poudir wi nou annan bann *finer* e i nesaser, *it's fair* i fer sans, napa largiman kont, me nou bezwen kapab *enforce* sa *fine*.

Nou bezwen kapab fer ki sa dimoun ki pou al fer sa, i pa

santi ki li i dan en *Wild West* kot i tou permet pour li kapab fer sa bann keksoz ki i pe fer.

En pwen pertinan Mr Speaker, pou nou Lasanble ozordi, ler mon regard *S.I. 51* e la ankor enn fwa mon bezwen dir poudir vwala kot mon pa santi nou'n al ase lwen.

S.I. 51 pa koz ditou e nou konnen ki manner sa lespes i enportan en, akoz la nou pe koz lo *the bronze gecko* ki en *protected species critically endangered*.

But we nou pa'n mete en *fine* ladan e i ganny trouve predominaman dan en landrwa Vallée de Mai.

So se sa ki nou bezwen nou menm nou kapab reponn. Se sa ki bezwen nou menm nou kapab regarde Mr Speaker, akoz si nou pa kapab fer sa i kre en kondisyon kot nou les bann keksoz pase ki esansyelman nou pa devret les pase Mr Speaker.

Bann keksoz ki nou devret rod tou fason pou nou kontrole dan en fason ki kler, ki montre poudir nou pe met lanfaz lo la.

Mon'n sey rod en konparezon; Lanmerik i annan sa ki apel *Fish and Game* apre i annan en lot lenstitisyon ki asir konservasyon.

Me pouwar sa bann endividi e resours ki zot

gannyen, i permet zot fer en kantite travay pou proteze, e anpese ki bann lespes anwva disparisyon ki trouve dan bann landrwa kot zot pe fonksyonnen pa ganny pran.

Kenya in rankontre plis menm difikilte avek par egzanz *poaching e ivory poaching* pandan plizyer lannen.

So nou, nou bezwen nou osi Sesel aprann lesan *from* bann pei ki'n rankontre sa bann difikilte e ki'n pas atraver sa bann peryod, kot zot in bezwen met bann mezir legal, *provide* bann resours pour kapab anmenn sa kalite proteksyon ki nou bezwen proteze.

E si ou regard par egzanz Mr Speaker, *Giant Land Tortoises Protection Regulations* ki si mon pa tronpe dernyen S.I. ti S.I. 40 an 2020, *ok*, son dezyenm bout i dir poudir en *Giant Land Tortoise i declared protected. Protected* e ou annan *breeders* e ou annan en biznes ki ganny fer, so ou *regulate* sa.

No problem aköz ou pa kapab *unreasonably deny* en popilasyon aktivite ekonomik ki kapab fer. *But at the same time* Mr Speaker, nou bezwen fer sir poudir ki mannyer nou kapab sa.

Aküz sa Lalwa par egzanz i dir ou okenn dimoun pa ganny drwa pran oubyen touy okenn *Giant Land Tortoise*; so en dimoun i kapab eksplik mon ki mannyer 77 pti torti in ariv Lespany.

Nou annan Lalwa. *We have the law* be sa i pa en refleksyon lo kapasite bann teknisyen, i pa en refleksyon lo kapasite bann dimoun ki pe travay. Me i en refleksyon lo en sistenm sistemik ki nou annan, ki nou annan provizyon legal menm si nou mete me nou pa kapab ranforsi li. Nou pa kapab met li an pratik.

Se la kot nou problemn i vini Mr Speaker, se sa kot nou bezwen adres defayans ki nou annan.

En lot pwen enportan Mr Speaker, i annan en pwen *clause 6* ki dir i pa en reklesyon li Minis.

Minis, i kapab eksport en *adult giant on behalf of the Government of Seychelles a maximum of 15 adult Giant Land Tortoises each year to any person or institution as a gift for scientific purpose.*

I byen sa, aköz ou bezwen annan en relasyon avek bann lorganizasyon enternasyonal ki *provide* bann led dan konservasyon. *This is not a reflection on that, but assume* ki

apre ki ou'n ariv *at that other end* laba kontrol pa parey e en *pair* i ganny pran *and then breeding starts and then* ou al dan sa problem.

So, nou bezwen annan bann mezir, bann *mechanism* pou fer sir poudir i annan en verifikasyon, i annan en prosedir, i annan *tout* en *chain of events* ki bezwen ganny *dealt with*.

Pou asire ki zisteman nou *achieve* sa ki nou le fer ozordi apre midi, par pas zis en *clause* dan en Lalwa. *This is where we are* Mr Speaker, ozordi. Se la kot nou ete.

I annan Lalwa kont *illegal fishing* Mr Speaker, be eski nou pe anpes sa bann dimoun ki pe pran tou nou ton pran nou ton? *Can't do it*.

As *I speak* ozordi Mr Speaker, makro in preski disparet lo nou bann bazar e peser pe dir ou napa labwet.

This - i pa en refleksyon sa i *about* en *thought process* ki nou bezwen fer pou nou konpran poudir, nou tou nou bezwen parti prenan dan sa proses ; ki ou *LDS* ki ou *US* Sesel i pou nou tou.

Sesel pou nou me parfwa zot ganny mon krwar Gouvernman, serten dimoun dan Gouvernman petet zot fek vin dan Gouvernman zot ganny

myopia e zot panse poudir Sesel se zot. Sesel pa zot...

(Interruption)

HON SEBASTIEN PILLAY

So Mr Speaker, pou nou *achieve* a en pwen ki permet nou tou ariv lo en pwen konversyon, a en pwen konversyon, kot nou tou nou kapab partisip dan sa ki nou pe fer, fodre nou les nou tou kapab partisipe.

Fodre pa ki nou swazir ozordi pa akoz sa boug i siport mwan dan Gouvernman mon kit li akote. Fodre ki nou *allow* lezot dimoun ki kapab ed nou, ed nou.

I annan en kantite ki anvi ed Minister Lanvironnman, ki anvi vin devan pou ed zot, me nou bezwen rod fason pou nou ranforsi kapasite Minister Lanvironnman pou li fer sa ki i pe fer.

Akoz *enforcement* i enn bann keksoz ki nou bezwen fer, ki nou bezwen *deal* avek Mr Speaker.

An konklizyon Mr Speaker, mon pa'n vin asize la ozordi apre midi zis pou mon regard en *clause* Lalwa. Mon'n fer mon devwar pou regard sa ki nou'n fer dan Lasanble bann kestyon ki mon ti demande ler sa Lalwa pe pase e ki dan mon

lopinyon in napa armonizasyon ant sa ki nou'n fer avan.

Mon pa dir i en fot - i kapab en *oversight* in napa ase armonizasyon ant sa ki nou'n fer e sa ki nou pe fer ozordi.

E ki prezan ti devret al en pti pe pli lwen, pour zis fer antre serten provizyon e dekal li par egzant Mr Speaker.

Mwan, mon krwar pinisyon pou en dimoun ki set *traffic in a Bronze Gecko* ki enn bann *critically endangered species* i pa kapab R25 mil.

I bezwen *at least* R100 mil, akoz sa lespes ler ou pou al vann li son valer in inestimab be i napa en lot fine ki'n ganny prekonize pour li dan en lot Lalwa.

Sa sa ki mon pe met devan Minis, ki nou kapab konsidere dan sa proses. E mon le dir Mr Speaker, ki mon pou siport sa Prozedlwa akoz mon krwar dan proteksyon lanvironnman.

Mon krwar ki lanvironnman mon pei i asir legzistans zenerasyon fitir. Mon annan zanfan e mon ti a kontan mon zanfan demen i partisip dan proteksyon lanvironnman, i partisip dan sa ki pe pase.

Mon annan zanfan ki partisip ladan aktivman. E mon ti a kontan ki nou Seselwa nou pran konsyans nou rol konman Seselwa, nou rol konman bann

dimoun ki sipoze protez sa ki nou'n gannyen.

E zisteman viv sa lespri Mr Speaker, sa lespri ki Seselwa an premye; Sesel premye avan tou. Mersi Mr Speaker.

MR SPEAKER

Mersi Onorab. Mon a donn laparol Onorab Henrie.

HON GERVAIS HENRIE

Mr Speaker, anba *Order 61(d)* i permet en Manm fer en lesplikasyon kler akoz en keksoz ki Onorab Pillay in dir.

Letan in akiz mon pou atak bann dimoun dan lanvironnman e ale in mansyonn Mrs Jeanne Mortimer *Doctor* e apre Mr Chong-Seng.

Mon pa'n nonmen non sa bann dimoun ditou ; sa ki ti *inconveniently leave out* se mon'n mansyonn 2 ansyen Minis Lanvironnman, dabor *Doctor* Rolph Payet ki ti fer prononsman, an Desanm 2012 pour amann sa Lalwa ki nou pe amande pou anmenn pinisyon pli sever.

E apre en deklarasyon fer par Minister Lanvironnman le 20 Desanm 2019, kan Onorab Wallace Cosgrow ki ti Minis, ankor pou sanz Lalwa e anmenn pinisyon pli sever.

E tou lede ki ti 2 politisyen dan zot parti pa'n fer. *That's what I spoke about.* Mersi Mr Speaker.

MR SPEAKER

Bon *ok*, nou aksepte ki ou'n met en klarifikasyon ki konsern ou. Onorab Labonte, ou annan laparol.

HON ANDY LABONTE

Mersi Mr Speaker. Bonn apre midi Minis, avek ou *panel* e tou dimoun ki a le kout.

Mr Speaker, ou konnen dominasyon lo tou bann kreatir, kree par Bondye i enn bann dinyite imen. E rezon mon pou dir sa aköz dan *Psalm* 8 vers 6 a 8 i dir nou ki nou'n ganny dominasyon lo tou sa ki ou'n kree.

In met tou anba nou kontrol mouton ek bef menm bann zannimo sovaz, bann zwazo dan lezer, bann pwason dan lanmer e tou bann kreatir dan losean.

Mr Speaker, i egzaktman, aköz tou sa ki'n ganny kree Bondye in met nou imen pour nou annan dominasyon lo la parey in ganny dir.

Me ler in ganny dir me ler in donn nou pou nou annan dominasyon lo la, i pa vedir ki nou bezwen eksplwat li, a en

limit ki i *extinct*, ki finalman nou pa war li *or ganny*...

Ou konnen en keksoz ki nou bezwen realize kwa ki mon kontan about sa Lalwa Mr Speaker, se ki i annan en rezon aköz ki diferan pei i annan diferan kalite lespes.

E parfwa nou manke pou nou war rezondet deryer sa, so i enportan ki avan ler petet menm nou ale nou fer kaso en Torti Zean en lot pei, kot mon konnen *US* dan lepase in fer sa a plizyer lezot pei.

Ozordi mon tann Onorab Sebastien Pillay, pe koz lo la san realize se zot ki ti konmans fer sa. So i enportan ki mon pou siport sa Lalwa Mr Speaker, aköz i montre ou i annan en rezon, aköz i annan bann kreatir dan diferan kalite pei e i annan son rezon dan biodiversite e leko sistenm.

E nou'n koz bokou lo plizoumwon torti mon tann koz lo la me ou konnen torti, la mon'n tann Onorab Pillay ancor in koz lo ton. Losean i gran, i borde partou kote, me mwan petet kwa ki pli enteres mwan ler nou get nou pti pei li menm li ou konnen nou annan parey nou lanmar, nou larivyer.

So ler nou pe koz lo sa Lalwa ki koz lo *Wild Animal Bird Protection* i fer mon mazin enn nou ansyen istoryen ki'n kit

nou Mr Tony Mathiot ki ti dan mon distrik.

Plizyer fwa mon'n koz ek li, i annan bokou *knowledge* lo plizyer sa bann keksoz e ou konnen li menm li i al laboratwar dan li menm.

E i enportan pou nou fer refleksyon lo eski nou pa merit pe *extend* petet sa group zannimo, ki nou pe get li konman bann lespes ki nou merit pe proteze. E war son vre rezondet? Akoz la parey nou pe gete ler nou pe get nou gourzon, ler nou pe get angi; ou konnen ou konnen tousala i annan en rezon akoz ki i la.

E tou dezyenman nou pe war se ki i annan bann etranze ki dan nou pei, i pe lapas sa bann pti pwason dan nou bann lanmar partou kote, *just for the sake of* lapas apre zot pe zete. Petet zot konsonmen, wi. Me i plizoumwèn... ou konnen mon lo sa laspe sa ki mon krwar poudir i enportan.

E Mr Speaker, i osi enportan pou nou realize ki dan lepase parey nou'n war, sa Lalwa i egziste depi 1961 in ganny dir son *principal Act* e la i en lamannman ki pe ganny anmennen.

Plizoumwèn dan sa fine ki pou vin dan zar en *deterrent* pou anpes bann endividi fer trafik sa bann tel lespes. So- e

mon apresye ki Minis, osi in dir ki tre byento i pou vin avek en Lalwa konplet ki pour kouver tou bann lezot.

Sa Lalwa annantye si ou le ki pou kouver tou keksoz an zeneral. So Mr Speaker, mon ti a kontan ki Minis, petet in donn nou en si ou le en konfirmasyon oubyen en leklersisman, eski ler nou pe koz *Wildlife* avek *Bird Protection* ki vreman bann group ki nou pe koz lo la; akoz i enportan pou piblik la deor ki konsernen avek nou lanvironnman li menm li.

Akoz plizyer fwa parey mon'n dir nou konsantre plizoumwèn lo torti e lavyann torti - ou konnen me i annan bokou plis ki sa ankor. E mwan avek sa lespri ki mon pou siport sa Lalwa.

E menm parey parler nou pa reflexir petet nou entrodwir menm bann lezot lespes lo en lot zil, *without* mazine petet kwa ki danze i kapab kree.

Malgre ki li sa Lalwa i pe plizoumwèn koz lo ilegal, bann keksoz ilegal ler ou pe eksport li dan en fason ilegal. Me mon ti a plizoumwèn kontan ganny plis lenformasyon lo si sa Lalwa prezan ki nou pe pase, *or* dan sa enn tre nouvo ki pe vini ki Minis, in dir nou e larzi en pe sa bann lespes ki pou ganny

kouver konman nou bann aki enportan pou nou pei.

So, Mr Speaker, mon pa pou long aköz bokou in ganny dir depi bomaten me pour mon, mon santi poudir ti enportan aköz ler ki mon'n koz avek serten dimoun dan mon distrik se sa ki zot in anvi konnen.

Eski sa Lalwa i vremen pe koz zis lo torti *or* ler nou pe koz *wildlife* i enkli plizyer lezot lespes, parey nou konnen poudir i annan serten peryod letan osi kot nou Seselwa nou ti kontan manz menm sousouri.

E parler nou ti krwar poudir i pe ogmante son popilasyon, me yer mon'n aprann atraver *LGB* ki li i annan plis *knowledge* lo la ki dan plas ogmante i pe *decrease* kontrè.

So petet tousala i bann ledikasyon ki nou bezwen fer nou pep konnen, aköz petet i vre sa Lalwa i kourt, me selman nou popilasyon i vremen enterese pour konnen kwa ki nou pe vot lo la.

Aküz i ava permet zot konnen si nou pe pran kont tou lezot keksoz. Aköz menm parey ler nou'n tann Onorab Sebastien Pillay, in koz lo makro - i nepli war makro.

Me nou oublie poudir li menm li tou dernyerman pli boner in koz lo i ti pe fer

anmenn en lager dizef zwazo, me San realize poudir tousala i relye avek aköz ki nou zwazo pa pe ponn e i al dan bann lezot landrwa, aköz i mank sa bann lespes ki zot *feed* lo la.

So i en leko sistenm konplet. Alor Minis, mon se sa ki mon, mon ti a kontan petet ler ou pe konklir fer konnen lepep poudir bann desizyon ki nou pe pran, nou pa pe pran li aköz nou anvi pran, me nou pe pran li aköz nou pe konserve.

E parey mon'n dir Bondye in donn nou dominasyon lo la wi, me in donn nou dominasyon nou bezwen konn servi li e servi li dan en fason li dan en fason byen apropiye.

Ki demen nou zanfan nou pti zanfan i a osi kapab rezoue konnen, parey in ganny dir oparavan, nou pa zis war portre - parey Moris nou konnen poudir zot nepli konnen ki mannyer Dodo ti ede me plito war en portre *that's all*.

So nou Sesel nou pe pran sa pa pou fer sir ki nou pe protez nou leko sistenm, nou biodiversite. Alor Minis, mon ti a kontan mon kontribisyon i vin plizoumwen lo la petet ler ou pe konklir, zis donn nou en pe plis lenformasyon lo la.

Malgre ki nou konnen poudir sa *Bill* i plizoumwen pe koz lo pou li ogmant sa *fine*, me

Lepep Seselwa i pli anvi konnen kwa ki dan son lanvironnman li menm li.

So avek sa 2 mo Mr Speaker, mon pour donn mon sipor pou sa Prozedlwa, aköz mon war poudir Minis, pe fer bon travay e mon pou dir Minis, kontinyen lo sa bon larout.

Parey nou Prezidan i kontan dir, annou kontinyen konsantre lo nou travay, oubliy sa bann tapaz, les bann ki pe gronnyen kontinyen gronnyen be nou, nou bezwen kontinyen travay les bann ki anvi ronfle, ronfle. Mersi.

MR SPEAKER

Bon. Mon a termin deba avek Onorab William.

HON WAVEN WILLIAM

Mersi Mr Speaker. Bonn apre midi tou dimoun ki a lekout. Mr Speaker, mon pa kapab konmanse par san remersi Bondye pou sa zoli pei ki'n donn nou.

Nou kontinyelman demann son gidans pou administre li byen lo en baz soutenab atraver bann tel aksyon parey parmi sa Lamannman ki devan nou Mr Speaker.

Mr Speaker, rezondet sa lamannman, i nesese pou dekouraz trafik ouswa aktivite

pou fer ek nou biodiversite e ekosistem soutenans ki sipor nou devlopman sosyoekonomik.

Lemonn i rekonnet ki lanvironnman global ek tou son bann lespes maritim biodiversite nou ekosistem bezwen ganny zere, proteze e administre byen pour ede pou reste soutenab.

Sa proze target devlopman soutenab adopte par Nasyon-z-Ini an 2015 e met ann aplikasyon 2016 sa lamannman i enportan pou rezilyans devlopman pei e rezilyans son lanvironnman.

Mr Speaker, Sesel in form parti sa lagreman partenarya pou devlopman soutenab global.

Mr Speaker, i enportan ki mon'n mansyon sa bann target i annan 17 an tou.

- Premye, se met en lafen avek lapovrete dan tou son form.
- Dezyenman, elimin sityasyon kot napa manze e atenn sekirite alimenter, nitrisyon e promot aktivite agrikol soutenab.
- Trwazyenm, se asir lavi an bonn sante e promot byennet pou tou laz.
- Katriyenman, se asir kalite ledikasyon e donn dan en fason ekitab e

promot loportinite, laprantisaz pou tou lonterm.

- Senkyenmman Mr Speaker, promot egalite ant zonm ek fanm e *empower* bann madanm ek bann fiy.
- Sizyenm *goal* se asir bann sours delo potab e soutenabilite dan ladministrasyon delo e sanitasyon.
- Setyenm *goal* i koz lo asir ekse ek lenerzi afordab e lenerzi renouvlab pour tou.
- *Goal* wit se promot lagrandisman ekonomik enkliziv e soutenab prodiktivite lanplwa e travay desan.
- Nevyenm, se batir lenfrastruktir rezilyan promot aktivite endistriyel enkliziv e soutenab e inovasyon.
- Dizyenm *goal* se redwir inegalite dan pei e ant pei.
- Onzyenm, se fer bann lavil soutenab e landrwa enkliziv, sen, rezilyan e soutenab.
- Douzyenm, se asir konsanpsyon soutenab e prodiktivite.
- Trezyenm, se pran mezir e aksyon irzan pou konbat

sanzman klima e son lenpak.

- Katorz, se konserv itilizasyon soutenab nou losean delo e devlopman soutenab nou resours maritim.
- Kenzyenm, se pou protez restore e promot itilizasyon soutenab nou ekosistenm teres, nou fore konbat dezertifikasyon anpes degradasyon e kontrol regresyon dan nou biro diversite.
- Sezyenm, se pou promot lape, lazistis en sosyete fer provizyon, akse ek bann lenstitisyon bann Gouvernans pou asir latransparans e rann kont.
- E dernyen Mr Speaker, diset se ranforsi mwayen pou enplimant e revitaliz partenarya pou devlopman soutenab iniversel.

Mr Speaker, parey bann diferan lespes dan nou leko sistenm, sa 17 target zot enterkonnekte san enn a lot progredemars pou atenn zot pou difisil.

Sa lamannman nou ede sofgard, protez zesyon nou bann lespes sirtou bann ki andemik kont disparisyon.

Mr Speaker, listwar i montre ensi ki realite ki lafore e rezerv natirel Sesel i annan serten bann lespes zensek, zwazo, plant e lavi maritim ki form parti nou ekosistenm.

Dapre listwar se dan ver milye dizwityenm syek ki Sesel ti ganny okipe par imen in annan eksplwatasyon nou *Flora e Fauna* atraver bann aktivite *sport* ant traver revitayman.

Sa ti fer serten sa ti fer serten lespes al an disparisyon tel parey *Marianne white-eye*, *Seychelles parakeet*, e Krokodil Delo Sale.

Depi apre lendepandans Gouvernman Sesel ti pran serten bann mezir ki ti neser pa vadir as dekwa pou protez nou bann *Flora e Fauna*.

Sesel i pli byen plase ki serten bann zil nou sou rezyon parey Moris e Maldiv ki'n konn bann disparisyon enkrwayab.

Kronm rekomandasyon Mr Speaker, atraver sa Prozedlwa mon ti a kontan demann Minis, pou konsider donn plis prominans e vizibilite sa seksyon lafore Mr Speaker, ki mon santi dan lepase ti mars byen. E ti

annan lizye dan nou bann fore e ti pe zwe en gran rol.

Mon rekonnèt zefor Minister, demars ki pe ganny fer pou moderniz e re organiz zot bann diferan departman pour vin pli efikas. Ki zot osi konsider annan en fo pour rekonpans sitwayen Seselwa, ki donn lenformasyon kredib pou anpes bann tel aksyon trafik nou bann lespes.

Ler ou pou donn valer sa lespes lo marse enternasyonal letan ou pe vann, akoz pa kapab rekonpans sa *whistleblower* ki

ava fer pep Seselwa vin pli avangard e zwe plis sa rol *policing*. Akoz Minister, mon santi poudir *challenge* se i lo kote *policing*.

An terminan Mr Speaker, mon dir ek Minis, ki mon pou *stand strong* an sipor sa Lamannman parey nou'n fer Dimans le 28 Zilyet pou konvansyon.

Aktivis, siporter, senpatizer ti desann trankilman pou menm rezon pou *stand strong* par deryer LDS konman sa parti ki sel opsyon pou Sesel.

(APPLAUSE)

HON WAVEN WILLIAM

Mr Speaker, lekip organizater i dirizan parti *LDS* i dir zot mersi e dir ek zot ki ansanm nou pa pour zanmen les tonbe; viktwar 2025 dan lentere Sesel! Mersi.

(APPLAUSE)

MR SPEAKER

Bon. Mersi bann Manm pou zot kontribisyon lo *Bill*. Minis, mon ava envit ou fer ou repons e konklizyon.

**MINISTER FLAVIEN
JOUBERT**

Mersi Mr Speaker. Mersi bann Manm pour zot kontribisyon.

Mr Speaker, mon ti a kontan konmans mon entervansyon par eksprim mon lapresyasyon pour tou bann Manm Lasanble ki'n koze e zot sipor inanim ki zot in donn sa lamannman ki nou pe vin avek pour sa *Lalwa Wild Animals and Birds Protection Act*.

Mon krwar tou bann Manm ki'n koze, irespektiv zot perspektiv politik zot war sa nesosite pour nou anmenn bann nouvo penalti.

E pour nou anvoy en mesaz kler pour bann dimoun ki pe fer sa bann aksyon ki pe afekte nou bann lespes dan pei.

Plizyer Manm in koz lo sa lespri konsern pou lanvironnman dan sityasyon

ozordi, dan konteks ozordi e mon krwar i enportan ki nou bann piblik osi ki pe ekoute zot osi pran sa legzanp, kot malgre nou bann diferans nou tou nou tonm dakor lo bann keksoz fondamantal ki pour nou pei, e enn parmi se proteksyon sa lanvironnman ki siport tou dimoun dan pei.

I annan Manm ki'n koz lo prezervasyon nou bann ekosistenm, i annan Manm ki'n koz lo sa lamannman i anvoy en mesaz pour bann dimoun, me osi pou lemonn lo nou lanbisyon pou protez nou lanvironnman.

I annan Manm ki'n koz lo prezerv bann kantite lespes la kantite lespes ki an danze e nesosite pour nou asire ki sa bann lespes pa ganny afekte.

I annan Manm ki'n koz lo lefet ki nou bezwen kit deryer en lanvironnman ki osi sen, ki nou annan ozordi ki nou kapab pas avek lo zenerasyon e bokou Manm ki'n koz lo zenerasyon ki swiv.

I osi annan Manm ki'n koz lo zeneralman bann ki'n partisip dan sa bann zefor dan lepase, e bann zefor ki zot in fer ki nou, nou bezwen kontinyen anmenn devan konman bann partisipan e dirizan ozordi Sesel.

Alor mon krwar nou apresye ki tou dimoun in konpran, ki nou bezwen en nivo penalti pli o ki osi ede pou anvoy en mesaz e fer ki dimoun pa santi zot konfortab pour zot kontinyen fer sa bann aksyon.

En lot pwen ki'n leve Mr Speaker, se statik lo bann *cases* ki kantite bann *case* ki annan dan bann lannen resan e kwa ki pe fer nou al devan avek bann nouvo lamannman.

An 2020 Mr Speaker, ziska 2024, 2020 e sa i bann *case* ki'n ganny fayle - pa bann *case* ki'n ganny raporte, raporte en kantite nou gannyen tanzantan preski tou le semenn, tou le 2 semenn nou pe ganny rapor avek diferan group dimoun.

In annan bann lenvestigasyon ki'n ganny fer sa i bann *case* ki'n ganny file.

2020 ti annan 6 ka ki'n ganny file e prensipalman i annan pou fer ek lavyann torti, 2021 i annan 3 ka ki'n ganny file, 2022 3 ka, 2024 3 ka ziska la konmela e nou pe prezimen ki ziska lafen lannen nou pour annan bokou plis.

E alor anmezir ki nou get bann ka pe ogmante, 2024 sirtou nou annan bann siny ki annan en kantite bann aksyon pe ganny fer dapre bann rapor nou pe gannyen.

E dimoun pe vin plizanpli ardyese dan en fason, nou vwar ki i neser pour nou anvoy en mesaz kler pour bann ki pe fer sa bann aksyon dan pei.

Alor kot i konsern statistik Mr Speaker, i kler ki nou annan plis aksyon ki pe ganny fer dan pei e plis dimoun ek plis group dimoun ki pe partisip dan sa bann kalite aktivite. Ki fer ki nou osi fer monte bann penalti pour reponn a sa bann sityasyon.

Kot i konsern *enforcement and compliance*, mon krwar bokou bann Manm in koz lo lefe ki nou bezwen fer sir ki nou nivo *enforcement and compliance* i solid. E la mon pou pran 3 pti pwen sorti dan entervansyon Onorab Pillay Mr Speaker, ki relye avek *enforcement and compliance*.

Enn, Onorab, in nonm sa size 72 ti torti ki'n ariv Lespany ki nou pe demann kekyon ki mannyer in fer pou kit Sesel.

Nou'n demann lenformasyon avek Lotorite Lespany eska konmela nou pa ankor gannyen lo kote sa vol, lekel sa vol ki sa dimoun in pran, pour nou kapab *trace* kote lotel ki i ti reste lekel ki'n fer kontak avek, eksetera.

Me nou pa ankor gannyen lenformasyon sifizan ouswa

lenformasyon li menm avek Lotorite Lespany, pou nou kapab retounn ann aryer e tras son larout ziskan Sesel; e konnen egzaktman ki in fer e kote in reste letan in la e lekel ki'n asosye avek.

Akoz potansyel an pour ou fer en aksyon parey i pa zis pran en dimoun tousel, aköz ou pa kapab vin ek en valiz ranpli ek 72 pti torti ou pa pou zwenn sa; i bezwen annan bann asosye - i bezwen annan diferan landrwa ki pe fer sa.

E osi potansyel an i bezwen annan dimoun lo *border* osi ki petet pe fasilite sa kalite aksyon. Nou bezwen toultan rapel ki ou pa traverse lafrontyer fasilman avek nenport kwa. I annan bann posibilite ki annan bann asosye ki pe donn lanmen fer sa bann keksoz.

Onorab, ou'n osi nonmen ki *alignment* ant sa Lalwa avek Lalwa *Trade in Wildlife* i pa neserman egzakt, me mon koleg *AG Office* ki la akote mon i kapab klarifye, sa i 2 diferan Lalwa.

Alor si en dimoun i ganny sarze pou en lofans, i pou ganny sarze enn anba *Wild Animals and Birds Protection Act* pou en lespe ki ganny kouver anba sa Lalwa.

Me dezyenm si i pe fer komers, i pou ganny sarze anba sa lot Lalwa pou komers. Alor i pa neser ki sa 2 Lalwa i egzaktman *match* ek kanmarad, aköz toultan tou fason i pou desarz e anefe i pou double aköz i pou annan 1 anba en Lalwa e lot anba lot Lalwa e potansyel an plizyer sarz anba menm Lalwa.

Lot keksoz Mr Speaker, se Onorab in lev sa pwen lo *S.I. 51* ki konsern *bronze gecko* e ou'n dir nou ki napa okenn *fine* asosye avek.

Si ou get dan amannman Onorab, ou pour vwar ki i annan en bout ki dir *where no such penalty is prescribed* alor sa dimoun i fer fas avek en penalti 25 mil ouswa ziska 1 milyon.

Alors si en penalti pa'n ganny *prescribed* anba sa *S.I.* otomatikman i retonm sa enn ki dan Lalwa; alor i annan en kouvertir menm si pa pou war li dan *S.I.* i pou ganny kouver anba sa Lalwa ek sa amannman ki nou pe fer la ozordi.

Lot keksoz Mr Speaker, kot i konsern *enforcement and compliance*, mon krwar bann Manm in fer byen kler zot pwen, ki nou bezwen ranforsi nou kapasite e nou konpetans lo kote *enforcement and compliance*.

E nou dakor ki pa toultan ki keksoz i ganny fer lo sa nivo ki ed nou atrap bann ka e fer sir i ganny fayle pa zis ganny entersepte, pa zis ganny lenformasyon lo la me ganny file, e lenformasyon korek ganny anmase.

Sa lannen avan lafen lannen nou annan en bann *workshop* ki nou pe organize pou *training* bann diferan dimoun, e bann *partners* ki enplike dan bann size ki annan pou fer otour *wildlife* ek *enforcement*.

E sa nou'n fini konmans resarz lenformasyon avek Lakademi Lapolis, pour nou kapab *run* sa formasyon sirtou prenan kont ki nou annan bann nouvo dimoun ki'n antre ki bezwen ganny en *upgrade* dan zot konpetans.

Nou osi parey nou'n eksplike e nou pou eksplike ankore dan letan Bidze, ki lo kote Minister nou pe re organiz nou lekor e nou pe fer en nouvo *unit* ki apel *Legal Enforcement and Compliance* avan sa lannen ti en *legal officer* ki avek nou isi ozordi apre midi.

Me nou pe re aranz nou ki nou annan en *unit* ki annan plis ki en *legal officer*, ki annan plis bann dimoun teknik, ki kapab ed nou pou vreman ranforsi

kapasite dan Minister e osi parmi bann *partner* an deor.

E osi fer ki nou kapab fer plis prosekisyon, aköz enn bann lakle dan sa size *enforcement* se fer sir ki dimoun i ganny tape avek en penalti lo finisyon sa lasenn.

E nou war ki bokou fwa nou fayle *case*, *case* i ariv devan Lakour, i ariv devan me pa toultan ki sa dimoun i sibir konsekans atraver en penalti, ouswa atraver en santans.

Alor nou, nou ti a voudre ki nou ranforsi lo sa kote menm nou'n koz lo lefet ki nou kapab evantyelman annan en prosekiter ki pou ed nou fer bouze nou bann ka.

E fer ki nou pa war nou avek sa bann kes parey in ganny mansyonnen par en Onorab bomaten; Onorab Henrie mon krwar, kot en dimoun plizyer dimoun dan en group in ganny atrape in ganny anmenn devan Lakour, me apre en bon pe i *end up* sape.

Alor nou ti voudre ki annan mwens bann sityasyon kot dimoun i sape e plis sityasyon kot dimoun i santi pwa Lalwa, ki zot prezan i vin en mesaz pou lezot ki ti a kontan eseye fer menm aksyon dan pei.

E osi Mr Speaker, nou annan bokou bann relasyon ki nou pe devlope avek bann

partner parey *Coast Guard*, parey Lapolis ki nou'n annan, nou'n toultan travay avek zot.

Parey bann lorganizasyon ki travay dan bann *protected areas* dan bann zil pros e osi dan bann zil elwanye, pour ki nou kapab fer en pli bon travay letan i annan bann ka kot nou entersepte dimoun pe fer bann aksyon kont sa bann lespes.

E resaman nou vwar ki avek *Coast Guard* nou'n ranforsi tre byen nou bann relasyon e nou pe fer bann travay konzwent pour ki nou kapab entersepte bokou plis bann mouvman, bann lespes ki'n ganny tire dab lanvironnman natirel.

Alor i annan keksoz ki nou pe fer lo kote *enforcement and compliance*. Nou pa kapab dir ki deswit nou pou war rezilta, me nou pe swete ki anmezir nou ale i pour annan ankore keksoz ki nou pou vwar lo kote rezilta.

Lo kote *border* Mr Speaker, nou konnen poudir *border control* sa bout *biosecurity* i tonm anba nou Minister anba Departman Lagrikiltir.

E la i annan osi ankore en pe travay pou nou fer lo kote lekipman, lo kote prosedir e osi avek bann redevlopman *airport* lo kote bann fasilite ki nou kapab met an plas pour nou fer

sir ki nou detekte pli byen bann bagaz ki pe travers *airport* ozordi.

Akoz parey serten Manm in fer sorti parfwa nou pe get bann keksoz parey bann sibstans ilegal. Me nou osi bezwen met plis latansyon lo bann lezot materyo ki dan bagaz, dan valiz ki nou pe kapab detekte sa bann zannimo ouswa sa bann lespes letan i pe pase pour nou kapab pran bann aksyon avek sa bann dimoun.

Lo revizyon Lalwa Mr Speaker, nou'n fini konmans fer en travay dan Minister. I annan bann lesanz dokiman ki'n ganny fer avek Atorni Zeneral ek bann *partner*.

Nou pe espekte ki by katriyenm kar lannen, nou pou kapab antre an konsiltasyon avek bann Manm Lasanble konman dan en fraz konsiltasyon.

E nou pe espekte ki posibleman boner 2025 si keksoz i mars byen, petet menm premye kar 2025 nou a kapab formelman annan en Lalwa dan nou lanmenm pour nou diskite.

E sa Lalwa pou adres pwen ki dernyen entervenans, avan dernyen Onorab Labonte, ti pe koz lo la.

Sa Lalwa ki nou pe vin avek nou pe espekte ki i pou kouver bokou plis lespes ki sa bann ki'n ganny liste dan sa 9 *S.I.* ki ganny trouve anba sa enn Lalwa. Sa Lalwa aktyelman i apel *Wild Animals and Birds* nou le fer li vin en pe pli larz e apel li en *Wildlife Protection Act* nou a donn li son non egzakt apre.

Me selman, i pou kouver plis *Wildlife* e plis lespes anba la nou ava annan plis proteksyon letan nou annan bann lensidan avek bann lespes ki nou pan liste isi dan sa enn Lalwa.

Mr Speaker, lo kote *partnerships* ek bann lenstitisyon piblik nou'n koz lo bann diferan lenstitisyon ki potansyelman nou travay avek. Mon krwar Onorab Porice, in koz lo *National Parks* Onorab Pillay osi in koz lo *National Parks*, lezot dimoun in koz lo bann lezot antite.

Wi, nou met an valer sa bann *partnership* mon krwar i ed nou en kantite e i pou ed nou pour nou kapab fer pli byen nou louvraz, si nou kapab ed zot pour zot amelyor zot konpetans.

E bann proze ki nou'n fer resaman in ede pour nou amelyor konpetans ek Lalwa dan sa bann landrwa, par egzantp i annan bann nouvo

Lalwa konsernan bann *protected areas*.

E nou ti a voudre ki nou osi kapab donn zot en sans, pour zot partisip dan bann *training* dan *enforcement*.

Akoz sa bann zofisye dan sa bann lenstitisyon, zot osi annan bann responsabilite ek bann dwa ki zot kapab egzerse an relasyon avek sa bann lespes.

Enn bann keksoz ki mon ti a kontan fer aktyelman la se remersi bann piblik aköz zot osi zot zwe en gran rol dan nou zefor.

I annan en kantite dimoun piblik parfwa anonim, ki donn nou en kantite lenformasyon e mon krwar nou bezwen rekonnet sa dan nou zefor *enforcement*, aköz i pa pou marse si nou pe zis fye lo bann zofisye ek bann zofisye Minister.

Me nou annan en kantite dimoun ki zot pa pou nonm zot non, zot pou zis dir ou bann keksoz ki finalman vwar poudir i vre.

E savedir i montre poudir i annan en kantite manm piblik laba deor, ki konsernen e ki ti a kontan nou met an plas bann mezir apropiye, e mon krwar ki ozordi zot apresye sa ki nou pe vin avek lo kote amannman dan

Lalwa pou protez bann lespes dan pei.

Mr Speaker, detrwa pti pwen ki bann zofisye, bann Manm Lasanble in leve mon ti a zis pas lo la vitman;

I annan *review of sa S.I.* ki konsern sa bout ki annan pou fer avek fouke Onorab Hoareau in leve, i pou tonm dan sa *review* ki nou pe fer nou pou vin avek bann sanzman letan nou prezante e tou bann Manm i a ganny sans debat lo sa morso.

Eski i annan en ka ki'n *set off* sa amannman? Mon krwar Onorab Cosgrow, ki'n lev sa pwen.

Pa neserman en ka me selman letan nou pe get tandans, tandans i dir nou poudir in ler pou nou fer sir nou annan en bon mesaz kler lo kote penalti.

Ki dimoun i kapab vwar poudir i annan en penalti ki serye si zot fer bann aksyon; e sa ki pe fors nou pou nou al vit lo sa bout, pou nou fer sir ki nou pez en pe sityasyon e dimoun i santi poudir zot pa merit pe fer sa bann aksyon.

Onorab Porice, in koz lo bann *issues* lo zil *Curieuse*, byensir nou bezwen donn *backing* nou bann dimoun lo *Curieuse*.

I annan *Marine Police* e osi i annan *Coast Guard* dan sa

rezyon ki ozordi pe kit en pli bon lizye dan sa rezyon e pe donn zot en pli bon sipor.

Nou krwar ki byento nou pou kapab asiz ankor avek *Coast Guard* pou nou tonm dakor lo serten *mode* loperasyon avek zot me bann zofisye *National Park* zot osi bann dimoun ki *authorized*.

I annan en pe travay pou nou kontinyen fer avek zot, pour zot vin pli konpetan, pour zot kapab osi egzers osi zot prop responsabilite konman bann zofisye ki otorize pou pran aksyon.

Youth offenders; Onorab Uranie, ti lev sa pwen *youth offenders* ki pou arive si en dimoun par anba laz in fer en lofans anba sa Lalwa.

Mon koleg Mr Hill akote mon sorti kot Atorni Zeneral in dir mwan ki i annan en Lalwa ki apel *Children's Act* e anba *Children's Act* seksyon 75 i annan en *Juvenile Court* e sa *Juvenile Court* li i kapab determin ki kalite aksyon i pou pran ek sa zanfana.

E ki mannyer penalti pou ganny enpoze swa lo sa zanfana, swa lo son paran, swa lo son bann dimoun ki pe pran ka avek li depandan lo sityasyon sirkonstans sa lofans mannyer in ganny komet.

Alor i annan en provizyon legal ki pou permet, pou *deal* avek sa bann ka parey san ki nou bezwen met okenn provizyon ki konsern bann *young offenders* anba sa enn Lalwa.

Ou'n koz osi lo program re lokasyon Vev ki en program ki nou krwar pe al ase byen e wi lo *Zil Curieuse* Vev pe fer ase byen.

I annan bann *survey* ki pe ganny repete sa lannen e bann rezilta i ava ganny pibliye e you dimoun i ava war ki sityasyon vev lo sa zil.

Onorab Georges, ou'n koz en pe lo plizyer size e i annan enn ki ou'n koz lo la ki annan pou fer avek en size en pe parey *entitlement* en pe drwa.

Kot dimoun i dir zot annan serten dwa pou fer serten keksoz, mon krwar nou tou nou bezwen ede pou sansibiliz dimoun ki i nepli en drwa.

Dan lemonn ozordi mannyer sityasyon i ete nou bezwen nou tou pran en responsabilite, e non pa zis assume ki mwan dan en fason spesyal mon annan en drwa spesyal pou mon fer serten keksoz.

Akoz sankwa keksoz sa pti gin ki nou annan la ozordi dan sa lemonn i pou disparet; e alor i enportan ki nou tou nou pran

sa responsabilite e nou kontinyen pas sa mesaz.

Parey ou'n dir fer sa repetisyon pou ki tou dimoun i konpran sa mesaz ofe anmezir ki nou pas sa mesaz.

Aprè i annan en size *border control* osi ki'n ganny leve ki mon'n koz lo la en pti pe, e *border control* i toultan reste en priyorite kot nou bezwen kapab *capture* tou sa ki pase antre sorti.

Me nou vwar ki parfwa lo kote antre nou met en pe zefor en bon pe zefor, me selman petet parfwa lo kote sorti i annan en tandans ki serten dimoun i kapab sape avek serten keksoz.

Nou bezwen vremen egzers plis kontrol, pour nou fer sir ki nou pa pe vremen les pase nenport kwa pour ganny eksporte dan lezot pei.

Ok, mon'n koz lo sa ki Onorab Pillay in koz lo la e mon ava aret la Mr Speaker... non i annan enn ki Onorab William, dernyen in koz lo la se *reward* pou bann dimoun ki donn lenformasyon avek Minister.

Pour le moman Onorab, mon pou dir ki bokou dimoun laplipar dimoun pe donn nou lenformasyon san ki zot demann naryen an retour.

Zot pe fer li aköz zot anvi fe li e aköz zot konsernen e zot

krwar i en keksoz byen pou zot fer e sa nou remersye zot bokou.

Me petet dan lefitir pou annan serten ka kot nou pou bezwen rod serten fason pou nou atir dimoun pou anmenn lenformasyon kot nou.

Me selman mon ti a voudre dir ou ki pou le moman en kantite dimoun i konsernen, en kantite dimoun i pare volonterman pou donn lenformasyon. E ou'n osi met en pwen lo *forestry*, lo vizibilite ek travay ki nou pe fer lo *forestry*.

Byensir letan nou ava al dan diskisyon Bidze pli tar sa lannen, nou pou osi eksplik en pti pe ki mannyer nou pe fer lo *forestry*.

Akoz mwan osi mon'n rekonnet e mon'n pas sa avek bann *staff* ki *forestry* i enn nou bann landrwa ki pa tro for dan nou Minister, e nou bezwen remet *forestry* lo son lipye pour ki nou war son bann benefis pa zis dan plantasyon fore, me osi dan bann landrwa irben par egzantp.

Dan bann landrwa lakot, dan bann landrwa kot lafore i zwe en rol pou ed nou fer fas avek sanzman klima.

So mon ava aret la Mr Speaker, mon ava remersi tou Manm pou zot sipor pou ki zot in eksprimen atraver zot

entervansyon e mon ava fini. Mersi bokou.

MR SPEAKER

Mersi Minis, pou ou *summing up* e konklizyon. Bon prezan mon ava apel Manm pou vot lo *general merit* sa *Bill* dan *Second Reading*. Manm ki an faver lev lanmen silvouple?

Mon krwar mon'n war tou Manm lev lanmen donk napa personn ki vot kont. Bon, tre byen.

Lo *general merit Wild Animals and Birds Protection (Amendment) Bill, 2024* 28 Manm i vot pour, 0 kont e 0 in *abstain* alor *Bill* in aprouve par Lasanble.

Mon war en pti amannman... *Second Reading* Madanm Clerk avan. Mersi.

MADAM CLERK

Mersi Mr Speaker.

A Bill for an Act to amend the Wild Animals and Birds Protection Act. Mersi Mr Speaker.

MR SPEAKER

Mersi. Donk, nou a pas dan Staz Komite pou swiv nou prosedir. E mon ava envit Onorab Hoareau pou prezant son amannman.

HON JOHN HOAREAU

Mersi Mr Chair. Mr Chair, parey ou kapab konstate i annan zis en pti amannman ladan, me posibilite i annan 2 amannman pou fer.

Lamannman i ganny trouve lo anba *amendment of section 3 clause 2 (1)* anba trwazyenm laliny *after the word "penalty is"* nou pe retir sa mo "so"...

E mon ti ava kontan osi demann avek *panel* avek sirtou *AG's Office* vi ki dan *principal Act* i servi *2 years in words*, la mon war i met *7 years in figures* – "7". So mon ti a kontan demann li si i ti ava kontan ki nou sanz li pou fer li vin "*7 years in words*"?

MR SPEAKER

Be letan ou pe dir sa...

HON JOHN HOAREAU

Pou kit *consistency* Mr Speaker.

MR SPEAKER

...sa pwen lo *SCR* pou... ou pa pe i pa aplike sa pou sa soz, i annord avek *original Act*? *Ok*. Tre byen.

Minis, lo kestyon Onorab Hoareau ... 7 sorti *numeral* pou vin an mo?

MINISTER FLAVIEN JOUBERT

Mr Speaker, mersi, avek ou permisyon mon ava pas la parol avek reprezantan *AG Office*.

MR SPEAKER

Mersi. Yes, reprezantan *Legal Draftsperson*.

ASSISTANT PRINCIPAL LEGAL DRAFTSPERSON AG'S OFFICE VICTOR HILL

Mersi Mr Speaker, nou pa pou konteste sa *proposal* pour fer li vin servi *alphabet* dan plas *numeral*; so nou aksepte.

MR SPEAKER

Tre byen. Onorab Georges, ou annan en pwen?

HON BERNARD GEORGES

Wi, mon pa konnen si Onorab... mersi Mr Chair, mon pa pa konnen si Onorab Hoareau, in manke me sanmenm sa laliny trwazyenm laliny apre sa mo *or* i annan en *comma* ki'n ganny *inserted*. Mersi.

MR SPEAKER

Byen. Onorab, ou rekonnet sa, mon war i dan *tracked version*, so sa i a ganny note konman en *minor amendment*. Onorab Hoareau?

HON JOHN HOAREAU

Mr Speaker, ou annan toutafe rezon lo *original version* lo

principal Act i annan sa “SCR” ki in ekrir zis “R” so la ler mon pe re tyeke la. So i mon krwar i ti ava nesese ki nou tir sa “SC” devan tou lede...

MR SPEAKER

Ok, Onorab Georges ou...?

HON JOHN HOAREAU

Devan 5 thousand avek devan 1 million.

MR SPEAKER

Onorab Georges, ou pe adres sa?

HON BERNARD GEORGES

Mon ti’n lev mon lanmen pou en lot keksoz Mr Chair, me mon kapab adres sa pwen.

Annefe mon osi mon fek regard Lalwa me etandonnen ki *fine* i aparet zis 1 fwa avek *capital* “R” laba e ki nou pe tir li e nou pe ranplas li, *it doesn’t matter whether* ou met SCR la...

MR SPEAKER

Ok.

HON BERNARD GEORGES

E akoz i annan zis en fwa kot sa i aparet.

MR SPEAKER

Tre byen.

HON BERNARD GEORGES

Me solman mon ti’n lev mon lanmen akoz Onorab *Chief Whip*, Onorab Sandy Arissol in fek fer mwan vwar ki dan 1,2,3,4, senkyenm laliny apre 7 years i annan osi en comma ki’n ganny azoute. Mersi.

MR SPEAKER

Wi, sa osi in ganny marke. So Onorab Hoareau, ou ann ankor?

HON JOHN HOAREAU

Wi, ordinerman nou pa al tro lo bann *commas* akoz *here and then* nou *add* bokou *commas*, so i deza lo nou kopi la lo *Bill*.

So i ganny *take up* par *drafters*.

MR SPEAKER

Tre byen. So bann amannman in ganny aksepté.

Nou a retourn dan staz Lasanble pou pran Mosyon pou *Third Reading*. Onorab Arissol, ou annan laparol?

HON SANDY ARISSOL

Mersi Mr Speaker. Bonn apre midi ankor enn fwa tou bann dimoun ki pe ekout nou Minis, avek ou lekip.

Mr Speaker, anba *Order 76(1)* mon *move* ki *Bill Wild Animals and Birds Protection (Amendment) Bill, 2024 Bill (No. 14) of 2024* ganny lir en

Trwazyenm Fwa sa voyaz *as amended*. Mersi.

MR SPEAKER

Tre byen. Mosyon a i ganny segonde. Onorab Esparon.

HON REGINA ESPARON

Meris Mr Speaker. Mosyon in ganny segonde pou *Third Reading*. Mersi.

MR SPEAKER

Manm a vot lo Mosyon pou *Third Reading*. Manm ki an faver lev lanmenm silvouple?

Lo *Formal Third Reading Wild Animals and Birds Protection (Amendment) Bill, 2024 as amended* 28 Manm in vot pour, 0 kont, 0 *abstain*.

I gran plezir pou dir *Bill* in aprouve par Lasanble e Madanm Clerk a fer *Third Reading*.

MADAM CLERK

Mersi Mr Speaker.

This Act may be cited as the Wild Animals and Birds Protection (Amendment) Act, 2024. Mersi Mr Speaker.

MR SPEAKER

Mersi *the Bill is passed*. Bon, i reste mon pou remersye Minis, e so delegasyon pour zot partisipasyon. E byensir bann Manm pou zot kontribisyon.

Nou ariv a lafen nou travay pour ozordi. Aparad detrwa pti lanons - donk mon ava envit Minis, e son delegasyon pour fer zot depar; e mon a swet zot bonn kontinyasyon e mon a demann Lasanble pou zis reste avek nou en pti moman.

Bills Committee in enform nou ki zot in konplet travay apre midi lo *Virtual Asset Service Providers Bill, 2024*. E Madanm Clerk in fer en *Revised Order Paper* e nou kapab met sa pou *First Reading*...

Sorry Onorab Pillay, ou'n lev lanmen ki pwen ou le fer?

HON SEBASTIEN PILLAY

Mr Speaker, mon konnen ou pe al fer sa bann lanons, be an se ki konsern *Penal Code* eski nou annan okenn *time frame* lo kan Lasanble pou deside regard li dan *Bills Committee*? Mersi.

MR SPEAKER

An dizan Madanm Clerk, ou a prosede avek *First Reading*.

MADAM CLERK

Mersi Mr Speaker. *This Act may be cited as the Virtual Asset Service Providers Act, 2024*. Mersi Mr Speaker.

MR SPEAKER

Thank you. Lo Penal Code mon pou envit Bills Committee pou regarde menm dan letan ki pe vini ki nou pou al dan recess, pour pran sa Bill an konsiderasyon. Pou regarde ki travay zot pou fer e nou a kapab met li lo Order Paper dan nou trwazyenm Sitting lannen. Ok?

An sa ki konsern bann lanons premye mon annan plezir enform zot ki Komite Government Assurance COGA, pou fer en legzibisyon dan fwaye dan Lasanble, dan lobby Vandredi le 2 Out e sa i ouver 10 er bomaten.

E byensir bann Manm in ganny sa lenformasyon lo zot group zot ganny demande pou siport sa levennman e par zot prezans. Donk, pa oublie met sa dan zot diary dan zot reminder. E mon remersye COGA pour zot linisyativ ki zot in pran, akoz sa egzibisyon i an konteks selebrasyon komemorasyon 31enm laniverser Lasanble Nasyonal. So en levennman ki annan son senbolizm.

Lo lot kote osi, mon bezwen zis kantmenm zis semenn pase Madanm Deputy Clerk ki ti organiz en kozri Mangrove Talk ki ti osi dan kad 31enm laniverser Lasanble, kot nou ti fer sa ansanm avek

plizyer NGO dimoun responsab pour lanvironnman.

E ti en levennman kantmenm mon ti manke anons li semenn pase - ozordi mon le zis dir zot felisitasyon e mersi pou sa ki zot in fer tousala i ede dan sa ki Lasanble i fer...

(APPLAUSE)

MR SPEAKER

... dan sa ki Lasanble i fer pou avans bann size ki konsern nou popilasyon tre pre.

En lot lanons se lo sign language zot in deza aprann ki i annan sa group ki pe zwenn e avek en zofisye dan sa NGO ki zot pe aktyelman sansibiliz bann Manm lo sign language e montre zot en pe sign language. Sa i fer san Vandredi e lanons pou ganny fer lo dan ki zour me nou demann bann Manm pou not sa en pou partisipe otan ki posib.

Sa i bann lanons. Donk, i reste pou mon remersye zot pour zot travay sa semenn. Lasanble ava adjourn e i a re pran Mardi 9 er Adjourn.

(ADJOURNMENT)

